

Thomas Christian, *Pargys Caillit* (1796), as
published in *Manx Miscellanies* No. 1, Douglas:
The Manx Society, 1872.

Scanned from the PDF available online at
books.google.co.uk/books?id=Kws5AQAAMAAJ and proof-read, with a few
obvious typos corrected. The pagination copies that of the 1872 edition.

Max W. Wheeler. 1 March 2014

GYS Y LHAIHDER.

— : 0 : —

AYNS ard chreenaght ren oo ny seihill y chroo,
Mârish dagh obbyr t'ayndoo smoo as sloo ;
Jeh'n soilshey mooar hug uss da'n phadeyr share
Goaill pen ayns laue, dy chur dooin bun as baare
Jeh'n croo breeoil, ren y Goo ayds y yannoo,
Tra scar oo'n ooir veih'n aer, yn tonn veih'n thalloo ;
Ta goull beg sollys skeayley magh er my chree
Dy voddymys gynsagh da ny MANNINNEE
Yindys mooar ta foast feer joarree daue ;
As da ashoonyn ta jeu er dagh laue.
Te cur dooin hoshiaght tushtey cair jeh Jee,
Negooish cha neeagh nyn dushtey nhee erbee ;
Gynsagh cre'n dooghys ta ny ainleyn jeh,
Cre'n mie as sie, as cre dagh pooar er-lheh.
Kys haink yn ard-ainle va crooit flaunyssagh,
Dy ve ny ghrogh-sp'ryd eajee iurinagh :
Abbyr cre'n ymmyd t'ayns ny seihill fo niau,
Cre'n-fa v'ad jeant, quoi hug nyn gummey daue :
Insh veih cre'n fraue ren peccah hoshiaght gaase
Kys hoill unnane da sheelnaue ooilley baase :
Kys huitt nyn Ayr, v'ayns lheid y foayr rish Jee,
Fo ard-chiarail as shooyl ny flaunyssee,
Dy chaill eh garey phargys, as dy daink Creest
Dy chionnagh eiraght s'berchee dauesyn reesht :
Oh chreenaght insh dooin cha vel veg gyn-yss,
Nhee dy row rieu, dy bee, ny dy vel nish ;
Chaos bione dhyts 'n reiltys my jagh ny seihill er jannoo,
V'ee folmit feayn my row ayn niau ny thalloo.

Yn Ghailck ta goaun, yn tushtey aym's annoon,.
 My roshtyn giare, my vriwnys neesht ro choon ;
 Soilshee er my ghorraghys, niartee lesh my ghlare,
 Trog seose my smooïnaght ard erskyn yn aer ;
 Dy voddym loayrt jeh dt'obbyr yindyssagh,
 Ta erskyn earroo mie as eunyssagh.
 O ! cha vel eh lowit, da dooinney bio,
 Dy cur slane freggyrt foast da'n question shoh ;
 S'lioar da marvaanagh tushtagh 've ayns ayn
 Jeh shen va, ta, as vees dy bragh er-mayrn ;
 Agh my s'gooidsave lesh hene v'er yeeaghyn daue
 Jeh 'choayl gloyroil, s'mie coadit lesh e laue,
 Shen insh-yms diu, dy vod dy chooilley chree :
 Ve agglagh roish yn Ennym bannit Jee.
 Yn Chiarn, yn Chiarn Jee myghinagh,
 Surranse foddey lane mieys firrinagh ;
 Freayll myghin cour thousaneyn, lhiggey sheese
 Moodad kerragh toillit son nyn mee-chraueeys ;
 Foast, dy vod eh cairagh y ve myr Jee,
 Gyn loght cha gum eh kyndeeagh erbee ;.
 Agh cooileeney fooiljyn ayrey er y chloan,
 Gys ny sheelogheyn nagh vel foastagh ayn.
 Jee sp'ryd casherick niartal 'skyn dagh pooar,.
 Ayns mieys, creenaght, cairys, gillid gloyr ;
 Jee er dy rieau, as bee er son dy braa,
 Toshiaght as jerrey, roish as lurg dagh traá :
 Veih hene ta hoshiaght, as veih ta dagh nhee
 Goailt toshiaght, bishagh, bioys, aase as bree ;.
 Dorraghys as soilshey dasyn ta'd n'un chooid,
 As cha vel veg nagh rosh e hushtey trooid.
 Jeh hene ta vaase, veih hene neesht e ghloyr,
 Niartal t'eh hene, gyn jerrey ta e phooar :
 T'eh Ooilley-niartal, 'naght myr dooyrt mee roïe,
 Eisht cha vel obbyr dasyn ta ro chreoi.

PARGYS CAILLIT.

PARGYS CAILLIT.

MYCHIONE REERIAGHT NIAU.

——— : o : ———

YN Chiarn Jee skeayl magh reeriaght vooar da hene,
Liauyr fegooish kione, as fegooish cagliagh lhean ;
Niau jir mayd r'ee ; cheer dy vaynrays vooar,
Lane jeh dagh mie, jeh berchys, ooashley's gloyr.
'Sy reeriaght shen ta'n eunys firrinagh,
Mieys 'skyn smooïnaght, farraght son dy bragħ ;
Ayns shoh gyn laue ny saase, agh pooar e ghoo,
Ard-valley aalin niartal ren eh 'chroo ;
Yn voalley ard ta jeant jeh claghyn deyr,
Ny straidyn rea ta paymadit lesh airh :
Daa ghorrys jeig t'er, as ad shoh leeideil
Gys whilleen straïd, ayns y chesh-vean meeiteil
Ec plaase reeoil y Jee mooar ard soilshean,
Cur sollys gennal's gerjagh gys dagh ayn.
Er grian, ny soilshey dooghyssagh erbee,
Cha vel ayn feme ; te gyn scadoo, gyn oie :
Un laa gial rieu nagh bee dy bragħ ec kione,
Gloyr Yee yn yillid as y soilshey t'ayn.
Jeh foays y valley berchagh shen dy loayrt
Faillee my ghlare, cha voddym coontey 'choyrt
Jeh'n vaynrays sloo ; son reddyn spyrrydoil
Ta ard 'skyn schleï as tushtey feill as fuill.

Agh myr ta soylit gys y veg yn vooar,
Gys y seihll shoh soyl-yms reeriaght ny ghloyr ;
Son cha vel nhee dy vaik mayd mie fo'n ghrian,
Agh scaa ny reddyn eunyssagh t'ayns shen.

Dy voddagh ree'ghyn's reiltee ard ny hooir
 Ve jeh un chree (lesh moods nyn gooid as pooar,
 Nyn argid's airh, nyn goyrle down as nyn geeayl),
 Dy hroggal balley mooar son ooashley'n theihll,
 Soit magh lesh berchys, as nyn ghiootyn share,
 Cheet as ny Injyn foddey Heear ny Har,
 Cha beagh eh agh myr Babel ommidjagh .
 Gys y Jerusalem gial flyaunyssagh.
 Shoh, shoh reeriaght as balley ard y Jee
 Foast fegooish theay, as fegooish cummaltee
 Dy viallys, ny dy ghoail rish nyn Ree.

Nish myr hee shiu reeriaghtyn mooar y theihll
 (Er graih agh mie, kiannortys, doaie as reill)
 Dy creeney rheynnit, fo reiltee smoo as sloo
 (As y sloo still ayns biallys da'n smoo) ;
 Theay, Deiney-seyre, Crightyn, Chiarnyn mooar,
 Earlyn, Dukeyn, Reejeryn ard ayns pooar,
 Princeyn reeoil, Counceillee, firrinagh ;
 Foast gys un Ree t'ad ooilley biallagh.

Myr shoh, jeh bree yn soilshey gial t'ayns gloyr, Chiaddee
 Jee Spyrrydyn sollys fo ayns pooar ;
 Ainleyn, Ard-ainleyn niartal, Cherubim,
 Mienyn graihoil, Chiarnys as Seraphin,
 Reiltee shirveishagh fo nyn Booaraghyn ;
 Myr va nyn stoo myr shen t'ad farraghtyn
 Er-son dy bragh ; yn dooghys oc ta glenn
 Veih'n vroïd vooar ta cur er sleih gaase shenn,
 Annoon as ching, dourinagh as baasoil.—
 Rere lheid's bree'n dooghys ass v'ad er nyn ghoail.
 Agh ta ny ainleyn jeant jeh lheid y vree,
 Niartal as glen, nagh vod ad cherraght chioee ;
 Baase as bea liauyr, ta cur dagh dooghys mow,
 Cha benn roo shoh ; cha vod y stoo oc lhoau.
 Cha vel y voal cha chiu, ny'n chreg cha creoi,
 Oddys 've coodagh ny scadoo nyn 'oï :

Jeeagh cre cha bieu, cha niartal as cha jeean,
 Ta brishey trooid y ghless shliawin skell y ghrian ;
 Lesh yn aash cheddin oddys sp'rydyn roie
 Trooid prash ny yiarn, ny red dy vel ny s'creoi.

Earroo ny spyrrydyn sollys shoh va mooar,
 'Skyn earroo'n sleih va ny ta er yn ooir.
 Sheel nyn Ayr Adam ooilley, dy beagh bio
 Gys jiu, cha gormagh foast yn coontey shoh ;
 Coid ayns gloyr sloo, cooid ayns gloyr smoo soilshean,
 Agh yn Ainle sloo lesh gloyr y Jee mooar lane.

Myr ayns oie aalin ta shiu cur-my-ner
 Ny cainleyn sollys lossey ayns yn aer ;
 Paart beg, paart moar, cur soilshey er dagh laue,
 Rere towse y phooar ta Jee er n'eeasaght daue,
 Foast ooilley sollys losses lseh-my-r-lseh,
 Chioee freayl nyn reill yn dooghys t'ad jeant jeh ;
 Myr shoh ny Ainleyn flaunyssagh va jeant,
 As cha row oyr ec beg ny mooar dy phlaiynt.

Cha nyrrys Niau ve reeriaght eunyssagh,
 As gys y seihll shoh soylit yindyssagh ;
 Yn ream lane dy vie, as mieys hene y Ree,
 Yn slane they graihagh ooilley jeh'n un chree.

Foast mie yn they va dy ve firrinagh,
 As foays mooar Yee dy vel eh mie dy bragh ;
 Gys gloyr Yee hene va'd ooilley er nyn oardagh,
 As ass nyn booar cha row ad dy aase moyrnagh.

Cha row yn seihll fo niau foast er ny yannoo,
 As seose 'syn aer meiht cha row'n ooir ny shassoo ;
 Agh raad ta'n ooir nish chemmit lesh y cheayn,
 Raad ta rollageyn, eayst eaghlaa, as grian,
 Va eaynagh ghowin gyn grunt, gyn ooir, gyn kione,
 Gyn doaie, gyn cummey ; dorragey as feayn.
 Cha row ayn har ny heear, ny twoaie ny jiass,
 Chamoo v'ayn heese ny heose, ny hoal ny wass,

Imbagh ny traas ; daaghyn doo ny bane
 (Foast lesh ny rassyn oc shoh ooilley lane) :
 Aer, ooir, aile, ushtey, nyn giare kione-y-cheilley,
 As un oie eajee, ghoo, reill harrish ooilley.

Agh Niau nish jeant, mârish ny cummaltee,
 Rere pooar Ooill'-niartal as ard-chreenagh Yee,
 Er laa dy row (son laghyn ta ayns Niau,
 Dy howseyn braa beayn, nagh vod traas y cheau ;
 As ga te gyn oie foast ta ayn lheid y traas,
 As ta shirveish dy scarrey laa veih laa).

Er lheid y laa shen, sheshaght caggee Niau
 Freggyrt gys symney Reeoil h'er cur daue,
 Ooilley dy heet kiongoyrt rish stoyl y ghloyr,
 Dy clashtyn aigney's leigh yn Croodagh mooar,
 Haink fodd' as gerrit veih dagh boayn jeh'n reill,
 (Seraphim gial as Pooaryn ard leeideil
 Ny Troophyn sollys) : kiaull ving flaunyssagh
 Lhieen yn aer vannee myr v'ad getlagh stiagh
 'Sy valley mooar shen, trooid ny dor'syn ard ;
 Maynrays as boggey lhieeney ayns dagh straïd :

Yn Ooilley-niartal soie er stoyl reeoil,
 Ard 'skyn dagh yrjid's erskyn-towse gloyroil ;
 Ainleyn, Ard-ainleyn, as slane ooashley Niau,
 Myr whilleen grian, nyn shassoo er dagh laue
 Jeh'n Phooar Gloyroil ; crownyn as slattyn reill
 Hilg ad er laare, ayns cowrey jeh nyn gheill
 As biallys ; goaill-rish dy nee veih Jee
 Va oc nyn mea, nyn maynrays, as dagh nhee.

As va Mac Yee ayns oghrish 'Ayr ny hoie,
 Gys nish freilt follit veih ny flaunyssee ;
 Cherubyn sollys er dagh lhiattee va,
 Gial myr y ghrian ain ard ec y vunlaa.
 Gloyr, pooar, as reill va grainnit er e ghruaie,
 As veih e hooillyn graih (myr stroo) ren roie,

Lesh va flaunys villish er ny lhieeney ;
 Dagh Ainle streeu quoui smoo yinnagh cooilleeney
 Ayns graih sp'rydoil, as aigney mie dy-cheilley :
 Shoh'n aght va flaunys myr un cheayn dy ghraih,
 As jeh dagh eunys nagh vel, nagh jean traish.

Eisht hug y Croodagh niartal magh coraa,
 Lesh ren Niau veih'n undin ooilley craa :
 Un Vac ennoil (dooyrt Eshyn roo) ta aym,
 Jiu er ny gheddyn, as eh shynney lhiam,
 My yaloo hene, my chreenaght as my phooar,
 My Ghoo smoo niartal's corrym rhym ayns gloyr.

Mish Jee, as mee ta cur y leigh shoh diu
 Mychione my Vac, ta shiu dy akin jiu ;
 Echey ta pooar (voym's) harrish ooilley niau,
 As dagh nhee ta livreit stiagh ayns e laue ;
 Niau as ny t'ayn ta echey fo e reill,
 Da ta mee goardagh shiuish neesht dy chur geill.

Ayns niau, ny mish, cha vel unnane ny smoo,
 As liorym pene, kiongoyrt riuish, ta mee loo :
 Dy chooilley ghlioon uagh groym, ayns ammys da,
 Vees tilgit magh ass m'enish son dy braa ;
 As veih my vaynrays, veih my ghrayse as foayr,
 Veih ooilley'n chairys t'echey ayns my ghloyr.

Shoh loayr y Jee, as ooilley cheayll e ghoo ;
 Lesh skell e ghloyr va 'eddin follit voue.
 Ny ainleyn, myr dy beagh ad booiagh lesh,
 Chroym sheese nyn gione, as ghlioon ayns biallys ;
 Myr dy beagh ad booiagh, ta mee gra,
 Son ayn cha row, myr hee shiu ayns y traa.

Eisht hrog yn enish vooar ayns un choraa :
 Gloyr, booise as moylley gys Mac Yee dy braa,
 Eh ayns e ghloyr ta shin er akin jiu ;
 T'eh Jee dy braa, as v'eh Jee er-dy-rieau.

Eisht buird va coodit lesh gien flaunyssagh,
 Ayns plaaseyn reeoil, troggit mirrilagh ;

Raad ren ny Ainleyn ad hene y yannoo-magh,
Lesh bee ta freayll yn eeder bio dy bragh.

Claareenyn airh soit magh lesh diamonyn ;
Jeh pearlyn sollys jeant ny cappanyn :
Mess billey'n vea craait neose dy palchey'r laare,
As manna millish chummit mysh dagh claare.
Cha mirrilagh va'n manna shen, ayns bree,
Dy row eh freggyrt foays as blass dagh bee ;
Dagh cappan berchagh v'er ny chummal lane
Lesh ushtey'n vea veayn, geill veih ard-farrane ;
As lheid as ta 'skyn earroo share na'n feeyn
S'berchee, ta cheet veih cheer dy vel fo'n ghrian :
Cha palchey shen va'n laue va deayrtey veih
Ren ooilley gee, ooilley nyn glaare y reih.
Cre cha roomoil's ta cooyrtyn y Jee mooar,
Dy vow'n theay ooilley ayndoo room dy liooar.

Ny Ainleyn, myr shoh, cuirt gys boayrd nyn Ree,
Ayns aght sp'rydoil ren ooilley giu as gee,
Jeh lheid y yien shen as ta dooghyssagh
Da Ainleyn sollys, Spyrrydyn bio dy bragh.

Ny buird nish troggit, dirree'n cheshaght seose,
Dy crauee streen quoi s'creeoil yinnagh booise ;
Lesh moodads kiaull, eisht, lhienn bingys ooilley'n aer,
Dy schleioil cloit er greinyn berchagh airh.

Yn fastyr er, son fastyr t'ec dagh laa
As moghrey neesht ayns shen, er graih caghlaa
Cha nee son feme ; tra skeayl ny flaunyssee
Er feai-ny-maynrys, trooid magh reeriaght Yee.
Garaghyn messoil, magh'ryn foddey rea,
Lheeantyn glass braa, ushtit veih geill y vea ;
Lesh strooyn millish, dy bragh palchey roie,
Cur-aase as bea veayn da dy chooilley nhee.

Plaaseyn princeoil glis'tral myr-whilleen grian,
As eunys freggyrt gys dy chooilley vian ;
Va'n tooill lesh fakin er ny yannoo magh,

Yn cleaysh lesh clashtyn bingys eunyssagh :
 Ooylyn millish, as spiceyn ooasle gaase
 Dagh boayl, as croan ny bangan cha row faase,
 Nhee cha row baggyrt ass-laynt, snieh, ny baase.

Yn fastyr anmagh lhieeney orroo'n oie,
 Lheid yn oie as t'ayn, ashoon ny flaunysee
 Ayns nyn gabbaneyn, huitt y slane ashoon
 Gys fea sp'rydoil, myr veagh saveenagh kiune :
 Ooill' agh y cheshaght vooar, va ayns nyn draa,
 Mysh stoyl ny ghloyr, bingys Alleluja.

Foast, un Ard-ainle va mooar ayns foayr rish Jee,
 'S reill harrish millaghyn dy flaunyssee
 Cummaltee'n twoaie vooar, fodd' veih Cooyrt ny ghloyr,
 Leeideil e hroopyn gial ayns earroo mooar,
 Ren shassoo seose 'syn ennish hollys va
 Kiongoyrt rish Jee, geeck ammys injil da ;
 V'eh'n chooid sloo corrym rish yn Ainle by-yilley,
 As veagh eh foast, 'bey hug eh mian da ooilley.

Ass moods e phooar daase eh shoh moyrnagh, troo
 Mysh yn ard-reill v'ayns laueyn yn Er-croo ;
 As mysh e Vac shen, nish va jeant ny chioan
 Harrish ny Ainleyn, as dagh dooghys v'ayn ;
 E chree daase mooar, as ren eh goaill ayns laue,
 Dy row eh hene feeu dy reill ooilley niau.

Cre'n ennym v'er shoh choud as v'eh ayns foayr
 Rish Jee, cha s'aym, gyn dooyt ve ennym mooar,
 Agh nish t'eh dollit magh ass lioar y vea,
 As goll fo ennym agglagh noidagh t'eh ;
 Myr Satan, Moddey, Dragon mooar, as Jouyl,
 Ard-nieu, Lion, Noid, as Dunver dewil,
 Oltoanagh broghe ! Agh t'ad dy chur dooin fys
 Cre'n aigney feayr, as noidagh, ta ayn nish.

Tra va ny Ainleyn elley ayns moods shee,
 Gyn loght, as bingys moylley's booise gys Jee,
 Va Satan dooisht ; down tilgey ayns e chleeau,

Kys yioghe eh'n cheshaght-chaggee er e heu,
 Dy irree-magh noi'n Ooilley-niartal Jee,
 As phluckey neose eh veih dy ve ny Ree ;
 Yn Mac y hilgey magh veih'n eiraght vooar,
 'S eh hene y hoiagh seose er stoyl y phooar :
 Chroym eh gys Ainle jeu, va mygeayrt y mysh,
 As ren eh 'roon myr shoh y lhiggey rish,—

O Vraar gloyroil, kys oddys uss v'ec fea
 Fo errey'n leigh dewil hie er cur dooin jea ?
 Shin ! va, veih'n toshiaght, ec slane aigney seyr,
 Mârish Jee hene co-eiraghyn, ayns gloyr,
 Shegin nish yn whing y cheau ; 's ve biallagh
 Dasyn nagh row agh sheshey flaunyssagh ;
 Myr nagh by-liooar dooin ammys 'eek da Jee,
 As gyn e Vac ve harrin soit myr Ree ;
 Ve kianlt nyn ghlioon 'chroymmey ayns ooashley da,
 Dagh keayrt vees 'ennym mooar er ny imraa ;
 As shoh lesh slattys nagh jed sheese dy braa.

Nagh vel ayns Niau aym's hannah pooar dy reill
 Harrish mooarane ; cha vel mee mee-hreishteil
 Nagh shass ad ooilley fo my chullee ard ;
 Dy beagh aym saase dy hayrn veih'n voayl shoh ad,
 Gys bun y twoaie vooar, ec my phlaase reeoil,
 Raad s'lioar da Jee shin 'akin lesh e hooill.

Trog ort as skeayl dy skianyn sollys lhean
 As Leah, myr smooïnaght, getlagh gys dagh boayn
 Jeh m'armee lhian, insh da ny leideilee
 Dy vel raauë gyere eer nish, er heet veih'n ree,
 Dy chruinnaght ooilley ny ta fo my phooar
 Gys un slane vustyr, ec my Halley vooar ;
 Raad vees e hene (myr t'eh er yialdyn jiu)
 Ayns gloyr, as ver eh tooilley leighyn diu.

Satan, choud shoh, yn Seraph er ny ghoail
 Lesh moods e viol, ny sleaie ny side, h'er-sooyl
 Er drogh yurnah, dy hayrn e heshaghyn

'Sy ribbey youyllagh, roish traa smooïnaghtyn.

Yn chaght'raght jeant cha leah as v'er ny ghra,
 As credjue aashaght, neesht, er ny chur da ;
 Va'n chullee reeoil troggit seose 'syn aer,
 Dy voddagh ooilley shen y chur-my-ner,
 Myr cowrey siyragh daue, dy etlagh bieau
 Gys yn Ard-seraph aarlooy dy gholl lhieu.

Cha vel yn eayst ta sollys er nyn skyn,
 Chyndaas 'syn aer, cha gial's va'n chullee shen.
 Armeeyn mooar y twoaie, va bentyn rish,
 Hayrn stiagh dy leah, jeeaghyn nyn miallys ;
 Trooïd yn aer thanney yiare ad lesh nyn skian,
 Dagh pooar leeideil ayns doaie e heshaght hene.
 Jeih keayrtyn jeih thousaneyn v'ayns dagh rheynn,
 As er-skyn coontey va ny rheynnyn shen ;
 Myr bodjal aileagh hrog ad seose dy ard,
 Lossey 'syn aer ghial myr vad goaill nyn raad ;
 Ny hrooid myr chentyn taarnagh ren ad roie,
 As ayns y tullagh v'ad 'sy twoaie nyn soie
 Ec y voayl pointit, foddey smoo jeh niau
 Faagit nyn yei, ny ta j'inyn er dagh laue,
 Thalloy as faarkey, ayns y theihll shoh wass,
 Shin beinn y twoaie, as ooilley'n seihll ve jiass.

Gyn dooyt v'ad smooïnaght d'akin gloyr Mac Yee,
 Agh Satan v'oc ayns ooashley mooar ny hoie
 Er stoyl ard reeoil ; ayns y yillid smoo
 Ren creenaght niau 'sy toshiaght eh y chroo.
 Myr goull ny greiney hilg eh sollys veih,
 As v'eh (ayns shilley) jeh dagh ainle yn reih
 Son mooads as aalid, 'yillid gial as gloyr,
 Son roshtyn, neesht, as yirjid pooar.

E phlaase mooaralagh v'er cronk aalin soit,
 Pillaryn airh ass yn ooir verchagh cleight
 Nyn shasoo fo, as ayns dy chooilley nhee
 V'eh gearree 'ghloyr 've corrym rish gloyr Yee.

Datt eh ayns moyrn dy akin lheid y ghri'
 Dy Ainleyn sollys chaglit gys e hie,
 As fo e reill ; goaill boggey, sthie ayn hene,
 Dy row'n chield chroun er hayrn ad ayns y lieen ;
 Honnick eh'n traa dy olmagh huc e chree,
 Cre'n aght v'eh kiarit d'irree-magh noi Jee,
 Chum eh glare villish, corrym gys e viol,
 Keiltyn 'oalsaght, as myr shoh hug eh coyrle :—

Phrinceyn reeoil, Vienyn, as Pooaraghyn,
 Va rieu ayns flaunys nyn go-eiraghyn,
 Ta liorish dooghys sollys, creeney, glen,
 Ec reamys aigney seyr, dy yannoo shen
 Cre erbee sailliu hene ; dyn leigh erbee
 Dy'n giangley rieu dy viallys da Jee,
 Ny da fer elley : O te coonrey deyr,
 Son slaveraght treih, dy chreck nyn reamys seyr
 As shoh'n chooish ain, my ghoys mayd agh imnea
 Dy viallys da'n leigh h'er cur dooin jea.

She liorish dooghys haink dy chooilley nhee ;
 Dooghys ta Oilley-niartal, cha nee Jee :
 As tra va'n jeantagh mooar shoh torragh, lane
 Jeh dagh rass ooasle appee ayns e brein,
 Dymmyrk ee magh shen ta ayns nyn shilley,
 Niau as ny t'ayn, ny Ainleyn, Jee as ooilley.

Agh ta Jee gra dy nee eh ren nyn groo,
 As, veih'n oyr shen, t'eh gaggyrts yn ghloyr smoo.
 Shin hene hug raad da dy ve er nyn skyn,
 As hee shiu, nish, dy der eh leighyn dooin.

Nish, eisht, y traa, my nee shiu coyrle y ghoail,
 Dy vrishey'n geuley, 's dy cheau'n whing er-sooyl.
 Cre oddys Jee, ny 'Vac, as ny ta lhieu,
 Y yannoo rish yn dooghys nagh jed mow ?
 Cha vel oc armyn oddys shin y stroie :
 Son jeh'n un dooghys ta shin, myr ta Jee.

Lhig dooin, eisht, goll fo armyn gys e chooyrt,

Yn phooar y ghoaill, my bee oc traa dy loayrt.
 Eisht fodd' mayd leighyn chiangley er nyn mooin,
 Rere foays y sambyl t'ad er hoiagh roïn.
 Lheid ny goan mollee shoh, loayr y traitoor
 Noi'n Oilley-niartal Jee, as ooilley 'phooar !
 Foast jeh'n trass aynr jeh ooilley Ainleyn Niau,
 Hayrn Satan lesh, dy hassoo er e heu,
 Va un Ard-ainle, e ennym Abdiel,
 Nagh ghow'n choyrle youyllagh, as nagh dug da geill,
 Agh dreill e chredjue, as lesh moorarane jeïr,
 Ayns lheid ny goan shoh, loayr eh noi'n volteyr :—
 O greain as atchim ! Quoi s'loys loayrt noi Jee
 Lheid ny goan mollee ? Oh s'beg heill mish chaie
 Nyn lheid y chlashtyn. Kys daase ayns dty chleeau
 Lheid y pyshoon, t'er skeayley magh cha bieau
 Fud whilleen pooar ? Va gys nish biallagh,
 As vees, dy-gerrit, ass Niau tilgit magh
 Mayrts son dy bra, gys ynnyd t'er ny chroo
 Da'n aigney piandagh, as da'n shilley doo ;
 'Skyn surranse breinn, lesh torcan as plooghane
 Veih aile gyn vooghey, lostey trooid dagh aynr
 Jeh'n diunid vooar ; dy roostey jeh dagh fea
 Ny eebyrtee, 's dy reayll ad ayns anvea,
 Torchagh as pian ; gyn gerjagh laa ny oie,
 As gyn treishteil livrey y gheddyn choiee.
 As cha vel Niau cha sollys as cha glen,
 Cha lane dy vie, nagh vel yn ynnyd shen
 Wheesh er aght elley ; as ny huilk ta ayn
 Tannaghtyn olk, son eashyn fegooish kione.
 Nish cre erbee'n lhag-chredjue t'ayds jeh Jee,
 Mychione e phooar 's e chreenaght, cha vel nhee
 Ta da ro chreoi ; son Oilley-niartal T'eh ;
 Veih hene ta 'phooar cha nee shin hug da eh ;
 Ny t'ain dy ghiootyn eshyn hug ad dooin,
 As my s'cooidsave lesh ooilley reesht ghoaill voïn,
 Cha jean mie streeu, son e chretooryn shin.

Agh myr ta Jee 'skyn ooilley wheesh ayns pooar,
Ta ammys injil cairagh gys e ghloyr.

Nagh bare dhyts, eisht, ve corree rish dty chree
Son moads dty voyrn, as dt' olkys noi dty Yee ;
Gys e Vac reeoil tuittym er dty ghlioon ;
Quoi ec ta fys nagh der eh dhyt pardoan ?

Shoh graït ; yn sp'ryd broghe gatt ny smoo ayns moyrn,
Eulys as farg, tra cheayll eh lheid ny goan ;
Frass dy ghoan eajee ren eh 'spreih,
Noi'n Oilley-niartal, e chreenaght as e ghraih :
Gobbal e phooar, e vieys, as dagh nhee,
T'erskyn cretooryn dooghyssagh ayns Jee.

As Abdiel (dooyrt eshyn) fow uss voym,
Son ta mish kiarit, as nee'm ny ta roym ;
Tilg-ym uss jiu, as ooilley pooar dty Yee,
Ayns y towl doo shen jeh t'ou branlaadee.

Yn Seraph bannee, myr veagh eh roight trooid
Lesh goan awane as mollaghtagh y sp'ryd,
Skeayl magh e skianyn eddrym er y gheay,
'S myr chenney-taarnee skell eh roish dy leah
Trooid yn aer wooiagh, gys haink ayns e hilley
Flag Ree-ny-Cairys bennalt ard, ny s'gilley
Ny grian souree ; as armee niartal Viall,
Lesh cayrnyn agglagh, feiyral cheet ny whail.
Ayns onnor hie'n Ainle bannee er meeiteil,
As atey airh h'er sheeney magh ny whail ;
Veih stoyl ny ghloyr haink coraa millish magh,
Cur moylley da, myr sharvaant firrinagh :—

Mastey'n trass ayns jeh m'Ainleyn gial cha vel
T'er hassoo lhiam, unnane, agh Abdiel ;
My harvaant mie, as firrinagh, gow royd
Lesh cooney nish, as stamp dty noidyn foyd.
Ad nagh vel er chur da my harey geill,
Gobbal my Vac feeu harrystoo dy reill,
Eebyr-jee magh, veih maynrays reeriaght Niau

Gys Niurin, as nyn noidys ooilley lhieu ;
 Eisht credjee ad, lesh aggle as lesh creau,
 Dy nee mish Jee, yn Ooillee-niartal rieu,
 As nagh vel dooghys veg agh pooar my Ghoo,
 T'er n'yummyrk magh shen ny ve roïe er chroo.

Nish tushtey Yee ta roshtyn trooid y chroo,
 Ronsagh dagh coyrle as obbyr smoo as sloo,
 Honnick y noid cha Leah as hie eh mysh
 Yn doo hraitoorys, v'eh dy imbyl nish ;
 Chyndaah eh 'hilley er e Vac ennoil
 V'ec e laue yesh, ny hoie er stoyl-reeoil :
 Jeeagh, Vac (dooyrt eshyn) eh hrog mish gys pooar
 Harrish whilleen, as wheesh jeh dt' eiraght vooar,
 Jeeagh kys t'eh cheet veih aynyn foddey'n twoaie,
 Lesh sheshaght chaggee niartal armit dt'oï ;
 As goaill ayns laue nagh vel nhee da ro chreoi.

Oardee Ard-ainle ayns siyr dy heidey'n cayrn
 Lesh coraa niartal, feiyral gys dagh ayn
 Jeh'n ream, dy vod ny Sp'rydyn cairal cheet
 Fo'n chullee ayds, cheu-mooie jeh'n valley soit ;
 Tra vees ad ooilley chaglit gys y voal,
 Miall, dty harvaant, soi seose son general.
 Ayns shoh, va'n sarey as y viallys
 Goll laue-ry-laue, cooilleenit aynsyn nish,
 'N Ayr cur y sarey, biallys y Mac ;
 Un Jee va'n jees, as un phooar corrym v'oc.

Cayrn v'er ny heidey, ny Ainleyn bannee cheet
 Ny sleaie ny sideyn ass bow-steillyn cloit ;
 Eillit lesh cairys, firriny, as pooar
 Fo Miall nyn gione, jeant aarlooi noi'n traitoor ;
 Tra veeit ad, cheet veih jurnah foddey'n twoaie,
 Abdiel mie, yn agh myr cheayll shiu roïe.

Yn coraa scuirr : Ard-ainle reesht heid y cayrn
 Gys caggey greinnagh ; eisht yn armee slane
 Veih jesh gys toshtal, scugh er-sooyl dy Leah,

Keead keayrt ny sleaie ny bodjal roish y gheay :
 Girrid y traa, ny lhiurid vooar y raad
 Cha dod cumrail, 's nyn armyn cha row laad ;
 Son sp'rydoil v'ad, sp'rydoil nyn armyn va,
 As fegooish skee's va oc kione nyn yurnah.

Cheayll shiu jeh'n chaghter bannee Gabriel,
 Er y voayn yesh v'eh shoh ; as Raphael
 Er y voayn chlea ; va Uriel ny chione
 Harrish dagh pooar as Seraph sollys v'ayn ;
 Miall mooar ayns cree'n cheshaght, as curr reill
 Magh gys dagh rheynn, as ooilley cur da geill.

Nish gys y twoaie myr shoh, tra v'ad er jeet,
 As ooilley'n armee ayns aght caggee soit,
 Cha row'n ard-noid mee-hushtagh jeh'n chiarail,
 Va goit ny 'oi, ayns reill hayrn seose nyn guail :
 Tra vaa daa vulk ny ainleyn noī ry hoī,
 Heill Satan nish dy chur e phooar 'sy veih
 Noi pooar y Chroodagh, as dy ve'n chooid sloo
 Ayns cor'mys rish, mannagh beagh eh ny smoo.

Bayr coon, agh liauyr, va eddyr ad ny-neesht,
 Cagliagh annoon noi noid as e chliwe rooisht !
 Dowin va ny fileyn, as ny rankyn liauyr,
 Ayns earroo 'skyn ny jeeasyn creen 'syn ouyr,
 Ny claghyn traie ; as dagh sidoor er-lleh
 Feeu armee reill, tra smoo veagh magher cheh ;
 Ny smoo jeh niau va coodit harrish lhieu,
 Na ta jeh'n theihll shoh wass j'in er dagh cheu ;
 As mean ny noidyn Satan va ny hoie
 Ayns fainagh caggee, berchagh lesh airh wee,
 Lesh diamonyn as pearlyn oasle soit,
 Va liorish Mammon ass dagh berchys teiyt ;
 Mygeayrt y mysh va troggit seose feer ving,
 As cummit seose dy ard er-skyn e ching
 Va attey sollys, soilshean magh myr grian,
 Cowrey reeoil, yn red va still e vian.

Eisht Beelzebub, va foast prince flaunyssagh,
 (Ayns e laue yesh lhiant cliwe lommyrtagh)
 Hass magh veih'n cheshaght (ass lieh 'vainshtyr) gra,—
 Ta shin cur-'lane feue ooilley ; as dy bra
 Cha der mayd geill da leigh ny sarey Yee
 Mychione e Vac, dy ghoaill rish myr nyn ree ;
 Nagh vaik shiu'n phooar gloyroil t'ayns shid ny hoie
 Er queeylyn airh, cre cha jesh gys e ghruaie,
 Ta echey'n reill ? nagh vel eh chiart cha feeu
 Dy ve ny Ree, as dy chur leigh dooin jiu
 As ta'n Messias, nagh vel fys quoi eh ;
 Nagh vaik shin rieu, as nagh bione dooin gys jea ?
 Abdiel mie cur geill da lheid ny goan
 (Cheet veih mee-chredjue, creoighys-cree as moyrn)
 Cha hur ny sodjey, agh lesh cliwe gyere
 Glackit dy shicky, vrish stiagh trooid y vayr
 Er Beelzebub loayrt ny goan mollaghtagh,
 As roie eh'n blod gyere ayns e scoarnagh stiagh ;
 Hussaa feer ard, eisht, hug ny flaunyssee,
 Son y cooilleeney shoh va goit lieh Yee.
 Yn chaghter smaghtit, Satan cheayll yn eam,
 As veih e wheeylyn ren eh Leah tarlheim ;
 Eilley chreoi jeh adamant va mysh,
 As cliwe aileagh bucklit gys e lhesh ;
 Boandaghyn yiarn va tayrnit er e chass,
 Agh e vaaish ghaaney stannit va lesh prash :
 Shleiy liauyr dy staillin v'echey er e gheayllin,
 Shiaght keayrtyn s'troshey na'n shleiy shen cheayll shin,
 V'ec Goliah noi aegid Israel,
 As myr shen haink eh magh noi Abdiel.
 Yn Seraph mie eillit lesh pooar veih Jee,
 As veih e Vac, cha ghow dooyt ayns e chree
 Jeh'n varriaght ; son cre erbee va'n stoo
 Jeh hie ny Ainleyn casherick er croo,
 Jeh'n stoo cheddin va cliwe'n Seraph jeant,

Ny 'oï cha shassagh yiarn ny adamant.

As ec meeiteil rish Satan, gra (myr craid),
 Jeeagh ! cre'n chumrail shoh t'er heet orts er-raad ?
 Nagh vel oo fooast er roshtyn stoyl ny ghloyr ;
 Yn Oilley-niartal Jee ayd ayDs dty phooar ;
 E Vac reeoil ayns geuley as pryssoon,
 Ginshlaghey hood, as caayney son pardoons !

Jeeagh ! ooilley Niau t'er heet dy yindys er
 Yrjid dty ghloyr, as d'eck dhyt ammys cair :
 As pooar t'aym's voue, tra oddym meeiteil rhyt,
 D'eck yn chield vess jeh'n cheesh t'ad lhiastyn dhyt.
 Shoh graït, e chliwe hrog eh ayns e ghoarn,
 Dy woalley Satan noidagh ayns e chione,
 Ren croymmey veih ; yn builley roie lieh-scaa
 Stiagh trooid yn eilley, ayns e lhiattee sthie
 Oanluckit downin, as lesh shen sheeynt er thalloo,
 'Bey lesh e shleiy chum eh 'hene ny hassoo.

Yn armee vannee hug reesht Hosanna
 Gys Jee ny Ghloyr, as gys e Vac, dy braa.

Yn Seraph mie reesht sheeyney magh e roih,
 Kiarit dy hoylley'n drogh sp'ryd trooid e chree,
 Thousane thousaneyn spyrryd roie dy chion
 Roish baare y chliwe, dy scapail nyn gione ;
 As hrog ad lhieu eh gys e ainagh chaggee,
 Gys yioغه eh aash veih'n pian v'ayns e lhiattee.

Rish shoh, cha row'n daa haglym mooar nyn-daaue,
 Son greïnyn creoi va feiyral er dagh laue ;
 Nish hee oo caggey eulyssagh er laare,
 Millaghyn troop reesht troggal seose 'syn aer
 Er skianyn Leah ; as fud ny bodjallyn
 Roie noï ry hoï, cur ooilley bun-ry-skyn :
 Sauchys ny shee cha row ayns aer ny thalloo,
 Agh eulys ghewil, gall-verg, as noidys sharroo.

Shoh v'an chield chaggey jeh ta'n Ynsagh scrieu,
 Niau er ny rheynn, as Ainleyn sollys streeu !

Miall as y Dragon, as nyn Ainleyn lhieu,
 (Ayns noidys ghewil) ren shassoo er dagh cheu :
 Ad shoh son cairys, gloyr, as ooashley Yee,
 Ad shen son reill, foast chee dagh reill y stroie ;
 Gahyn barb aileagh, cliwenyn birragh gyere,
 As shleiyghyn nieunagh slental trooid yn aer.

Va nish ry-akin yn ream eunyssagh
 Sallit lesh moyrn, as noidys eulyssagh.

Miall Prince ny Ainleyn, laill mygeayrt y mysh,
 Rheyinn lhottyn dowin gys ooilley ny veeit rish ;
 Trooid cheeid ny greïnyn birragh, gastyrt bayr
 Da' hroopyn niartal geiyrt dy gastey er,
 Roie trooid as giarey lesh e vlod daa-foyr
 Flaunyssagh jeant, as reiht ass palchey stoyr
 Armyn yn Oilley-niartal ; kiarit nish
 Cooilleeney slane 'ghoail er y traitoorys :
 Hee shiu frass niaghtee garroo, lesh niart geayee,
 Lhiggitt noi'n voal myr whilleen bullad leoaiee,
 Cha chiu shen va ny gahyn caggee cloie
 Mastey ny scaayn, faagail guin nyn yei.

As ga ta ny sp'rydyn (rere myr baillish Jee)
 Still seyr veih'n vaase, liorish nyn ghooghys bree,
 Jeant va nyn armyn jeh stoo corrym roo,
 Faagail moods pian as torchagh gyere ayndoo.
 Cha vel ny Ainleyn 'naght myr ta sheelnaue,
 Cha nee'n un phian, cha nee'n un dooghys daue ;
 Son ga ta pian ny sp'rydyn foddey smoo,
 Giarrit tra t'ad, foast ta nyn goayl ny sloo ;
 Olt mooar ny beg dy vel keayrt giarrit jin
 Cha lhiann dooin reesht, as s'lioar my laanys ching
 Ayns earish liauyr ; sp'ryd cha vel myr shen,
 (Myr dooyrt mee roie) yn dooghys oc ta glen :
 Gortit tra t'ad Leah slaanagh nee ad reesht,
 As olt dy gaill ad, Leah nee lhiantyn neesht.

Ny-yeih, ayns aynr jeu, tra t'ad er nyn m'woalley

Piandagh ta'n phian 'syn ayn shen, as trooid ooilley ;
 Foast slaanagh leah ; eisht bee ad myr v'ad rieu,
 Bio fegooish lheamys, niartal neesht, as bieau.
 As myr shoh Satan, reaghit veih yn pian
 Hug Abdiel da, ren getlagh gys dagh baayn
 Jeh 'heshaght ghoonie, dy reayll ad seose ayns cree,
 As gynsagh daue cre'n aght nyn baart dy chloie.
 Lostey lesh corree, noidys, nieu as roon ;
 V'eh kiarit nish gyn jerkal rish pardoan ;
 Agh fakin Miall er vrishey trooid y vean
 Veih oaie gys cooyl, er astyrt magher lane
 Da 'hroopyn hene ; myrgeeddin yn voayn chlea
 Toshiaght cur cooyl, thousaneyn roie er chea.
 Roish Uriel ; hug corree skianyn bieau
 Da'n kione dy heet ayns siyr dy chooney lhieu :
 As myr v'eh cheet Miall Noo bank seose ny whail,
 Lesh lheid ny goan shoh, cur da jesh meeiteil :—
 O Vac-ny-moyrn, ny smooinee dy scapail
 My laue's feiy-laa, mish s'loys nish dty chumrail
 Ayns mean dty hiyr, dy hrial nee oo'n Jee
 Ta Ooilley-niartal pooaragh, ny nagh nee.
 Viall, dooyrt y noid, gys dt' arrys yiow uss fys
 Er moads my phooar, as nagh vel mee goaill rish
 Pooar er-my-skyn. Ny goan cha row ny sleaie
 Nagh row ny cliwenyn freggyrt noï ry hoï,
 As cha row schleï ry-laccal. er y jees,
 Cuin dy 'endeil, as cuin dy ghoaill vondeish ;
 Myr veagh oayrd-chiardee va dagh builley cloit,
 Buirroogh myr taarnagh ass mean bodjal cheet ;
 Drillinyn d'aile lheim veih ny foyryn geyre,
 Lossey mumboo, as soilshagh ayns yn aer.
 Mastey dagh yindys dy jagh rieu er fakin
 Ayns niau n'er laare, ny jeh dy ren shin clashtyn,
 Cha vel un red, dy voddym smooineaght er,
 Ta feeu son sambyl, ny mac-soyley cair.

Dy hoiagh magh gys tushtey giare heelnaue
 Yn aggle baaish, yn atchim, as y creau,
 Ghoghe orroo greim, dy akin lheid y shilley
 As y daa phooar shoh caggey's streeu ry-cheilley.

Ayns slane daa aynrneh ooill' Ard-ainleyn niau,
 Ynrican Miall va coontit mie, as feeu,
 Liorish Jee hene, dy ve ny yeneral
 Creeney ayns schleï, dy reill yn armee yial,
 'S dy hayrn y cliwe gyere noi lheid y phooar
 (V'er n'irree seose nish noi'n Messias mooar),
 Fo'n Seraph niartal Satan, keayrt ayns foayr,
 Ooashley as grayse, kiongoyrt rish stoyl ny ghloyr ;
 Reill (myr Ree cheayll shiu) harrish y trass aynrneh
 Jeh cloan y toilshey, ny Chiannoort as Chiarn ;
 As nish veih'n phooar shen dhatt eh wheesh ayns moyrn,
 Jeh'n irree-magh dy daink eh dy ve'n kione.

Shoh, shoh'n eninaght niartal as sp'rydoil
 Va noi ry hoï, ayns gleck as caggey dewil ;
 Ny Satanee ayns aggle as treishteil,
 Sheer farkiaght cuïn yinnagh nyn gione failleil ;
 Agh cloan ny cairys shicky, ayns nyn gree,
 Nagh beagh nyn Miall mooar treigit liorish Jee.

Agh Abdiel ; insh uss dooin nish, cre'n aght
 Lesh yn un vuilley, hooar uss barriaght ?
 Cre'n niart, cre'n foayr, v'ec dty skynn ghyere ren roie
 Trooid cheeid yn eilley adamant cha creoi ?
 Cha Leah as haink y noid dewil seose dty whail,
 Ta nish er hassoo choud noi cliwe Viall,
 Yn Seraph reiht ass ooilley Pooar'yn Niau,
 Myr sidoor feeu dy reaghey'n chooish ayns laue ?

Ta creenaght Yee er-skyn yn tushtey ain,
 Dowin fegooish grunt, as fegooish roshtyn lhean ;
 As myr ta 'chreenaght myr shen ta e phooar,
 As dagh foays t'aynsyn er-skyn coontey mooar ;
 Da Abdiel annoon hug eshyn niart,

As foyr da'n chliwe, dy chur Satan haart
 Lesh laue feer aashagh ; as dy chur da fys
 Cre'n woodas fardail va ayns e hraitoorys
 Noi lheid y phooar, as oddagh niart y chroo
 Ayns laue annoon, dy chur laue s'troshey mow :
 As reesht, yn foyr ghow eh veih cliwe Viall,
 As gys e niart hene hie eh er faagail
 Son tammylt beg, nagh row e phooar ny smoo
 Na pooar y noid, as cha row eh ny sloo,
 Agh corrym rish, ny sleaie dy creoghey cree
 Moyrnagh y sp'ryd, dy chur-e-lane fo Jee ;
 Son raad da briwnys strimmey heet ny whail,
 As leshtal sloo 've echey dy phleateil.

Nish, ayns y streeu, tra v'eh er chur-my-ner
 Nagh dooar y noid foast veg y vondeish er ;
 Ny s'daaney gaase, chiare eh dy ghoail e vaght
 Lesh y chied saih dy chosney'n varriaght ;
 Tra haink er Miall Noo, spyrryd niartal Yee,
 As hoyll eh'n Seraph moyrnagh trooid e chree,
 Dy huitt eh sheese myr marroo, towse y laare,
 's lesh fuill sp'rydoil cur cullyr noa da'n faiyr ;
 Eisht cloan-ny-moyrn haink getlagh stiagh dy chiu,
 As er nyn armyn hrog ad eshyn lhieu :
 Shoh jeant, bulk slane ny Satanee ren chea
 Marish y laa, nish ceaut ; by-liauyr lhieu ve.
 Miall hass e ghrunt, as hoie eh arrey gyere
 Mygeayrt y mysh, nagh voghe e champ aggair
 Veih'n noid gyn-yss ; as cheau eh ooilley'n oie
 Ayns gennalys, as chebbal booise gys Jee,
 Hug barriaght daue, ad hene follan sunt ;
 'S nagh row ad lesh ny greinyn noidagh guint.

Cree'n Ard-hraitoor, nish, scoltey ayns e chleeau
 Lesh nearey's roon ; foast, moyrnagh myr v'eh rieu,
 Doardee eh 'hroopyn brisht, as ooilley'n ghri
 Dy v'er nyn jaglym gys raad v'eh ny lhie,

S'coan foastagh slane ; as myr shoh dooyrt eh roo :—
 Vraaraghyn dooie mâryms t'er hurranse jiu
 Tooilleil as pian, da'n dooghys ain feer chreoï,
 Foast ta shin bio, as slane myr va shin roïe.

Nish ta fys ain nagh vod mayd v'er nyn stroie,
 Myr jee'ghyn, eisht, lhig dooin nyn baart y chloie ;
 Shione dooys y saase ver da nyn noidyn guin,
 As brishey smoo na jiu hug adsyn dooin.

Dagh blaa, dagh mess, ta gaase seose ass yn ooir,
 Jeh whilleen daah as blass, nee'm smooïnaght er ;
 Ta ooilley cheet veih'n Ooilley-niartal bree
 Beaghey 'sy ghrunt, geiyrt neese dy chooilley nhee ;
 Jeh'n vree shoh nee mayd greïnyn caggee noa,
 Nyn 'oï nagh shass yn phooar dy row rieu bio.

Gys obbyr, eisht, lhig goll dy chooilley laue,
 As jeeagh nagh bee ainle beg ny mooar ny haauë ;
 Cleiy-jee dy dowin 'syn undin foddey heese,
 As cur-jee lhieu'n ooir verchagh follit neese,
 Lesh aile cheh niartal jean-jee'n ooir shen 'ltheie,
 As stoo breeoil as yindyssagh hig veih ;
 Feddanyn liauyr as lajer jean-jee jeh,
 Tilgit ayns moulyn, choud's ta'n stoo roie cheh ;
 Ayns y chione dooint towl beg shegin faagit 've,
 Cour cuirtlagh aileagh, dy chur slane livrey
 Da sp'ryd doo dewil pryssoonit ayns y ghrunt,
 Freilt sthie er niart, fo trimmid corrym runt :
 Agh lesh un drillin, brishee eh'n pryssoon
 (Myr Ooilley-niartal) trooid y dorrys coon,
 Er skianyn Leah ; cur lesh spreih as scaalhean
 Mastey ny noidyn : as da'n armee ain
 Gastyrt raad-mooar. Coyrle Satan hie er goaill
 Lesh un aigney, as ooilley hie er-sooyl
 Fo'n thalloo sheese, as nish lesh obbyr chion
 As schleï sp'rydoil, hug ad yn saase gys kione ;
 Ny greïnyn curstey jeant ayns earroo mooar,

As soit er queeylyn siyragh jeant nyn gour :
 Hie'n armee ooilley reesht er tayrn ayns doaie,
 Ayns treishteil share dy chosney na v'ad roë.

As nish yn oie er hea veih soilshey'n laa,
 As obbyr churstey'n dor'ghys aarloo, tra
 Honnick ny Miallee'n noid er haglym reesht,
 Slane fo un chione, myr rieu nagh row ad brisht ;
 Cha row Miall gyn smooïnaght er shoh roë,
 As shen-y-fa v'eh aarloo jeant nyn 'oï.

Jee Ooilley-niartal (va fys oc) hug daue
 Jea'n varriaght, as jiu veagh, neesht, ec laue
 Dy chooney lhieu ; 'sy chredjue shoh treishteil
 Vrish ad y champ, as hayrn ad magh nyn guail ;
 Ny Satanee, neesht, moyrnagh ass nyn booar
 Ghooghyssagh hene, haink seose ayns daanys mooar ;
 Tayrn lhieu'n saase-mollée, follit ayns nyn mean,
 Cour olk gyn-yss, myr chlinnys shiu ny-sheyn.

Yn Ard-hraitoor hene hass, eisht, magh veih 'ghri,
 Dy v'er ny chlashtyn liorish mie ny sie,
 As lesh beal foalsey craidagh dooyrt eh roo :—
 Vraaraghyn dooie ! nagh nhare dooin (roish vees jiu
 Cha dewil as jea) coardail ve jeant rish Jee
 Er gruntyn noa : as Niau ve reesht ayns shee ?
 As Viallee (dooyrt eh) chaghteryn ver-yms hiu,
 D'insh ny conaantyn baillym gheddyn veue.
 Shoh graït ; yn armee scugh eh magh veih'n vean,
 Gys jesh as toshtal, faagail cagliagh lhan
 Brah'n earroo mooar dy ghreïnyn Satanagh,
 Nish aarloo lhieent va dy ve folmit magh
 Fud Ainleyn Yee ; as sp'rydyn daaney'c laue,
 Rish hun dagh feddan, dy chur drillin daue.

Aile ! dooyrt y Dragon ; myr va'n fockle graït,
 Jeh'n chuirtlagh aileagh va'n smayl curstey craait ;
 Ny sp'rydyn keoë va dooint ayns dagh pryssoon,
 Ooilley ayns aile, vrish trooid ny dor'syn coon,

Coamrit ayns aile as jaagh, ny vodjal chiu,
 As feiyr myr taarnagh agglagh goll magh lhieu,
 Geiyrtroue ny buill hrome va sthie er nyn mooin,
 Trooid armee Viall, cur ooilley bun-ry-skyn ;
 Aile, jaagh, as feiyr v'ayn, myr streeu quoui oc smoo
 Yinnagh misreill as coayl da'n cheshaght Noo ;
 Foast, magh-veih atchim, cha row coayl cheet lhieu,
 Agh veih ny chaght'ryn v'ad dy lhiggey voue.

Ny eillaghyn va daue moorarane cumrail,
 Erbey ad shen by-eddrym ve scapail
 Dagh bullad bieau ; son aashagh te da sp'ryd
 Eh hene caghlaa (cordail rish traas as ynnyd)
 Gys cummey erbee : agh nish va feiy dty reayrt
 Fileyn as rankyn brisht, ec yn un cheayrt ;
 Thousaneyn heeagh oo bounsals seose 'syn aer,
 As millaghyn reesht cooyl nyn ghing er laare,
 Yn soilshey gial rell cullee ghoo y cheau,
 As undin niau, myr agglit, va er-creau.
 Ny Satanee lesh gearey's craid ren geam—
 Kys ta ny chaght'ryn ain cur orroo lhiem !

Cre yinnagh ad ? stiagh er y noid dy roie
 Cha beagh eh keeyll ; son aarloos va dy chloie
 Reesht yn nah frass ghewil veih'n taarnagh cheddin :
 As veih dy hea, ny dy hyndaa nyn eddin,
 Ve scammylt smoo. Nish Satan tastagh va
 Cre'n stayd v'ad ayn, loayr reesht ayns foalsagh, gra :—

Cheayll ooilley Niau dy heb mish roo choardail
 (Chea noidys smoo) tra hayrn shin seose nyn guail,
 Cha dug ad geill, chamoo hug ad ansoor.
 Myr nagh beagh lhieu shin hene ny mooads nyn booar ;
 Un taarnagh smoo (voymys) ver nish dauesyn fys
 Quoi'n Ooilley-niartal t'ayns pooar, Jee, ny mish ;
 Nyn gredjue faase nee ad dy Leah Hreigeil
 Marish Messias, ayn t'ad wheesh treishteil.

Agh jeeagh cre'n mart ta'n Ooilley-niartal Jee

Fordrail da Ainleyn, 'skyn cretoor erbee !
 Choud as va'n noid broghe myr shoh boggyssagh
 Ass hene, as ass e haaseyn iurinagh ;
 Cha leah as smooinght ren ny Miallee goll
 (Ayns e chree hene v'ec dagh sidoor e choyrle)
 Gys dagh slieau ard as cronk, as ass nyn mun
 Raip ad ad seose, mârish ny v'er nyn mooin
 Bildalyn ooasle, biljyn lane dy vess,
 As awinyn palchey roie dy shliawin gys nish ;
 V'ad pluckit seose dy aashagh ass nyn vraue,
 As tilgit voue, myr veagh whilleen clagh-laue,
 Er feiy ny noidyn, plooghey ooilley foue
 Choud as raink ad, as mooads nyn ghreïnyn lhieu,
 Lesh atchim-cree ny noidyn trooid va roight,
 Fakin ny croink as sleïtyn getlagh cheet
 Slane myr v'ad jeant ; as chyndaa seose 'syn aer,
 Chroym ad dagh errey v'oroo sheese er 'laare,
 As scolt' ad hene lesh lhieggey er nyn mooin,
 As broojit fo ; nyn armyn creoï cur guin,
 Torchagh as pian, myr v'ad brisht stiagh ayndoo,
 Lesh trimmid vooar, ga tanney ta nyn stoo ;
 Nyn ghooghys ainleagh hug daue'n vondeish shoh,
 Ga v'ad wheesh broojit, foast veih haink ad bio :
 Agh plooghit fo va saase y taarnagh mollee,
 Nyn eïllaghyn, as slane nyn ghreïnyn caggee.
 Veih'n dor'ghys doo, gys soilshey gial er jeet,
 Dy choamrey'n magher reesht v'ad ooilley eït ;
 Agh laccal armyn, sleïtyn hie er goaill,
 Myr ghow ny Miallee ; Satan hug y choyrle :
 Nish hee oo sleïtyn tilgit noï ry hoï
 Ard heose 'syn aer, as faagit heese nyn yeï
 Ooigyn dowin agglagh raad v'ad roïe nyn soie.
 Eddin ny maynrys aalin v'er ny vhilley,
 As bun-ry-skyn, myr naardey veagh goll ooilley ;
 As naardey veagh 'bey'n Oilley-niartal Jee

Soit mean y ghloyr vooar, as towse magh dagh nhee
 Lesh briwnys kiart ; pointeil ad heet gys kione
 'Naght myr v'ad kiarit, my row Ainleyn ayn.

Hur eh da'n noid, choud shoh, dy hassoo magh
 Lesh armyn dewil, as lesh goan mollaghtagh,
 Fegooish ve brisht ; dy voddagh onnor smoo
 'Ve ec Messias, na ec y slane croo.

Ynrican dasyn dreill eh ooilley'n ghloyr
 Dy vrishey, as dy chastey, mooads y phooar
 V'ec yn ard-noid, 's dy eiyrt ny Satanee
 Veih stayd ny maynrys ; as dy chur slane shee
 Da'n armee Noo ; as myr shoh loayr y Jee :—
 Hoilshean ny ghloyr, my Vac deyr shynney lhiam,
 M'ynrican ghraih, as eirey er ny t'aym,
 Daa laa, dy laghyn flaunyssagh, t'ec kione
 Neayr's hie Miall bannee as e heshaght voïn
 Noi'n irree-magh ; as dewil, dewil t'er ny ve
 Yn cah sp'rydoill ! as cha nee yindys eh :
 Tra ren daa noid co-cor'm ayns pooar meeiteil ;
 Corrym v'ad jeant, agh peccah cur failleil.
 'Sy derrey yeh, t'eh ny s'annooney gaase,
 Ga fegooish tastey foast : son myr ta grayse
 Failleil, ta'n cree ayns niart gaase, neesht, annoon,
 Foast ta mish surranse ; agh cha vel pardoon
 Kiarit nyn gour, chamoo ta eddin oc
 Dy chaayney eh, nyn gooinsheanse hene cha olk.

Veih shoh nyn noidys ghewil nee tannaght choiee
 Er graih cooilleen, as choiee cha bee ad skee.
 Armyn feer joarree t'ad er gheddyn magh,
 As ooilley'n twoaie gloyroil t'er hurranse cragh ;
 Sleityn noi sleityn, croink noi cronk t'er chloie,
 As ooilley gys meereiltys eajee roie.
 'Syn eulys cheoie shoh nish ta ceaut daa laa,
 As dhyts ta'n trass freilt gys mooads ooashley braa ;
 Yn onnor shoh ta mish dty chour er hashtey,

Dy nee oo nee'n noid as e phooar y chastey.
 Bree Ooilley-niartal (foast ny oï nagh dod
 Pooar erbee shassoo) skeayl mygeart y mood.
 My Vac, Smoo-niartal, immee ayns niart dt' Ayr
 As stiure my wheeylyn agglagh trooid yn aer ;
 Ny queeylyn aym's nee undin niau y chraa,
 Bwoalley ny noidyn ayns un atchim braa ;
 Gow'n taarnagh agglagh, as ny chentyn bieau,
 My ghaghyn aileagh, as my chorree lhieu ;
 My chliwe gyere, my vhow ta lhoobit creoi,
 Greïnyn barb caggee aarloo aym nyn oï :
 Gow uss ad ooilley. Myr shoh loayr y Jee,
 As er e Vac deyr gheayrt eh magh e vree
 Ayns goullyn sollys d'hoilshey gial gloyroil,
 As ersyn lhiann eh'n jalloo slane Ayroil.

Reesht dooyr't eh rish ; Uss Ooilley-niartal ta
 Cast y traitoorys : lhiats, lhiats vees y laa,
 Imman dty noidyn magh veih'n soilshey mooar,
 Gys niurin ghoo, ta fosley 'beal nyn gour.
 Eisht bee fys oc (agh anmagh) quoi eh'n Jee ;
 Quoi'n Ooilley-niartal eirey er dagh nhee.

Lesh meillyn booisal loayr Messias, gra,—
 Ayr Ooilley-niartal, Yee smoo cairagh ta,
 Myr ta dty chreenaght, myr shen ta dty phooar,
 Jeh'n irree-magh dy ghoail cooilleen dy liooar ;
 Agh dooys t'ou cur y phooar's y ghloyr shen neesht,
 As tra s'gooidsave lhiat ver-ym dhyt ad reesht ;
 Yn aigney ayds dy vishagh sthill my ghloyr,
 Yn vaynrys aym's dy ghloayragh dt'Ennym mooar
 Lesh biallys ; as pooar dty noidyn vees
 Dhyts son stoyl-coshey, injil tilgit sheese.
 Eisht bee dty Nooghyn (reaghit veih'n chioltane
 Ta hannah deyrit) gennal goaill arrane
 Dy voylley ard gloyroil as eunyssagh,
 As psalmyn millish, kiaull ving flaunyssagh

Hoods Ooilley-niartal ; hoods Yee smoo gloyroil,
 Share, s'creeney, s'cairal, 'skyn dagh graih graysoil ;
 Mish vees nyn mean, myr oardit foyds y kione,
 Goail Voïd my phooar's chyndaa gloyr er-e-hon ;
 Eisht myr V'ou hoshiaght, bee oo son dy bragh,
 Ooilley ayns ooilley : Un Jee firrinagh.

Shoh graït, as croymmey gys y phooar Ayroil,
 Ayns e laue yesh yn Clat·reill ren Eh 'ghoail,
 As fainagh-caggee niartal aarloo va,
 Er queeyllyn ard, aght mirrilagh chyndaa
 Jeu hene gyn tayrn ; dy uillian ad v'ayndoo
 Sp'ryd niartal bio, myr pooar y Chroodagh Noo ;
 Queeyl sthie ayns queeyl va roie, as dagh unnane,
 Goll-rish rollageyn va lesh sooillyn lane,
 As spreih lossey jiarg, chentyn-taarnee cheh,
 As dorrin agglagh, loayrt nagh voddym jeh.
 Kiare pooar'yn ard ayns cummey Cherubin,
 Shey-jeig (oh yindys !) v'oc dy eddinyn ;
 Kiare ec dagh pooar ; as va nyn gorp as eddin
 Chiu soit lesh sooillyn, ceau magh aile myrgeddin ;
 As roish yn ainagh virrilagh v'ad roie,
 'Naght myr v'ee stiurey, ayn va'n Ree ny hoie
 Er stoyl ard sollys, jeant jeh lheid y stoo
 Shen jeh hie chayr e Ayrey hene er croo :
 Coodagh dy hoilshey sollys v'er-e-skyn,
 As goullyn greiney scellal magh veih 'vun
 E vhow's 'hideyn, as stoyr e ghreïnyn caggee,
 As boltyn-taarnee jiarg v'er rish e lhiattee ;
 Thousane thousane dy Ainleyn v'er dagh cheu,
 Goll myr va'n ainagh reeoil scughey lhieu.

Myr shoh hie Jee yn Mac er e yurnah,
 Cha Leah as hoilshee soilshey yn trass laa,
 E ghloyr ghial v'er ny akin fodd's gerrit,
 Agh liorish armee Viall v'eh hoshiaght ennit ;
 As boggey mooar ren er nyn greeghyn lhieneey,

Dy voghe ad er nyn noidyn nish cooillooney.

Fo flag e vainshtyr, Miall Noo haggil stiagh
Ooill' e heshiaght vie phrow da firrinagh.

O cre'n chiaull ving va fud ny Ainleyn cloit,
Tra honnick ad 'syn aer Messias cheet !

Cherub cha sollys as v'ayns ooilley Niau
Cheet getlagh roish, as gymmyrk ayns e laue

Yn cullee reeoil, bennalt jiarg as ard ;

Pooar Ooilley-niartal gastyrt roish y raad.

'Skyn ooilley, Miall Noo, lhieent lesh boggey mooar,

Haink quail y Ree's livrey eh seose e phooar

(Harrish e hroopyn, foast va ooilley slane),

Dy v'er nyn reill nish liorish yn Ard-Chiarn.

Ny sleityn raipit, as ny croink cur geill,

Ghow seose nyn ynyd reesht lesh goo e veeal,

As eddin niau ghow er e chummey cair,

Soilshey gloyroil ren getlagh trooid yn aer :

Fud ooilley'n aalid she'n Ree hene va'n reih,

Myr mill e ghoan graysoil va shilley veih ;

As myr shoh loayrt : Harvaantyn firrinagh,

Shiaght keayrtyrtyn bannit nish as son dy bragh,

S'maynrey nyn mea ta foast er v'reayll nyn stayd

Fo wheesh dy hurranse, noidys ghewil, as craid ;

Nyn gredjue lajer prowit trooid t'er ny ve,

Nish veih nyn seaghyn yiow shiu slane livrey.

Shass-jee dy akin cre'n drogh yerrey vees—

Cre'n kerragh trome hig er y vee-chrauee's :

Fegooish nyn gooney mish, my lomarcán,

Yiow'n varriaght, as ver y streeu gys kione.

Ny goan shoh grait ; cha row ny Satanee

Jerkal rish grayse ny myghin veih Mac Yee ;

Chiare ad dy hilgey ooilley yn cah s'jerree ;

Nee coayl ny cosney, cre erbee yn erree

Veagh orroo jeant : veih'n voyrn sp'rydoil v'ayndoo,

Nyn droo as goanlys bishagh ren ny smoo ;

As mee-hreishteil hug smooïnaght ayns nyn gree
 Dy voghe ad foast yn varriaght jeh Jee.
 Er shoh, nyn droopyn, haggil ad dy cheilley
 Dy hrial cairys eiraght un cheayrt elley.
 Nish ren Mac Yee e ghrooish (roïe kiune) 'chaghlaa
 Lesh jymmoose lostey, baggyrt kerragh braa ;
 Yn chiare skeayl magh nyn skianyn sooïllagh lhean,
 Dagh sooïll ceau magh stroo d'aile noi'n drogh hioltane :
 Lesh feiyr ny queeylyn undin niau ren craa,
 As roish e eddin bodjal d'aile chyndaa.
 Earroo 'skyn earroo boltyn taarnee cheh
 Cheau'n Jee magh roish, myr whilleen plague er-lheh
 Roie trooid nyn gree'ghyn, goaïll nyn dappey voue,
 Fiofhey nyn mree, 's cur atchim mooar ayndoo ;
 Jeh niart as aalid v'adsyn er nyn spooïlley,
 As jeant nyn sp'rydyn graney eajee ooïlley.
 Nearey as aggle mooar ghow orroo greim ;
 As nyn gooinsheansyn foiljagh ard ren geam,
 Bwooïshal ny croink as sleïtyn, roïe v'ad fo,
 Ve er nyn mooin reesht, 's gyn scapail voue bio.
 Yn Croodagh niartal hug daue lheid y phooar,
 Dy ghoaïll shen reesht voue v'echey pooar dy liooar ;
 Dy chooïlley ghioot mie v'oc h'er roostey jeu,
 Ny v'oc dy olkys hie er lhiggey lhieu.
 Jeh grayse as gloyr nish foll'm, yn slane shioltane
 Va roish Mac Yee immanit, myr unnane,
 Gys voal ard niau, ren jeh hene rowlal stiagh
 Cur doarlish lhean da'n olk eebyrit magh
 Veih beinn ny ghloyr, veih mie as maynrys veayn,
 Gys ream y dor'ghys, torchagh dewil as pian.
 Honnick ad nish, yn red nagh chreid ad roïe,
 Pooar er nyn skyn, as kerragh er nyn oaie.
 Trooid diunid feayn beign daue yn lhieggey 'ghoaïll
 Gys niurin ghoo, va ceau seose aile nyn guaïll ;
 Yn dor'ghys chiu, ny hrooid sheese v'ad rouaïll,

Cheayll yn eam agglagh myr v'ad goll er-sooyl ;
 As myr veagh niurin agglagh, dy row Niau
 Slane tuittym sheese, ve ooilley ayns un chreau,
 Greinnagh yn aile dy lostey seose yn stoo
 Veih'n faarkey beayn dy vrimstone lheiht va fo.
 Nuy laa v'ad tuittym, ta fir-ynsee gra,
 My daink ad gys nyn ynnyd vaghee bra,
 Ream loam ny feoh ! ayn nagh vel nhee erbee
 Agh arkys, trimshey, sneih as brishey-cree :
 Roon, troo as goanlys, eulys ghewil as nieu,
 Aile niartal lostey, jaagh as dor'ghys chiu.
 Foll'm jeh foays v'ad, agh jeh olkys lane,
 Kinjagh nish gee er cooinsheanse dagh unnane ;
 Nyn stayd dy vaynrys vooar va caillit choiee,
 'S dy chosney reesht eh v'ad gyn saase erbee.
 Ny Nooghyn bannit honnick nish cre'n kione—
 Cre'n jerrey agglagh haink er cloan ny moyrn.

Myr shoh va'n drogh-yeih eebyrit ass Niau,
 As ooilley'n peccah broghe, banglane as fraue.
 Flaunys ghow boggey ; as y doarlish lhean,
 Ny hrooid hie'n noid magh, ghooïn seose reesht jeh hene ;
 Ainleyn gial Yee, ren fakin ooilley'n traa
 Yn obbyr niartal, hug ard-voylley da ;
 Lesh kiaull as bingys hie ad dy veeiteil
 Yn Ree gloyroil lane ooashley cheet nyn guail,
 Crownit lesh pooar, as barriaght gloyroil ;
 Hyndaa ad mârish gys y stoyl reeoil,
 Raad t'eh ny hoie er laue yesh 'Ayrey hene,
 As Niau ayns shee nee farraght dy braa beayn.

Yn rollage yial, ard-hollys, Lucifer
 As e heshaght, myr hug shiu roïe my-ner,
 Veih gloyr as maynrys vannee tilgit magh
 Gys dullyr ghrouw, as dor'ghys son dy bragh,.
 Nyn aalid yial, nyn ghloyr ard, as nyn niart

Fioghit as naardey ; caillit ec un cheayrt :
 Son mooads nyn moyrn, ayns girree-magh noi Jee,
 Gobbal e Vac ennoil y ghoaill son Ree.

Cur-jee, nish, kied dow loayrt my smooinght hene,
 Cre vel yn ream doo ayn t'ad surranse pian ?—
 Ass y dowin vooar, tra hie yn theihll er goaill,
 Cha nee mooarane dy room veih hie er coayl,
 Ayns soylagh jeh ny va foast faagit ayn ;
 Son fegooish towshan te, as fegooish kione,
 Dowin as ard ta'n eaynagh shen, as lhean,
 Gyn grunt, gyn eaghtyr, te gyn oirr, gyn mean.
 Dy baillish Jee thousaneyn smoo dy heihill
 Y chroo, cha jinnagh roomyn daue failleil ;
 Cha vod yn Ynsagh soylagh 'gheddyn da,
 Agh y vea veayn shen t'er ny enmys braa.
 Dorraghys t'ayn, son cha vod pooar y ghrian,
 Eayst, ny rollage, eh 'roshtyn lesh soilshean.
 Erskyn dagh gioot, stow mieys Yee er seihill,
 She'n soilshey smoo ta freayll ad veih mee-hreishteil ;
 As eisht yn eaynagh ghoo shoh, laccal shen,
 Shegin ve feer whaagh, grouw, eajee as neu-ghlen.
 Ta'n Goo ginsh dooin jeh dor'ghys sodjey magh,
 Jeh ooig gyn grunt, as pian gyn aash dy bragh ;
 Ta shoh goll-rish y voayl broghe, kiarit va
 Er-son drogh-yantee, dooint seose ayn dy braa.
 Creenaght vooar Yee, nagh ren veg ayns fardail,
 Doardee'n dowin vooar shoh v'er ny aagail
 Ayns charvaal agglagh ghrouw, eajee as doo,
 Erskyn dagh seihll as nhee dy ren eh 'chroo ;
 Agh, gys e ghloyr hene, cour ny heebyrtee
 Dirree ny 'oï, as dob eh dy ve Jee.
 Da'n ainle mooaralagh, ynrick dy ve ny ree,
 Hug Jee reeriaght vooar agh dagh olk ayn-j'ee
 Gyn nhee ta mie ; dy reill harrish mooarane

Va, as ta lesh, as goaill eh son nyn jiarn.

Agh er-lhiam dy vel mee coayl my hraa
 Ayns scrieu jeh shen ta aggle ve gimraa ;
 Ny sleaie nee'm m'aigney hroggal reesht gys Niau,
 As fud ny Ainleyn bannee er dagh laue
 Ve sheshey gennal, kiaulleeaght's goaill arrane
 Gys y Messias niartal, Jee as Chiarn ;
 Chast y cah dewil, cur lesh yn varriaght,
 Hug shee da Flaunys nagh jig naardey vraght.

Tra ren ny Ainleyn firrinagh chyndaa
 Marish Messias, gys nyn eiraght braa,
 Kiaull eunyssagh va freggyrt gys nyn ghien ;
 Gloyr, booise, as bannaght gys Mac Yee nyn Jiarn.
 Eisht yn Ayr vannee, da nagh row gyn fys
 Cre woad caillit va, c'woad dreill nyn ynrickys,
 Fakin yn cheer rooisht jeh'n trass ayn dy sthock
 Dy heay gloyroil, loayr myr shoh rish e Vac :

Toig Vac, dy vel y noid mooar er vailleil
 Dy chosney'n phooar veagh echey, v'eh treishteil ;
 As ga ta tilgit mârish sheese whilleen
 As ren da lhiantyn arryltagh jeu hene ;
 Foast earroo mooar dy Ainleyn sollys ta
 Er-mayrn, dy yeeilley dooin nyn geesh gagh laa ;
 Dy lhieeney'n Chiamble ard lesh moylley feeu,
 Myr ta shin fakin ad dy yannoo jiu.
 Agh son nagh bee oyr echey boggyssagh,
 Dy vel eh'r spooilley'n reeriaght flaunyssagh,
 Trooid y phooar ayds seihll elley neem's, as ayn
 Nee'm cretoor aalin, troggit seose myr kione
 Harrish y clane, as jeh shoh hig ashoon
 Cairagh as glen, ayns earish dy heet hooin,
 Dy lhieeney reesht earroo ny Nooghyn caillit,
 As jerkal moal y noid vees myr shoh mollit.
 Shooill, uss Smoo-niartal, shooill ayns moodads dty phooar,

Gow'n jurnah luckee gys y diunid vooar ;
 Harrish yn eaghtyr skeayl-yms magh my vree,
 Ver dooghys bioghee ayns dy chooilley nhee,
 Ta mish er n'aarlagh hannah dhyts son shoh,
 Dy yannoo jeh ny ta dy v'er ny chroo.

Cha leah as ren yn Vieys ard coraa,
 Goo mie ny Creenaght hug slane ammys da,
 As boggey ghow ny Ainleyn flaunyssagh
 Dy row nyn earroo reesht dy ve jeant-magh.

Er y jurnah'n Goo niartal aarloo nish,
 Ooashley as Gloyr myr coamrey chiangle eh mysh,
 Graih, creenaght, pooar, as ooilley mieys Yee
 Va soilshean ayns yn Ooilley-niartal Ree ;
 Milley thousane dy Seraphim gloyroil,
 Cherubin skianagh, Foaysyn cheh graihoil,
 As troopyn doaïagh aarloo farkiaght er,
 Dy voddagh ad yn croo noa 'chur-my-ner ;
 Dor'syn ard Niau ren dasyn fosley lhean,
 Ny ogh'ryn bio chyndaa ny glish jeu hene,
 Orroo dy lhiggey magh Ree mooar ny Ghloyr,
 Goll nish dy chroo seihll noa lesh Goo e phooar :
 As veih beinn Niau honnick ad, foddey voue,
 Heese ayns y diunid vooar dagh shilley grouw,
 Fliaghey rish chyrmagh streeu, as bog rish creoi,
 Eddrym rish trome, as dagh nhee noï ry hoï ;
 Aile fud yn ushtey seiyt, fud ooir yn aer,
 Doo seiyt fud bane, ny vedlee bun-ry-baare.
 Cha bione da'n jiass y twoaie, nyn shiar y sheear,
 Va'n grunt gyn eaghtyr, as y mean gyn oirr ;
 V'ad gatt veih'n ghrunt lesh geayghyn stermagh keoië,
 As tonnyn sleitagh gys yn yrjey cloie.
 Shee ! dooyrt y Goo ; chelleeragh daase eh kiune,
 'S ny tonnyn agglagh injil chroym nyn gione.

Eisht er queeylyn sollys e Ayrey hene,

Ghow eh sheese foddey trooid y folmid feayn ;
 Markal y mean magh ; hoie eh'n derrey chass
 Jeh'n chumbaase ooir, kiart rheynn yn twoaie veih'n jiass,
 Yn shiar veih'n sheear, as chyndaa chymmylt cruinn,
 Howse eh ny seihll cruinn, nish ta shirveish dooin ;
 Gra rish dagh seihll, She choud shoh vees nyn dowse
 Chymmylt mygeayrt, as choud shen sheese as seose.

Va dor'ghys harrish ooilley'n diunid reill,
 Agh sp'ryd mie Yee er baare yn ushtey skeayl
 E skianyn bioghee, cur bree as troshid cooie
 Ayns brein dagh rass, dy ymmyrk magh e ghoocie.

As eisht dooyrt Jee, Nish lhig da soilshey 've,
 Shoh grait, yn soilshey veih'n vulk vooar ren shea,
 Myr getlagh seose dy ard, ny vodjal lheap,
 Har girree hoshiaght, 's gys y sheear soilshean ;
 Son grian gloyroil cha row foast er ny yannoo,
 Naght myr t'eh jiu, cur soilshey er y thalloo.

As honnick Jee dy row yn soilshey mie,
 As ren eh'n dor'ghys doo y scarrey veih :
 Myr shoh yn fastyr as y moghrey va,
 'Sy toshiaght, oarderit dy ve'n chield laa ;
 Chamoo va'n laa shoh fegooish gennallys :
 Ny ainleyn sollys va kionefenish nish
 Heb oural fastyr 's moghrey, neesht, gys Jee,
 Hayrn lheid y soilshey mooar veih dooid ny hoie.

As yn nah cheayrt, dooyrt Jee, Lhig da ve jeant
 Ayns mean ny ushtaghyn mooar firmament ;
 Cagliagh feer loor, dy reayll ny ushtaghyn
 Soit foddey heose, myr faarkey er-e-skyn,
 Veih shen ta fo, nagh duitt ad kione-y-cheilley,
 As ynyyd mie yn bildal noa y vhillley.
 Yn firmament shoh, kiaddit er-son rheynn,
 Chroo Jee jeh aer, stoo eddrym, sollys glen ;
 As ve sheeynt magh chummit runt ny cruinneey,

Dy row dagh folmid feayn lesh er ny lhienny.

Shoh, shoh'n aer vannee, ny hrooid ta sheelnaue,
 As dagh cretoor bio, getlagh, shooyl as snaue.
 Te eddrym, thanney, sollys, glen as glass
 Da'n reayrt dy akin trooid, da'n skian, da'n chass
 Dy ghoail nyn raad lesh aash, fegooish cumrail,
 Son scughey voue te myr t'ad cheet ny whail ;
 As foast ta'n aer gglass hanney shoh shirveish
 Son cagliagh fondagh eddyr heose as heese,
 Dy reayll ayns sauchys ny ta er dagh cheu,
 Veih'n derrey yeh'n jeh elley y chur mow :
 As denmys Jee yn firmament shoh niau,
 Myr shoh yn fastyr as y madran va
 (Ayns towse y traas shen) jannoo'n derrey laa.

As myr ta'n oikan ayns y vreïn ny wane
 Fliugh, ny phrysoonagh, fegooish cummey slane,
 Gys hig yn imbagh da ta dooghyssagh
 Son aase as bea, dy v'er ny ymmyrk magh.
 Myr shoh (foast aeg) va'n seihll thalloonagh soit
 Ayns breïn ny ushtaghyn mooar harrish skeaylt,
 Gys doardee'n Goo ad ny neesht v'er ny scarrey :
 Ny ushtaghyn, er-lheh, dy ve seihll marrey ;
 As y seihll ooirrey (myr v'eh appee) nish
 (Yn imbagh lhieent) dy heet magh chyrrym rish.
 Ny ushtaghyn yeeagh da nyn miallys,
 Ayns tonnyn glassey brishey sheese dagh slys' ;
 Dagh thooilley goail ny raaidyn da by-niessey,
 As tuittym rowlal lesh y varroo-lhiegey ;
 V'ad myr dy beagh ad ooilley streeu quoi smoo
 Yinnagh lhieu cooney gys y randivoo.

Nish, nish ny sleityn meayl hrog seose nyn maare,
 Ny croink nyn lurg, goail boggey ayns yn aer,
 Nyn moandyr ghoonie ; skeayley mygeayrt y moo
 E skianyn lhan, cur chiass breeoil ayndoo ;

Eisht haink ny skyrtyn ooirrey rish, as lhieu
 Ny coanyn injil, as glionteenyn foue,
 Awynyn cam-jeeragh shliawnagh rish dagh broogh,
 Roie lesh nyn geeshyn gys yn aarkey yoogh ;
 Da h'er sinkeil sheese lhiabbee lhean as down,
 Cour ooilley'n chaglym mooar dy chummal ayn ;
 As denmys Jee yn thaloo chyrrym, ooir,
 As chaglym mooar ny ushtaghyn, y mooir,
 Eisht doardee Jee yn ooir dy ymmyrk faiyr,
 As luss gymmyrk rass rere e ghooghys cair ;
 Yn billey messoil, neesht, dy ymmyrk mess,
 Lheid as t'ayn hene, cheet ass yn ooir neese lesh.
 Cha ren y Goo Smoo-niartal shoh y ghra,
 Ny s'leaie ny hug yn ooir biallys da ;
 Va ee roie corp rooisht, eajee, lhoam as quaagh,
 Screbbagh, meayl, jiarg, ayns shilley feer neu-waagh,
 Agh nish e heddin ooilley choodee'n faiyr
 Geayney gloyroil ; goit myr dy ve'n daah share
 Son grunt dy obbragh daaghyn elley er,
 Aalin son reayrt y tooill dy chur-my-ner.
 Eisht daase dagh luss seose as nyn mlaaghyn lhieu,
 Jeh whilleen cullee nagh vel coontey jeu,
 Ny enmyrn orroo. V'ad shoh ooilley soit
 'Sy gheayney glen, 'naght myr veagh pearlyn reiht,
 Dy vel ee coamrit harrish ny s'gloyroil,
 Na ta'n Ven-ree s'mooaralee t'ayns y theihll.
 Eisht ass yn ooir vrish magh dagh dooghys billey,
 Doaltattym cheet aght mirrilagh ayns shilley ;
 Hoshiaght daa ghuillag virragh, hanney, veein,
 Roie seose ayns slat, myr hee shiu ayns un vlein,
 As shoh chelleeragh daase dy ve ny chroan
 Mooaralagh, troggal seose 'syn aer e chione,
 Skeayley 'vanglaneyn duillagh magh dy lhean,
 Myr whilleen skian freayll fastee gys y vean,

Dagh billey messoil lesh mess laadit va,
 Ec yn un cheayrt lane duilley mess as blaa ;
 Ayns shoh hee oo ny biljyn-feeyney lane
 Dy smeir hrome appee, loobey dagh banglane ;
 Ayns shen ny biljyn-orange, lemon, ooyl,
 Peeyr, plum, fig, shillish, streeu gyn ve er-gooyl ;
 Ayns ynyd elley, gum as spiosyn deyr,
 Nutmeg, cloaveyn, pibbyr, frankincense as myrrh ;
 Cassia, aloes, mace as cinnamon,
 Dagh mess gaase er biljyn ny thammagyn ;
 Dagh dooghys ooir share va j'ee dooghyssagh,
 Ren lheid ny biljyn cheddin 'ymmyrk magh.

Coanyn as skyrtyn, eisht, as magher kiart,
 Dymmyrk nyn voays dy arroo ec un cheayrt ;
 Myr shoh va'n thaloo fo e coamrey slane,
 Gloyroil as aalin ayns dy chooilley aym.
 Cha doardee Jee foast fliaghey dy heet neose,
 Agh kay ghruightoilagh veih'n ooir d'irree seose
 Dushtee e heddin, as chamoo dooinney va
 Dy obbragh ee, son ersyn cha daink traa
 Dy v'er ny chroo : as liorish Jee h'er jannoo
 Dagh luss, dagh plant, roish daase eh ass y thaloo,
 As mie honnick Jee dagh nhee jeu shoh va ayn ;
 Myr shoh yn trass laa ren fastyr's madran.

As reesht dooyrt Jee Lhig soilshaghyn y ve
 Ard ayns yn aer, dy scarrey'n laa veih'n oie,
 As lhig daue shoh son cowraghyn tastoil,
 Son imbaghyn as bleeantyn, v'er nyn ghoaill ;
 As ayns aer niau lhig dauesyn heose ve soit,
 Dy vod nyn soilshey er y thaloo cheet.
 As chiaddee Jee myr shoh daa hoilshey mooar,
 Mooar ayns nyn ymmyd, mooar neesh ayns nyn booar ;
 Yn derrey yeh jeu shoh dy reill y laa,
 Dy reill yn oie ghoo yn jeh elley va.

As ny rollageyn ren eh, neesht, y yannoo,
 Ard soit 'syn aer son soilshey er y thalloo.
 Dagh soilshey jeu dy voddagh, ayns nyn draa,
 Reill kiart y chummal harrish oie as laa.
 As mastey ooilley ny ren Jee y chroo
 Fo flaunys ard, she'n ghrian yn cruinney smoo ;
 Hoshiaght jeant dorragey, agh foast dooghyssagh
 Dy ghoail y soilshey ayn h'er deayrtey stiagh,
 Veih'n chaglym palchey shen dy hoilshey va
 Scart veih'n vulk mirrilagh, yn chield laa.
 Ta'n ghrian corp aileagh, sollys, gial, gloyoroil,
 Breeoil as cheh, cur niart aasoil da'n theihll,
 Cham's soilshey ; eisht ren eh'n eayst chaghlaae,
 Caghlaa e grooish, myr veagh ec lhieeney's traie ;
 Gyn soilshey t'ee liorish e dooghys hene,
 Agh myr t'ee geeasaght soilshey gial veih'n ghrian :
 Ad shoh ny neesht, dagh unnane ayns e hraa,
 Fer reill yn oie, fer alley reill y laa.

As ny rollageyn hoie eh heose 'syn aer,
 Ny shlee na oddys sooill y chur-my-ner ;
 Paart beg, paart mooar, soilshean er-lheh ayns gloyr,
 As ooilley soilshagh schleï e chroodagh mooar.

Agh corp ny greiney aileagh kiaddit nish,
 Hoshiaght 'sy shiar haink gloyr e eddin rish,
 Goullyn gial sollys magh veih ren soilshean,
 Gagglagh yn dorrageys gys e reeriaght hene ;
 Myr dooinney lajer, t'eh goaill y yurnah
 Lhiurid yn aer, as farkiaght er ta'n laa ;
 Dagh blaa, dagh posee, t'er y thalloo wass
 Skeayley nyn ghuilley gennal ayns y chiass.
 As myr ta'n eayst ny s'inshley soit 'syn aer,
 Gys fakin haink ee hoshiaght ayns y sheear,
 As freayll y ghrian yial kinjagh ayns e shilley,
 Myr smoo t'ee ayn wheesh shen smoo t'ee s'gilley ;

Milley thousane rollage mygeayrt y mo'ee,
 Myr whilleen cainle noi dorraghys ny hoie.
 Jeh stoo thalloonagh ta'o eayst er ny yannoo,
 Neu-ghooghyssagh son soilshey, myr ta'n thalloo :
 Agh wheesh dy yillid as t'ayn-jee soilshean,
 Ta tilgit urree veih gloyr vooar y ghrian :

Yn aght myr hee mayd claare ta scoirit glen,
 Cummit kiongoyrt rish gah ny scell y ghrian,
 Tilgey scaa bane, myr eayst yial er y voal,
 Ny er y scraa, yn dooghys nagh vel gial,
 Foast lesh yn soilshey yeeassit ta ayn-jee,
 Ayns kiartys corrym, t'ee reill reeriaght ny hoie :
 Myr shoh'n sollys rheynnit veih'n dor'ghys va,
 Fastyr as moghrey ren y chiarroo laa.

As dooyrt Jee ; Lhig da eeastyn v'er nyn gheddyn
 Ayns ushtaghyn ; eeanlee 'syn aer myrgheddin.
 As ren y Goo ny whaleyn mooar y chroo,
 As snauee shliawin, as eeastyn smoo as sloo ;
 As ren ny ushtaghyn ad 'ymmyrk magh,
 Palchey dagh sorch myr ve da dooghyssagh.

As nish ny hawinyn as ny strooanyn,
 Dagh pouyl, dagh logh chamm' as ny faarkaghyn,
 Ren swarmal lesh dagh dooghys lheh-myr-lheh,
 Ayns lheid yo earroo's nagh vel coontey jeh.
 Yn skeddan glass ayns scullyn palchey cloie,
 As cowrey'n lieen trooid oilley 'choamrey roie ;
 Ny muckyn-marrey, sharkee, 's moddee yoogh
 Dy helg eh magh, as jannoo er dy soogh :
 Ga ta dagh eeast mooar stroie jeh shoh whilleen,
 Foast sleityn jeh ta faagit cour y lieen.

'Sy diunid vooar ta'n Leviathan snaue,
 Yn cretoor smoo as s'agglee ren e laue,
 Casley rish uinnagyn y vadyran
 Ta 'hooillyn sollys lossey ayns e chione,

Ass e veéal lane drillinyn d'aile spreih magh,
 As veih e stroanyn bodjallyn dy yaagh ;
 Magh er e strooh t'eh deayrtey faarkey slane,
 Roïe ren eh 'hoo trooid dorrysyn e ghrooane ;
 Myr y chlagh-wyllin ta 'chree moyrnagh creoï,
 As craidey t'eh mysh cliwe gyere ny shleïy ;
 Cha jean eh soiagh smoo jeh yiarn ny prash,
 Ny yinnagh oo jeh stubbyl fo dty chass ;
 Tra t'eh snaue ta'n faarkey stermagh gatt,
 As cloie myr ushtey scoaldee ayns y phot.
 Jeh mirrilyn yn Ooilley-niartal Jee
 'Sy diunid vooar, she'n eeast mooar shoh yn ree.
 Ta cooid dy eeastyn bishagh liorish spoawn
 Oghyr as mulg ; as jeu cooid elley t'ayn,
 Myr eeanlee, breh nyn ooh 'sy gheinnagh heh,
 As voue shen cheet yn dooghys t'ad hene jeh.
 As myr ren eeastyn bishagh ayns y vooir,
 As ayns dagh awin myrgeddin 'skyn yn ooir :
 Ayns yn aer foshlit, eeanlee bishagh ghow,
 Dagh cronk, dagh dress, dagh billey, as dagh croww,
 Keylljyn as coanyn ooilley swarmal lhieu :
 Cha Leah as skeayl sp'ryd casherick Yee e skian
 Harrish y dooghys shen jeh haink ny heïn,
 Bodjallyn eddrym skianagh dirree seose
 Ard ayns yn aer, by-leah lhieu dy heet neose
 Reesht gys y laare, gys va nyn skianyn skee,
 As dooghys gysagh daue dy haglym bee :
 Tra v'ad jeant-magh cha row orroo kiarail,
 Son laa-ny-vairagh, foillagh y spaarail ;
 Agh jannoo kiaull, nyn soie er dagh banglane,
 Cur moylley feeu da'n Croodagh lesh arrane,
 Myr t'ad er n'yinsagh veih nyn dooghys ghooie,
 Dy chooilley horch coraa myr ta da cooie,
 Gys hig yn anmys ; eisht clynnee oo'n lhon

Kiaulleeaght bingys ayns dagh broogh as glion.
 Yn kellagh ooasle, gynsagh dooin cre ta
 Yn oie goll shaghey ; t'eh towse magh y tra,
 Doostey'n lught-thie dy vod ad cooinaghtyn
 Er Jee, as booise 'chur son e vannaghtyn.
 Myr shoh va aer as ushtey, neesht, jeant magh
 Lesh ny cretooryn va daue dooghyssagh :
 As eisht fastyr as y madyran va
 Er chur gys kione obbyr y wheiggoo laa.

Yn cheyoo laa ren toshiaght dy heet stiagh,
 Tra dooyrt Jee rish yn ooir, Dy ymmyrk magh
 Yn cretoor bio, snauee as ollagh, beiyn,
 Maase, as dagh sorch jeu rere e ghooghys hene.
 Cha Leah as loayr y Goo vrish y thaloo magh,
 Livrey dagh baagh as maase, da dooghyssagh ;
 Rere nyn dooghys hene v'adsyn er nyn yannoo,
 Dagh cretoor t'ayn dy vel bio er y thaloo.

As er-lhiam, nish, dy row yn ooir er-troailt,
 Livrey [dagh baagh as maase da dooghyssagh ;
 Rere nyn dooghys hene v'adsyn er nyn yannoo,
 Dagh cretoor t'ayn dy vel bio er y thaloo.

As er-lhiam, nish, dy row yn ooir er-troailt,
 Livrey] magh seihtl dy chloan er yn un cheayrt ;
 Beiyn feie ny keyllagh, ollagh meein as maase,
 As ooilley bio, ayns nyn slane cummey's aase.

Magh ass y chroanane hee oo lion cheet,
 As streeu dy hooyl my row e chassyn soit ;
 Ayns y voayll shoh, va ass ny foaidyn gaase,
 As veih ny creaghyn brisht, ayns piyryn, maase ;
 Boayll elley'n feeaih ny eairkyn banglaneagh,
 Yn tarroo, 'n vooa, as y ghoayr geayshteenagh ;
 Ayns shen hee oo yn cheyrrey ollagh, ta
 Cur dooin nyn vastee chammah oie as laa.
 Ayns piyryn v'ad shoh ooilley er nyn yannoo,

As dagh bio elley gientyn ayns y thalloo.
 Yn Behemoth mooar ren Jee nish y yannoo,
 Yn cretoor smoo va foast shooyl er y thalloo,
 Myr prash ny yiarn e chraueyn lajer ta,
 As goll-rish billey ta 'amman juntagh craa ;
 Er-lesh dy n'iu eh awin ec yn un traa,
 As Jordan vooar y hyrmagh tra t'eh paa ;
 She eshyn smoo jeh ooilley raaidyn Yee,
 As foast yn faiyr myr dow t'eh goaill son bee.

Chamoo lhig Jee ny beishteigyn er-gooyl,
 Dagh nhee dy vel snaue, getlagh ard ny shooyl :
 Yn un chiarail ayroil va jeusyn ooilley,
 As va dagh dooghys jeu mie ayns e hilley.
 Yn sniengan beg ta tarroogh goaill kiarail
 Son traa ry-heet, e veaghey t'eh sauail
 Ayns thieyn-stoyr aghtal jeant, lesh mooads tooilleil,
 Spaarailagh t'ad nagh jean nyn stoyr failleil ;
 Yn shellan ooasle dhoan goaill sambyl veih,
 Agh lesh ny smoo dy chreenaght as dy schleï.

Yn ard-nieu, neesht, 'sy traa shoh hie er jannoo,
 Yn cretoor s'foalsey, s'croutee t'er y thalloo ;
 As jeh nieughyn ta ayn sorch ny gha,
 Yn snake, yn adder, as amphisbaena ;
 Jeh'n amphisbaena shoh, ta dooghys ayn
 Eillit lesh beal pyshoonagh ayns dagh kione ;
 Yn viper, basilisk, as crocodile,
 Lheid as ta mennick goll mysh ushtey'n Nile.
 Nee'n crocodile coraa myr keayne ben,
 Miolagh ny joarree d'akin quoi t'ayns shen,
 As tayrn er-gerrey gys raad t'eh ny hoie
 T'eh orroo lheim, as t'adsyn er nyn stroie ;
 As cooid jeu shoh ta tilgey veih nyn sooill
 Nieu dewil, ta marroo sleih ta lioroo shooyl ;
 As tra ta'n viper lesh e dooghys lane,

T'adsyn cha nieunagh dy vel dagh unnane,
 Jeu, giarey nyn raad trooid bolg nyn mayrey magh,
 Cheet stiagh 'sy theihll ayns aght neu-ghooghyssagh.
 Ta snauee ayn jeh lhiurid yindyssagh,
 Roauyr, mooar ayns corp, skianagh as pyshoonagh ;
 Dy loayrt jeh dagh cretoor, myr h'ad er jannoo,
 Cour ooir as aer, cour faarkey mooar as thaloo,
 Cha vel aym schleï ; chamoo te ymmyrchagh
 Dy gheddyn fys kys haink ad ooilley stiagh ;
 Agh ayns y toshiaght tra hie ad er croo,
 Cha row gall-varg, noidys, ny nieu ayndoo
 Gys dirree peccah, as eisht dagh cretoor
 Daase soor as noidagh, rere nyn dooghys pooar.
 Nish aer as ooir, as awynyn neesht va jeant-magh
 Lesh palchey bioee, va daue feer dooghyssagh.

Agh cha row foast yn cretoor ooasle ayn,
 Harrish yn slane croo, feeu dy ve yn kione :
 Cretoor nagh beagh er 'laare still soit e hilley,
 Lesh eddin chroym, myr v'ec ny bioee elley,
 Agh troggit seose e ghrooish soilshean lesh pooar ;
 As gaggyrts geill, myr keesh, veih dagh cretoor ;
 Tastagh jeh hene, neesht jeh 'churrym, as gys quoi
 Ta ooashley's booise cooie son dy chooilley vie :
 Veagh 'skyn bioee ayns creenaght schleï 's resoon,
 Wheesh as ta'n Croodagh mooar er-e-skyn hene.

Yn Ayr Ooill'-niartal eisht (ta ec un cheayrt
 Dagh nhee kionfenish) rish e Vac ren loayrt
 Ayns goan graysoil : Lhig dooin nish Dooiney 'yannoo
 Lurg nyn go-chaslys hene, as ayns nyn yaloo.
 Harrish eeast ny marrey, harrish eeanlee'n aer,
 Harrish ny beïyn ta gyndyr er y faiyr ;
 Harrish dagh bio, as snauee, t'er y thaloo,
 Lhig dauesyn reill ; as ren Jee Dooiney 'yannoo
 Jeh stoo ny hooirey, joan ooir ghooghyssagh,

'S ennal y vea heid eh 'sy stroanyn stiagh.

Myr shoh dy ve ny annym bio haink Dooiney,
Yn cretoor b'aaley va er feai-ny-cruinneey.

Smooinee-jee nish cre'n stayd va'n Dooiney ayn,
Myr dooisht ass cadley, troggal seose e chione,
Gyndys er hene, er 'oltyn lneh-myr-lneh,
S'coan tushtagh foast cre'n dooghys v'eh jeant jeh :
Er y scraa ghlass hooar eh eh-hene ny lhie
Lane dy resoon, agh foast neu-hushtagh quoi
Hug da ny v'eh. Eisht yeeagh eh er yn aer ;
Troggal e chorp dy eddrym seose jeh'n laare,
E chassyn gastey ghleashee eh gys shooyl,
Gys roie, gys lheim ; gyn liaee cre'n raad v'eh goll.

Agh shirrey'n phooar hug ny va echey da,
Er-chee 'hirveish eh d'imlee ooilley 'hrea ;
Honnick eh eanlee kiaulleeagh er dagh crow,
As beïyn, nyn biyryn, gyndyr er dagh cheu ;
Ny croink, ny sleïtyn, coanyn injil's trah,
Dy berchagh coamrit lesh ny keeadyn daah ;—
Millish da'n soar, as eunyssagh da'n tooill,
Meein, neesht, as aashagh da'n chass-rooisht dy hooyl.
Dy chooilley nhee va chebbit gys e hilley
Bione da nyn ghooghys, as nyn enmyn ooilley :

As toiggal, neesht, dy row pooar er nyn skyn
Ren ooilley yn slane y chroo, chamm's eh hene,
Veih'n smooïnaght shoh e hengey ren coraa,
Feysht dagh cretoor Quoi hug ny v'echey da ?
Vaik ad y phooar vie ta cha lane dy schleï,
Cha feoiltagh, neesht, hug lheid ny giootyn veih ?
Dy voddagh eh jeeaghyn da yn arrym cooie
T'er bea resoonagh, d'eeck da'n Croodagh dooie.

Choud shoh resoon ; ny beïyn cha dug chyndaa,
Chamoo hug bio ny marroo freggyrt da.
Trubblit myr shoh, e lhiattee lhig eh sheese

Er lhiabbee vlaa, myr lhiggey er e skeeys.
 E chione daase trome, e chorp slane chaill e vree,
 As er e reayrt lhieen dorraghys myr oie :
 As nish er-lesh dy row e vioghys lheïe,
 As reesht chyndaa gys y stayd haink eh veih ;
 Va 'chorp ny chadley, agh e annym dooisht,
 Dagh pooar sp'rydoil va ayns e hilley rooisht :
 Honnick eh, trooid e chadley eunyssagh,
 Ny hassoo liorish aalid flaunyssagh,
 As dooyrt eh rish, Adam, cur nish my-ner,
 Mish ren dty chroo, as dou ta dt'arrym cair.
 Jee Ooilley-niartal mish ; my laue t'er yannoo
 Ny seihill, as ny ta ayndoo, bio as marroo,
 Uss y chied dooinney, as oo m'obbyr share,
 Da cloan ny cruinney ooilley vees oo ayr,
 Mish dty leeideilagh, irree as gow lhiam
 Gys cummal berchagh, dhyt ta kiarit aym :
 Eisht ghow yn ashlish bannee e laue yesh,
 As gys y shiar vooar hrog eh'n dooinney lesh,
 Gys gaar' dy eunys er cronk aalin soit,
 Liorish y Croodagh son yn oyr shoh reiht ;
 As chummit mysh va voalley lajer ard,
 As ayn as ass dy gholl cha row agh raad
 Va freilt still dooint dy creoi lesh lheid y duilley
 As va ny share na prash my cheeadoo filley :
 Dagh rheynn as allee trooid va tilgit jesh ;
 As er dagh laue ny biljyn trome lesh mess ;
 Dagh blaa, as posee, strappey ooilley'n grunt
 Ayns cruint, ayns roaghyn, as ayns kiarkill runt,
 Dy chooilley vlaa as posee feaï-ny-cruinney
 V'ayns shen, gys ymyyd, dooghys, daah as cummey :
 Millish da'n veéal v'ad, chammah as da'n stroin,—
 Yn tooill goaill taitnys ayns dagh daah va ayn.
 Ard heose 'sy vean va farrane palchey cloie,

Rheyntit dy kiart, ass ny kiare awinyn roie,
 Gushtagh yn gaar', as veih sheese goaill jurnah
 Trooid whillen cheer, 'naght myr ta'n Goo mie gra ;
 As ayndoo shoh ta er ny gheddyn airh
 As claghyn ooasle, as ny pearlyn share.
 Eisht Adam doostey, hooar eh firrinagh
 Ny dinsh da roie yn ashlish flaunyssagh ;
 As moods y vaynrys v'eh er akin roie
 Cha row eh veg gys ny va nish ry-oaie ;
 Hie eh dy ronsagh magh, trooid ooilley'n gaar',
 Son yn ard-vie stow lheid y vaynrys er ;
 As myr v'eh goll, ny messyn hug cumrail
 Trome er dagh bangan croymmey neose ny whail ;
 Hug foays ny messyn aeeyrys ayn gys bee,
 As dynsee dooghys da cre'n aght dy ee :
 Shoh'n traa yeeagh Jee e eddin vannee da
 Veih cheeid ny biljyn, as myr shoh coraa :—
 Adam, my vac, shoh mish t'ou uss dy hirrey,
 My laue t'er n'yannoo ny ta ayns dty hilley.
 Lhiats y slane gaar' shoh, lhiats neesht ooilley'n seihll
 Marish ny t'ayn, t'ad oardit fo dty reill.
 Foddee oo gee jeh mess dy chooilley villey
 Ta ayns y ghaar' ; rere myr nee dt'aigney shirrey ;
 Agh mess y villey gaase ayns mean y ghaarey
 (Jeh mie as sie cur tushtey), t'ou fo harey
 Nagh jean oo blastyn er, son ayns y laa
 Nee uss gee jeh, yiow baase, as ec shoh ghra
 E ghrooish, roie kiune, gys baggyrt ren caghlaa,
 Agh Leah gaase kiune reesht, doardee eh heet stiagh
 Ny bioee ooill', ayns piyryn dooghyssagh,
 Fenish Adam dy ghoaill nyn enmyn veih,
 Rere myr veih'n dooghys ocsyn ghow eh schleï.
 Trooid sarey Yee, haink ny creetooryn nish
 Kiongoyrt rish Adam, jeeaghyn biallys

Da nyn ver-reill, as cur nyn enmyn lhieu
Myr v'ad goll shaghey er dy chooilley heu.

Nish Adam fakin ooilley sheel y theihll
Cummal ayns piyryn graihagh, dooie, sheeoil ;
As foast eh hene agh lieh piyr ynrican,
Gyn aynagh cooie jeh'n vaynrays vooar v'eh ayn.
Veih'n lheimys shoh ren eh e oaie 'hyndaa,
Ginshlagh gys Jee Va still er-gerrey ; gra,—
O uss smoo niartal ! s'creeney, neesht, as share,
T'er chroo yn seihll's dagh nhee ta ennym er,
T'er hoiagh mish, 'skyn ooilley dy ve'n kione,
Foyd hene dy reill ny bioee ooilley t'ayn,
As hug oo dou leigh dy chur nyn enmyn daue,
Myr v'ad, ayns piyryn, cheet hym er dagh laue.

Phooar flaunyssagh ! cre'n aght hyndaa-ym booise
Hoods son dty yiootyng, ta whilleen as wheesh ?
O kys nee'm dt' enmys ta jeh lheid y phooar,
Jeh lheid y cheeayl dy yannoo'n obbyr vooar,
Nee ynrican dooys te ? cha vaik-ym quoi
Ta aynagh mâr'm jeh lheid y moods dy vie.

Da ynrican (strooys) nagh vod nhee erbee
Yn aigney 'lhieeney, fegooish sheshey cooie !
Eisht yn phooar vannee gys shoh hug chyndaa :
T'ou ynrican, c'wooad sloo dty vaynrays ta ?
Neeagh lhiat son sheshaght ? hee oo adsyn cloie
'Syn aer, 'sy vagher, as 'syn ushtey roie ;
Shione dhyt nyn ghooghys, toiggee oo nyn ghlare,
(Lheid as ta oc) myr t'ou er chur-my-ner :
Ooilley fo dty phooar, as gys dty ymmyd jeant,
As eisht son sheshaght cre'n oyr t'ayd dy phlaiynt ?

Lesh arrym injil, Adam hug ansoor
Da'n Croodagh mie yn Ooilley-niartal pooar :—
O vun dagh mie, dooys t'er ve cha graysoil,
Voyms dty chretoor ny chyndaa dt' oaie er-sooyl,

Yn aigney ayds dy vel mee hannah jeant
 'Sy lught-thie noa (yn seihll) my ard harvaant ;
 Dagh bio 'skyn earroo sinshley ta na mee,
 Neu-chooie son sheshey dooys, ard obbyr Yee.
 Er-lhiam nagh beagh y vooa myr sheshey cooie
 Da'n chabbyl, ny'n eayn meein da'n lion cooie,
 Chamoo ta'n baagh cooie dooys ve sheshey share,
 Ta lheamys veih ayns corp, resoon, as glare.

Deaisht Jee dy graihagh rish ny v'eh er ghra,
 Eh hene kiarail dy chroo foast sheshey da ;
 Honnick eh, neesht, dy row eh ymmyrchagh
 Dy beagh ec dooinney sheshey dooghyssagh.

Eisht hilg Jee Adam sheese ayns cadley kiune,
 E chorp myr marroo, agh bio e resoon ;
 As ass e lhiattee asney ren eh ghoaill,
 As ghoin eh'n ynnyd reesht lesh feill as fuill.
 Eisht jeh'n craue cam shen ren eh ben y chummey,
 Cooie dy ve sheshey dooghyssagh da'n dooinney ;
 Va'n ven shoh aalin 'skyn dagh cretoor elley,
 'Skyn Adam hene ayns corp, ayns oaie, as shilley.
 Jeant, ren ee girree myr nish veih saveenaght :
 Bioys v'ayn-jee, agh quoi va ee hene's cre'n aght
 Haink ee ayns shen, v'ee foast meehushtagh jeh,
 Ynrican v'ee 'sy vagher glass er-lheh :

Eishtagh ghleash' ee e cassyn mie gys shooyl,
 Gyn liaee cre gys, chamoo cre raad dy gholl :
 Agh cheet gys farrane ushtey glen as kiune,
 'Naght myr va'n aer ghllass hanney v'er-e-skyn,
 As croymmey sheese dy yeeaghyn er cre v'ayn,
 E shilley veeit rish jalloo aalin glen
 Jeeaghyn ny quail ; yn ven reesht scughey veih,
 Er-lhiee dy ren ee sheese fo'n ushtey lhie,
 Jannoo shoh mennick, graih mooar hug ee da,
 As yioghe ee 'hiagney fuirraght marish braa.

'Sy trubbyl shoh haink goo veih Jee huic, gra :—
 Chretoor millish, cha vel ayns shen agh scaa ;
 Dty scaa faase hene, nee kinjagh lhiantyn dhyt,
 Agh gyn pooar mie nyn sie y yannoo rhyt.
 Trog ort, eiyr orr'ms gys sheshey kiarit ta
 Dooghyssagh dhyt, jeh stoo s'breeoil na scaa,
 Yn cheshaght ayds ver ersyn dy ve ayr
 Graihagh as dooie, nagh naik oo nhee ny share ;
 Son ver eh orts dy jig oo dy ve moir
 Da mec's inneenyn, jeusyn vees dagh piyr
 Ayr as moir reesht ; as geddyn, goll-roo hene,
 Cloan nee'n seihll 'choamrey lesh ashoonyn lhean.

Jeeagh, tra va Adam kianlt fo geuley'n cleayn
 Dy yarood dor'ghey hie eh'r tilgey ayn ;
 E chorp myr marroo, agh e spyrryd bio,
 Honnick eh'n asney jeant ny chretoor noa,
 As tushtagh, neesht, dy nee ny chour v'ee jeant,
 Chamoo veagh oyr ny-sodjey echey plaiynt ;
 Eisht hrog Jee lesh eh gys y voayll v'eh ayn
 My huitt y cadley trome shen er e chione.
 Dooisht reesht, cha vaik eh'n shilley hooar eh roë,
 Er-lesh dy row e chronney still feer chreoï,
 Gys ren ish guillian seose veih'n chibbyr ghlen,
 Raad chumr' ee gindys er e jalloo hene :
 As veih shen leedit tammylt sodjey shiar,
 Raad hoshiaght chron ee Adam ayns y ghaar',
 Ayns boggey mooar haink ee dy veeiteil eh
 Choud's v'ee, myr veagh ee, kiarit veihsyn chea
 Adam deë magh, O aalid ! milljid vooar !
 Nagh dod ve jeant agh liorish yn ard phooar ;
 Craue jeh my chraueyn oo, as feill jeh m'eill,
 Cair dou son sheshey, cooie dou dy chur geill :
 Myr shoh loayr eh ; ish huggedy reesht chyndaa,
 Ghow eh er 'laue ee son e heshey braa.

Yn jees va unnane jeant, veih'n traa v'ayns shen,
As ren y Dooiney ish y enmys Ben.

Shoh va'n chied chubbyl liorish Jee hene poost,
Aalin gyn-loght, gyn-nearey ga v'ad rooisht.

Jeh ooilley 'vee, she Adam s'ooasle rieu,
As fud inneenyn Aue neesht b'aaley jeu.

Ayns Adam hee oo ooashley, reill, as pooar,
Creenaght, graih, tushtey, briwnys, as cree mooar,
Tastey, resoon, dunnallys marish shee :

As cairys, neesht, ooilley ayns jalloo Yee.

Ayns carriads Aue hee oo aigney mooar,
Foast imlee, meein, graihagh, cur geill da'n phooar
Va er e skyn ; gyn-loght as kinjagh kiune,
Imneagh jeh 'cur'm as leedit lesh resoon,
Ooasle, ard-chreeagh, dwoaiagh er anvea :

Ayns goo as jannoo s'maynrey va nyn mea.

Faag mayd y chubbyl bannee shoh, son traa,
Myr snaue 'syn eunys ren Jee lowal da :

Dy voddym loayrt jeh tooilliu ymmyrchagh
Son tushtey smoo, as share, da'n Vanninagh.

Nish Uss chooin lhiam dy ghoaill lheid y jurnah
Trooid ream y vaynrys villish, farraght braa,
As leeid mee neose reesht, lhiastey dy hyndaa,
Trooid dt'obbyr yindyssagh jeant ayns shey laa,
O cooin lhiam nish, dy voddym coontey 'choyrt
Jeh yindyssyn mooar ren er ny shey laa geiyrt.

Gys nish londeyr v'aym dy leeideil my chass
Ayns troailt yn ream ta heose, yn ream ta wass ;

Insh dou kys loayr-ym nish jeh'n ream ta heese
Fo pooar y drogh-sp'ryd, as dagh mee-chrauee's :

Ass y dowin vooar tra hie ny seihill er goaill,
Cha nee mooarane jeh'n rooym v'ayn ren eh coayl,
Dy baillish Jee foast millaghyn dy heihill
Y chroo, cha jinnagh rooym ayn daue failleil,

Son mooar skyn nyn dushtey ta'n folmid feayn,
 Myr fegooish toshiaght te, as fegooish kione ;
 Ny seihill mooar h'er goaill ass, ga t'ad whilleen,
 Soylit gys shoh, cha vel agh myr brineen.
 She aggle loayrt jeh, atchim smooïnaght er,
 Oyr t'ain v'er-creau e ghooghys 'chur-my-ner ;
 Ta'n dowin gyn grunt, ard te neesht gyn baare,
 Liauyr fegooish kione, as fegooish mean as oirr.
 Dowin gyn grunt ! O caid te roshtyn sheese ?
 Ard fegooish eaghtyr ! caid te sheeyney seose ?
 Liauyr as gyn kione ! O caid sheer as shiar ?
 Lhean fegooish cagliagh ! c'raad yiow mayd yn oirr ?
 Cha vod yn Ynsagh soylagh gheddyn da
 Agh y vea veayn shen t'er ny enmys braa.
 Dor'ghys ta reill ayn, son cha vod yn ghrian
 Eayst ny rollage, ayn roshtyn lesh soilshean.
 Mastey dagh giott dy stow Jee er ny seihill,
 She'n soilshey smoo ta freayll ad veih meehreisteil ;
 Eisht ream vooar y dowin, feme y bannaght shen,
 Shegin ve feer agglagh, quaagh, grouw as neu-ghlen.
 Choud as ta'n soilshey roshtyn trooid y dowin,
 Choud shen smoo maynrays t'ec ny bioee t'ain ;
 Shen gaase gyn bree, as falleays hene failleil,
 Ta pooar y dor'ghys ayns y fooillagh reill.
 Cre ta ayn marish ! ny row fys ain choiee
 Agh wheesh as t'ain veih scriptyr casherick Yee.
 Ta'n goo ginsh dooin jeh'n dor'ghys sodjey magh,
 Jeh ooig gyn grunt, as pian gyn aash dy bragh ;
 Jeh aile gyn vooghey, beishteig kinjagh bio,
 Jeh ster'm, dorrin, as brimstone lheiht heese fo.
 Quoi smooïdys nagh nee shoh'n ream, kiarit va,
 Cour ny drogh-yantee jannoo pannys bra ?
 Jeh'n irree-magh keoie shen, va noi Mac Yee,
 Hug oyr cah dewil ve fud ny flaunyssee

Ren shiu lhaih roïe ; as kys ve castit neesht,
 Tra honnick Satan, e phooar ooilley brisht ;
 Eh hene's e heshaght eebyrit ass niau
 Sheese gys y diunid vooar, va kiaddit daue :
 Nyn dappey voue ! hooar ad ad-hene ayns aile
 Va lostey dewil, agh gyn ceau soilshey cainle ;
 Son aile dy vrimstone, ga te lostey dewil,
 Cha vel fordrail mooar soilshey da ny jouyil :
 Agh myr falleays beg, dy chur dauesyn fys
 Cre'n stayd treih, boght as piandagh t'ad ayn nish
 Shaghey v'ad roïe ; ayns shee as eunys braa
 Mysh stoyl ny ghloyr, kiaulleeaght Alleluja.

Mysh jerrey-fouyr my hug shiu tastey da
 Biljyn ny keylley rooishtit jeh nyn mlaa,
 Yn foain ta heese foue, as mygeayrt y moo,
 Scart lesh y duilley chreen ta sheebit voue ;
 Ny myr y coau faase, fasnit veih'n laare-vooië,
 Getlagh er-sooyl, yn grine faagit ny yeï ;
 Myr shen va ainleyn scart er baare y tooilley
 Dy vrimstone lheiht, ad hene's nyn armyn ooilley.
 Satan ny vud oc, troggal seose e chione,
 Myr leviathan moostey baare y tonn ;
 Hug eh my-ner ny lhie er-gerrey da.
 Beelzebub mooar, yn prince by-niessey va
 Da hene ayns reill, fo'n Ooilley-niartal Ree,
 'Skyn millaghyn thousane dy flaunyssee ;
 Lesh cree mooaralagh, as lesh aigney lane
 Dy olkys dewil, as noidys noi e Hiarn ;
 Rish yn ard-ainle shoh vrish eh e chora,
 As, brynnagh foalsey, myr shoh ren eh gra :—
 Nee shoh'n Seraph v'ayns gloyr as pooar soilshean !
 Ayns aalid, neesht, 'skyn millaghyn thousane !
 O' cre'n caghláa, cre'n lhieggéy t'eh er gheddyn !
 E choayl, e phian, ry-akin ayns e eddin !

Keayrt va dty chree, dty phooar, as dty hreishteil.
 Dooie joynit hymys, dy chosney dou'n clat-reill,
 Nish joynit ta shin ayns yn un phryssoon
 As dungeon doo, dyn jerkal rish pardoon ;
 Foast, te ny share dooin niurin 'gnoaill myr reih,
 Ny sleaghtagh sheese dy chaayney myghin veih.
 Dy ghliooney huggey, as dy hirrey shee,
 Te onnor scorn lhiams 'yeeaghyn dasyn choiee ;
 Veagh shen dou angaish, scammylt's brishey-cree,
 Smoo na'n charbaa t'aym veih ny flaunyssee ;
 Fakin nagh vod yn dooghys ain failleil
 Gyn choiee ve bio, lhig dooin gyn meehreishteil
 (Lesh keeayll ny crout, lesh niart miol ny tranlaase)
 Nagh voyms cooilleen ver da my ghoanlys aash ;
 Er y chooid smessey ta rour fys ain nish,
 As surranse shegin, cha vod mayd jannoo rish ;
 As ga ta shin fo pooar y noid ayns shoh,
 Ayns noidys vees mayd da choud as t'eh bio.
 Choud shoh ayns torchagh loayr yn ard-hraitoor,
 As Beelzehub hug dasyn reesht ansoor :—
 O Phrince smoo-niartal, syrjey v'ain ayns pooar,
 Leeideil y twoaie yial seose noi Ree ny ghloyr,
 Dty niart, dty schleï, dty ghunnallys hug dooyt
 'Sy Jee mooar hene, shen hug er caggey rhyt,
 Ga, gys nyn drimshey t'eshyn still ayns pooar,
 As uss, as shinyn, nish spooilt jeh nyn ghloyr,
 Eebyrit sheese 'sy diunid agglagh shoh,
 Dy bragh ayns pian as torchagh dy ve bio :
 Ny-yeih, crewoad share eh ? tra t'ain fooast nyn mree,
 Nyn niart, keeayl as schleï, aigney seyr' as cree
 Dy chaggey braa, er chee cooilleeu y ghoaill,
 Myr share dy vou mayd er-son moads nyn goayl.
 Ard-ainle, dooyrt Satan, Mannagh vreill mayd cree
 Smerg dooin ve bio, ayns craid ec flaunyssee,

Shoh, shoh nyn geeayl, lhig shoh ve nyn giarail,
 Dagh olk y yeearree, as dagh mie 'hreigeil,
 As my ta Jee chee mie veih olk y hayrn,
 Mie 'yannoo olk, lhig shen ve'n eearree ain ;
 As mannagh bee shoh veg y vondeish dooin,
 Foast bee eh crosch vooar dasyn t'er nyn skyn.
 Eisht hilg eh 'hooillyn eulyssagh mygeayrt,
 Choud's oddagh spyrryd ronsagh lesh e reayrt :
 Ayns shoh hee eh logh dy vrimstone lheiht,
 Ayns shen reesht sleityn sniaghtee garroo ceaut,
 Boayl elley dor'ghys, torcan, jaagh, plooghane,
 As geayghyn cassee rowlal aile nyn mean.
 Cha bleayr da ayn agh olk still smoo as smoo,
 Agh chiare eh foast nagh beagh e chree veg sloo ;
 Millaghyn d'ainleyn va keayrt flaunyssagh
 Va roish e hooillyn, seiyt ayns aile as jaagh ;
 Dy voghe ad baase, gys veg v'er nyn jyndaa,
 Wooishagh ad nish, agh beign ve bio dy braa.
 Eisht dooyrt eh reesht rish e yeih-heshey hene ;
 Vraar dooie, cre'n-fa ta shin cumrail fo pian
 Yn faarkey dewil shoh ? heem's nagh vel y thooilley
 Aileagh shoh skeaylt trooid-magh y diunid ooilley ;
 Son troggal seose ny syrjey d'akin veih,
 Honnick eh eaynagh lhean jeh stoo gyn lheie :
 Ny my ve keayrt lheiht, nish va'n aile ceaut ass,
 As y scroig eaghtyr creoï myr lake dy phrash :
 Jeeagh shid, dooyrt eshyn, eaynagh feayn as lhean,
 Grouw, quaagh as eajee, gyn aile, gyn soilshean
 Agh yn falleays ta'n lossey shoh dy cheau,
 Myr te er baare y thooilley gorrym creau :
 Trog ort, hooin roin, foddee dy vow mayd aash,
 My ta aash nyn gour ynnyd ta cha faase ;
 Ayns shen nyn boaryn trimshagh hagglys hooin,
 As gow mayd coyrle myr share nee coardail rooin.

Myr shoh hrog ad nyn skianyn er yn aer,
 Getlagh dy leah, gys hooar ad greim er 'laare,
 Credjal, dy moal, dy nee trooid pooar nyn mree
 Scaap ad y lake, cha nee trooid surranse Yee.

O nee shoh'n chummal, O nee shoh'n reih boayl
 Shegin dooin y ghoail, n'yynyd reeriaght cha gial ;
 Dooyrt y traitoor ; O'n coonrey ta ro gheyr
 Dy v'er ny hurranse liorish aigney seyr !
 Nyn gooyl rish Niau, nish Niurin t'ain myr reih,
 Lhig Jee reill heose : myr sodjey ta shin veih
 Wheesh shen share dooin, agh mish cha der da geill ;
 Ayns shen lhig dasyn, ayns shoh neem's still reill.

Agh hee'm ad va nyn sheshaght dooie ayns niau,
 Foast nyn biantanee 'sy logh aileagh snaue,
 Nee'm geamagh orroo hooin, dy ghoail nyn ayn
 Jeh'n aash fardalagh t'ayns y voayll shoh ain.
 Er shoh e chliwe chiangle eh gys e lhiattee,
 Lurg da ve coamrit lesh slane eilley chaggee,
 As myr croan lhuingey va'n shleiy v'ayns e laue
 Dy chooney lesh dy heet ny sniessey daue.
 Eisht shassoo ard er beinn y vooiragh chreoï,
 Yn lake heese fo tilgey seose aile ny 'oï,
 Heid eh yn cayrn hug er y diunid craa,
 'S ny piantee v'ayn hug enn er e chora,
 Geamagh daue heet dy akin reesht nyn gione,
 Gialdyn daue kymmyrk rere y phooar va ayn :
 Lesh boggey mooar hug ad da'n sumney geill,
 Goail foddeaght nyn ree reesht y veeiteil.

Milley thousane dy veeilaghyn, ayns towse,
 Veih beinn ny maynrys v'ad er duittym neose,
 Taarnagh as chentyn gimman ad er-sooyl
 Sheese trooid y down, gyn soilshey roish nyn sooill ;
 Aile loshtee niurin blazal seose mumboo.
 As tonnyn brimstone lheiht son lhiabbee foue.

Nyn dappey voue 'sy lostey v'ad ny lhie
 Gyn geill da pian, gyn cooinaght mie ny sie,
 Gys haink feiyr trump nyn emp'ror gys nyn gleaysh
 Cur bioys ayndoo, as ennaght jeh'n angaish.

Er skianyn eddrym dirree ad jeh'n aile,
 Cha chiu's ny locustyn ayns reeriaght Nile ;
 Trooid pian y jaagh, dorraghys as plooghane,
 Stiure ad nyn raad, leedit lesh feiyr y chayrn
 Gys y vroogh hyr'm, raad lhig ad er nyn skee's,
 Ayns slane kiarail nyn Ree reesht y hirveish :
 Smooïnaght dy row ad rish nyn dorchagh rey,
 Dy voghe ad reesht son nyn leideilagh eh :

Foast rey rish shen cha row ad, ayns nyn gree,
 Va beishteig bio er nyn gooinsheanseyn gee.
 Er nyn doilliu smooïnaght, as er nyn goayl,
 Niurin son Niau ! streih'n coonrey beign daue goaill !
 As shoh fo'n drogh-yeih, ren ad hene y reih,
 Huggey v'ad goll jerkal son kymmyrk veih,
 Red v'eh hene feme ; ga foast nagh goghe eh rish,
 E chree ard creoghit ayns e vooaralys.
 Eishtagh dagh pooar hayrn seose e heshaght reesht
 Va fo ayns Niau, roish my row'n magher brisht
 Nyn armyn scooirt, culleeyn ard ren craa,
 As kiaull, myr roish cah noa, fud dagh sheshaght va ;
 Nish gys yn armee chagglit er y voal
 Fo armyn sollys, haink y General,
 Satan myr ree ard, Beelzebub waiteil
 (Eshyn va'n prince by-niessey da va reill),
 Ree ard (dooyrt mee) agh hee oo er e vaaish
 Bodjal doo stermagh, ginsh cre'n beggan aash
 V'eh jerkal rish, ga va'n slane armee bio,
 As beg as mooar reesht booiagh shirveish fo :
 Lesh cree mooaralagh hug eh oltagh-bea,
 Rere moads e phooar, 'syn ynnyd agglagh v'eh.

Yn chullee reeoil oardit va ve soit,
 As Ree mooar Niurin enmyssit v'eh eït,
 Kiarit dy beagh ad chammah's flaunyssee
 'Sy diunid ghoo, as lane-y-chur fo Jee.
 As eisht va Mammon (ard-ainle down ayns schlei)
 Dy gheddyn berchys, by-chummey cre'n boayl veih,
 Stiagh er ny eam, as er ny choyrnt ayns pooar,
 Dy ronsagh magh trooid ooilley'n diunid vooar
 Son claghyn ooasle, pearlyn, argid's airh,
 Ta fud sheelnaue, nish, coontit ve cha deyr.

Ny jean uss craid moom son dy vel mee scrieu
 Jeh red ve credjit, er-lhiat nagh vel feeu.
 (Airh ve ayns niurin) bare y plague shen 've
 Foast ayns y diunid ; cha beagh wheesh d'anvea,
 Streeu, caggey, murdyr, noidys, looghyn-oaï,
 Baase naaragh mennick, as lheid y jummal sleih.

Mammon's e heshaght (ta mee gra) hie sheese
 'Sy diunid ghoo, dy chur lhieu berchys neese
 Dy hruggal cooyrt, ny plaase gloyroil da'n ree
 Feeu er-e-hon, as dy ve goll-rish Jee ;
 Thousaneyn sp'ryd va schleïoil, myr v'eh hene,
 Hug Mammon lesh dy gheddyn magh yn veain :
 Hyndaa ad sleïtyn, croink, as creggyn creoi,
 Chaglym yn stoo va'n aile er scarrey roïe,
 Airh, argid, cobbyr, tin, yiarn, as prash,
 As dagh stoo share dod ad y gheddyn ass :
 Eisht hrog ad cooyrt ny plaase gloyroil da'n ree,
 Ny pearlyn sollys jannoo laa jeh'n oie.
 Jeant, hrog ad lhieu yn bildal slane myr ve,
 As da nyn mainshtyr hug ad jeh livrey ;
 Er yn eaynagh feayn ghow eh moads jeh'n rooym,
 'S vasht ad e ennym Pandemonium.

Nish ayns y chooyrt shoh chum ad ard-choonceil,
 Cre'n aght myr bare yn reeriaght noa y reill ;

Ny pooaryn b'yrjey eït, ren chaglym stiagh,
 Dy chlashtyn aigney'n ree ard-mooaralagh.
 Hooar ad eh ny hoie er chayr ard-reeoil,
 As ayns e laue yesh cummit seose lorg-reill ;
 Myr v'ad nyn shassoo er dagh laue dy chiu,
 Lesh goan baan brynnagh myr shoh loayr eh roo :—

Phrinceyn gloyroil, ayns Niau ren shassoo lhiam
 Dy chosney'n crown (er-lhieu) lhisagh ve aym,
 Erriu hene jeeagh-jee, 's er nyn earroo mooar,
 Er foays nyn schlei, nyn ghoo, nyn niart as pooar,
 Shirveish ooilley cooidjagh va myr whilleen Jee,
 Jeh dooghys beayn nagh vod ve er ny stroie ;
 Mish mêrin, neesht, mish ayns nyn doshiaght va,
 Oh ! quoi heillagh nagh gosnagh shin y laa ?

Agh Ree ny maynrys keiltyn rieu e niart,
 Er nagh row fys ain, gys y tra a v'eh try't
 Ren shin y volley ! Ooilley niartal t'eh
 Shegin dooin goaill rish ; as lhig eh myr shen 've.
 Ta jeant rooin hannah ny oddys rooin ve jeant,
 As cre'n chour t'ain dy accan, ny dy phlaiynt ?
 Myr Jeeghyn bio fooast ta shin, as whilleen,
 Cur-jee nyn goyrle, cre'n agh yiow mayd cooilleen :
 Nee caggey foshlit share dooin reesht y reih,
 Dy chosney'n eiraght ta shin tilgit veih ?
 Ny surranse tammylt gys, trooid crout ny keeayl,
 Oddys mayd sneih 'chur ersyn heose ta reill ?

Scurr y traitoor ; Eisht fer cha eulyssagh
 As eulys hene, as roïe ree flaunyssagh
 Fo'n Ooilley-niartal, agh hyndaa ny noid
 Dewil marish Satan ; moyrnagh ass e stayd ;
 Moloch va 'ennym ; hug eh'n choyrle shoh daue
 Mychione y chooish hrome va oc nish ayns laue :

Er my hon's, dooyrt eshyn, feer voal rieu va mee,
 Lesh foal' ny crout, dy ghoaill vondeish erbee ;

Lhig daue shen 'chliaghtey, quoi erbee t'ayns feme,
Yn cliwe ghoymys tra nee oyr orrym geam.

Son caggey ta mee, dy hrial un cheayrt elley
Yn magher 'chosney, as cha bee'm er-jerrey :

Millaghyn d'ainleyn rish nyn lhiattee ta

Fo armyn sollys, farkiaght er y traa

Yiow ad yn fockle, March ; jean mayd failleil ?

Orrin t'ad farkiaght ; cuin nee mayd leeideil ?

Vel chentyn er fioghey wheesh nyn mree

As t'ad nyn aalid ? nagh loys diu nhee erbee

Y ghoaill ayns laue ver fea diu, shee as aash,

Yn boayl shoh 'hea, ny smessey ta na baase ?

Shoh, shoh my choyrle, lhig mayd nyn aggle voïn,

As ooilley torchagh niurin trog mayd lhian

Mârish yn aile, as losht mayd ooilley roïn :

Dor'ghys as geay'ghyn, giattyn loor as glish,

As cre erbee s'loys shassoo noi nyn gass

Nee tuittym roïn ; ver mayd er flaunys craa,

As tooryn Niau nee veih nyn mun chyndaa.

Tilg mayd niurin ghorraghey stiagh ayns niau,

Dy phlooghey'n taarnagh s'loys da magh y cheau ;

Nyn eiraght hene ta aashagh goit er-niart,

'S gyn dooyt nee'n they hene shassoo er nyn baart :

Choud's ta shin shlearaght oddagh shoh ve jeant,

As myr ta shinyn nish, adsyn eisht ve plaiynt.

Ta eu my choyrle. Eisht Belial hass magh,

Agh fooast e ghoan cha row cha eulyssagh

As va goan Volock, agh fodd' s'foalsey v'eh,

As myr shoh ren eh 'ghoan dy shliawin 'livrey :—

Ard-ainleyn oasle, myr nagh vel mee noid

Sloo noi Ree Niau ny Molock (lesh e stayd)

Dy ghreinnagh caggey ; agh ta 'ghoan ayns bree

Ny smoo cur coyrle dooin dy reayll foast ayns shee—

Lheid y shee as t'ain—as gyn ventreil reesht

Oĩ pooar cha niartal, lurg dooin ve cha brisht.
 C'wooad share dooin gearree'n red nagh vow mayd choiee,
 Niau 'ghoail er-niart, veih'n Oilley-niartal Jee ?
 Roish my row shin, Jee va'n chied chummyltagh,
 As e phossession cummys eh dy bragh ;
 Dy yannoo shen ta echey pooar dy liooar,
 Ooilley-niartal t'eh, as ta 'chreenaght mooar :
 Erskyn nyn doilliu yeeagh eh 'vieys dooin,
 Agh moods e phooar's e chreenaght cheill eh voin ;
 Er shoh dy beagh ain tushtey cairagh roie,
 Cha beagh shin foast er n'irree magh ny oĩ ;
 Agh trooid e cheeayl vooar, hug eh dooin nyn reih
 Biallagh 've, as dy ghoail leighyn veih :
 Er shen, maynrys va dy ve ain son fail,le,
 As fo e Vac, nyn eiraght still y reayll.
 Agh foast my bare lhian ve neu-viallagh,
 As noi e haraghyn dy hassoo magh,
 Dy cairagh ta shin fo 'yymmoose dy bragh.
 O cre'n cooilleen oddys mayd nish y ghoail ?
 [Ver lhiasagh dooin ayns cor'mys rish nyn goayl ?]
 Ynrican Niau yinnagh y coayl shen mie,
 Agh caillit te ; quoi s'loys eh chosney thie ?
 Tooryn ard Niau ta seyr still veih danjeyr
 Yn noidys ain, t'ad freayll fa arrey gyere
 Dy ainleyn sollys, eillit lesh pooar nyn ree.
 Stoyl ard y ream shen hassys shicky choiee,
 Dy lhieggal sheese eh cha vod pooar erbee ;
 Son t'eh, ta soie ayn, reill dy chooilley ree,
 Trooid cheeid y dor'ghys t'eshyn fakin nish
 Ooilley nyn bleateil, as cre ta shin mysh ;
 Jeh nyn goyrle cha vel eh agh jannoo craid,
 Son kys dy vrish' eh tushtagh t'eh jeh'n raad :
 Eisht share yn ream shoh hene y ghoail myr reih,
 Ny chebbal reesht ny t'echey y ghoail veih.
 Dy goghe shin orrin nyn brysson y vrishey,

As jeh Niau reesht dy gheddyn agh un shilley,
 Wheesh shen dy eunys feer deyr chionnagh shin,
 Veih'n arrey armit ta soit er nyn skyn ;
 Ta boltyn-taarnee ec Jee roast ayns stoyr,
 As chentyn loshtagh guintagh wheesh as s'lioar,
 Dy cheau nyn vud, ver torchagh foddey smoo
 Na ny plagueyn dewil ta shin dellal roo ;
 Share eisht yn ream shoh hene y ghoaill myr reih,
 Ny chebbal reesht e ghloyr y chassey veih.
 Trooid surranse pian hene dooghyssagh nee gaase
 Da'n dooghys ain, dy ymmyrk' eh lesh aash ;
 Ain oddys treisht've (fegooish greinnagh smoo)
 Dy jean corree'n noid (mooar nish) gaase ny sloo.
 Millaghyn meeiley ta shin scughit veih,
 Niau ass danjeyr voïn, nee e chorree lheïe,
 As eisht, trooid earish, foddee'n cheeayl ain hene
 Saase gheddyn-magh ver dooin nyn reih cooilleen.
 Myr shoh goan Bhel'al (ga lane dy physhoon),
 Son taitnys share, va coamrit lesh resoon.
 Shoh'n choyrle aym's, dooyrt eh ; lhig quoi saillish loayrt
 Ec y voayrd ooasle, as coyrle s'fondee choyrt.
 Ny lurg loayr Mammon, dowilys v'ayns e eddin,
 As e ghlare gharroo baggyrt y chooid cheddin :—
 Edyr shegin dooin (My Hiarnyn), goaill ayns laue
 Cah barb y hroggal reesht son reeriaght niau,
 Yn Ree mooaralagh t'ayn y imman magh,
 Myr hie'n ree ain, roish shen cha vow mayd stiagh.
 Shoh, ta mee gra, dy-gerrit shegin ve jeant,
 Nonney bee kied ain choiee nyn bian y phlairynt.
 Agh treih aless ! s'mie oddys fys 've ain
 Nagh vel nyn maggyrt agh err goan awane ;
 Te wheesh nyn booar niurin y hroggal seose
 Gys raad ta niau, as niau y hilgey neose,
 As ta ny dooyrt mee 've dy bragh ec kione,

Choud as vees niau as niurin ny neesht ayn
 Decree ta jeant, nagh vod ve er ny vrishey,
 As cha nee keeayl dooin lheid dy bragh y hirrey ;
 Agh cre dy jinnagh Jee foast geaishtagh rooin
 Caayney pardoon, as myghin 'yeeaghyn dooin
 Er gialdyn noa, jeh geill as biallys
 Son traa ry-heet ? O nagh olk ghoghe shin rish
 Ve shirveish fo ree, er t'ain wheesh dy feoh ?
 Nish ta shin Chiarnyn, agh eisht veagh shin theay.
 She oï nyn aigney veagh shin goaill arrane,
 As oï nyn aigney genmys Jee nyn Jiarn ;
 Ayns shoh failleil, reesht veagh shin tilgit magh
 Myr y nah cheayrt, gyn reesht goit stiagh dy bragh :
 Agh fo'n reill ain, jeh smoo vees soiagh
 Smoo nee olk, eh smoo nee vainshtyr booiagh.
 Dy eiyrty er olkys, as veih mie dy hea,
 Yn aym cooie ain, as she nyn gurrym eh.
 Er-son nyn yannoo, ny foast son nyn loayrt,
 Cre woodas cha olk cha lhiass dooin coontey choyrty ;
 Myr shen nyn aigney villish still vees ain,
 Bee shen hene aash dooin, cre dy woodas nyn bian.
 Eer aile as pian, trooid traa, nee gaase dooin dooie,
 Yn dor'ghys, neesht, vees gys nyn shilley cooie ;
 Ny foddee foast (my ghoys mayd yn coorse cair)
 'Sy ream shoh yiow mayd palshey pearl as airh,
 Gaighyn argid, as claghyn deyr dy liooar,
 Niau vees ad dooin, as bishee ad nyn ghloyr ;
 Niurin nee mayd sollys, goll-rish Niau,
 Lesh mooads y verchys vees ain er dagh laue :
 Myr shoh dagh nhee ta bishagh nyn dreishteil,
 Daue coyrlagh caggey lhig dooin gyn chur geill.
 Ta eu my choyrle ; as eisht, lesh un chora
 Hug ooilley'n enish vooar mooads moylley da.
 Eisht Beelzebub hass seose, yn ard er-reill

Fo'n traitoor foalsey, e vaaish gaggyrts geill
 Veih'n enish slane, ad ooilley blakey er,
 Dy voddagh ad e ghlare y chur-my-ner.
 Choud as v'ad nyn dhost hrog eh ard-choraa,
 Dy chur daue keeayl, as myr shoh ren eh gra :

Ard-ainleyn gial, cherubin's seraphin,
 Ny enmyn s'ooasle ayns Niau tra va shin
 Nyn ree'ghyn ard, reill fud ny flaunysee,
 O ! kys ta'n onnor ard shen caillit choiee ?
 Ny choonrey shen bee ain nish ennym noa,
 Er-son oltooanyn, foue dy bragh ve bio.

Foast princeyn shin ; ta'n Ree mooar t'er nyn skyn
 Er vriwnys cairagh yn reeriaght shoh dooin,
 As reeriaght vooar, foast lhig fys ve ain
 Dy nee pryssoon eh jeant cour ve nyn bian ;
 As myr ta 'phooar sheeynt harrish ooilley niau,
 Sheese 'sy phryssoon shoh roshtyn neesht e laue,
 Yrjid as inshlid dasyn yn un chooid ;
 Dor'ghys as soilshey ta 'hooill fakin trooid.

Cha nee dy phleateil ta shin dooint ayns shoh,
 Agh eebyrtee, ayn dy ve cummit fo.
 Ayns Niau, un cheayrt, lesh slat airh va shin reillt,
 Ayns Niurin nish lesh slat yiarn bee mayd freilt.

Foast myr nagh vel shin jerkal rish pardoan,
 Er-lhiam dy vel eh red ro injil dooin
 Dy hrial voghe shin lheid y foayr veih Jee,—
 Yinnagh shen moyrnagh jeh 'skyn nhee erbee.
 Ta toiggal ain nagh vel eh laccal shee
 Chur dooin, ny shin yn foayr shen chaayney choiee,
 As reesht nagh loys dooin girree magh ny 'oï
 Ayns caggey foshlit, 'nacht myr ren shin roïe.
 Cre nee mayd agh ve noidagh da dy bra,
 Er-chee nagh jean nyn accan boggey da ?
 Yiow mayd cooilleen foast, as cha bee ain feme

Ve ayns gaue caggee reesht, dy chosney ream
 Hooar shin cha niartal, as choiee niartal vees ;
 Yn phooar ard t'ayn cha vod ve croymmit sheese,
 Foast freill-jee cree mie, foddee oyr as traa
 Nyn stayd, cha olk nish, gys ny share hyndaa :

Ta thaish ayns Niau jeh seihll noa dy ve crooit,
 As ass y dowin vooar rooym da dy ve goit,
 As dy beagh Dooiney (cre erbee'n red shen)
 Er ny chroo ayn, as sheshey da veagh Ben ;
 Yn cubbyl dooie shoh, ayns y theihll noa jeant,
 Veagh myr unnane fo Jee ny ard sharvaant ;
 Jeh shoh (ayns traa liauyr) dy jig ashoon mooar,
 Faggys corrym rish ainleyn hene ayns gloyr ;
 Ayns reeriaght Niau dy beagh ad shoh goit stiagh
 Dy lhieeney'n earroo ain h'er eebyrt magh.

Ta hannah ayns jeh'n diunid feayn shoh goit,
 As ta shen ginsh dy vel yn seihll noa crooit.
 Son caggey, eisht, lhig dooin gyn loayrt ny smoo,
 Agh smooineaght er y theihll shoh t'er ny chroo :
 Cre'n seihll eh hene, quoi ad ny cummaltee,
 Cre ta nyn ghooghys stoo, nyn niart as bree,
 Ny vel annoonid ayndoo aght erbee
 Ayns corp ny aigney, agh eer goll-rish Jee,
 Jeh lheid y dooghys nagh vod v'er ny chraa,
 Nagh vod trooid pooar, ny miol, ny crout chaghlaa :
 Yn vissness ainyn eisht shoh 'gheddyn magh,
 My vod nyn lieen ve soit dy yannoo cragh.

Ga ta niau sauchey veih dy chooilley ghaue,
 Oddys pooar iurin noidagh 'hebbal daue,
 Foast yn seihll noa oddys ve foshlit lhan,
 Roish noid erbee dy naillish chebbal ayn ;
 Da niau er-gerrey ta'n seihll shen licklee soit,
 Dy vod y soilshey, veih shen, ve er ceaut,
 As faagit da ny cummaltee annoon

Dy v'er ny reayll, noi noid dy daghyr ayn.
 Noï shoh lhig dooin nyn ghreïnyn ooilley 'chloie,
 Nyn geeayl, nyn grout, nyn miolagh as nyn schleï ;
 Foddee dy duitt mayd orroo shoh doaltattym,
 As ad y woalley ayns angaish as atchim,
 Yn cheer 'ghoail dooin hene, 's adsyn 'hilgey magh
 (Myr va jeant rooin) gys niurin ghoo dy bragh ;
 Nonney trooid miol ny cummaltee y hayrn
 Dy hassoo lhian, 's dy vrishey rish nyn Jiarn.
 Ayns fockle giare ; nyn maynrys 'roostey jeu,
 Fraue as banglane ec un cheayrt 'chur mow.
 Veagh shoh'n cooilleen smoo baillish noid y ghoail,
 Jee hene d'akin e chroo noa goll er coayl.
 Nhee mooar ta smooinit ; my oddys eh ve jeant
 Cha bee ain arragh wheesh dy oyr son plaiynt,
 Veih'n diunid smoo dy vee-hreishteil t'ain nish
 Nee shoh nyn droggal ; as fodd' mayd jerkal rish
 Nyn stayd ve lhiasit : sneih y chur er Jee,
 E lane-chur-fo, as fo ny flaunysee ;
 Bee mayd ny sniessey neesht da'n seihll v'ain roïe,
 As dy heet ayn cha bee dooin faare cha creoi ;
 As my aillys niau, 's nagh vod mayd geddyn ayn,
 Bee soilshey gennal as aer villish ain :
 Nee'n vurgeeaght ghroamagh glenney voïn,
 As lhottyn dewil yn lostey lheihs dooin.
 Shoh, shoh va'n choyrle hug Beelzebub mooar daue,
 Sheelnaue y stroie, banglaneyn ayns y fraue :
 Coyrle youylagh ve ! agh Satan hug ny goan
 Dasyn, myr 'hannish, roish my hoie eh ayn.
 Ny sodjey, dooyrt eh ; Ta eu nish my choyrle,
 Agh er yn elkin agglagh quoi nee goll ?
 Cre vel yn chaghter fondagh er y hon,
 Creeney's croutagh, dy chur nyn gooish gys kione ?
 S'loys trooid yn yrjey yn jurnah y ghoail,

Raad vees dagh dorrin aileagh chee e choayl ?
 Lesh cass as laue, lesh skianyn liauyr, shegin streeu
 Noï geayghyn cassee, 's chentyn taarnee bieu :
 Gys oirr ny eaghtyr iurin cheet er-gerrey
 Meeitee eh Ainleyn armit, gyere freayll arrey.
 Yn chaghter hed bee echey feme dy liooar
 Ve gastey, lajer, as jeh foalsaght mooar ;
 As myr s'feer shoh, ta feme ain er moods schlei,
 Son y waight trome shoh quoi nee mayd y reih ?
 Er shoh y chlashtyn, ny pooar'yn va ayns dooyt,—
 Dagh fer gimraa dy nee eh hene veagh goit :
 Agh Satan moyrnagh ass dy ve ny Ree
 Chiare, ayns e aigney, nagh voghe fer erbee
 Yn onnor veih, dy ghoaill y drogh yurnah,
 Cre-wooads y gaue as peril veagh eh da ;
 As myr nyn Emp'ror myr shoh ren eh loayrt,
 Cur sarey dauesyn ooilley cleaysh y choyrt :
 Heeloghe ny maynrys, va un cheayrt ayns niau !
 Dy ve nyn dhost cha nee beg oyr ta eu,
 Freill-jee shiu'sh cree ; ga liauyr as creoi ta'n raad
 Leeideil veih niurin gys y vaynrys ard,
 Ny'n pryssoon loor aer aileagh er-y-skyn,
 As runt mygeayrt myr faarkey scoldee mooïn,
 Ny hrooid shoh cosney, as eh ve nyn booar,
 Oh'n dor'ghys doo vees er-e-skyn nyn gour !
 Oie ghoo veih rieu, ny hrooid nagh daink soilshean
 Veih stoyl ree niau, raad keayrt va soilshey ain ;
 My ta'n chaghter trooid y dorraghys scapail,
 Quoi ec ta fys cre'n cryggal hig ny whail ?
 O 'streh'n jurnah, as tendit lesh danjeyr !
 Da quoi erbee nee'n ventyr y ghoaill er.
 Ny-yeih, jeh'n stoyl shoh, coontit veem's neu-feeu
 Noi dagh gaue noidagh mannagh loys lhiam streeu.
 Raad nagh vel thaloo cha vel onnor cooie,

'S quoi nee chea peril er graih ve ny ree ?
Nearey as aggle, daa red, nagh dug rieu
Daah ayns my vaaish, ny creau beg ayns my chleeau.
Mish s'loys gholl seose, as mee my lomarcan
Nagh jean chea veih olk dy vod Jee 'chur ayn,
Mish vrishys magh ; as gys y toilshey gial
Stiur-ym my chass, dy gheddyn gys y voayl
Ren Jee loayrt jeh, ayns wheesh dy voggysagh,
Trooid keeayl ny miol chee eh chur mow dy bragh.
Fuirree-jee shiu'sh, as ceau-jee shaghey'n tra
Myr share dy vod shiu, gys nee'm hiu chyndaa
Lesh naight gennal ; my oddys saase erbee
Aash 'gheddyn diu, as corree 'chur er Jee.
Dirree eh seose gyn farkiaght er chyndaa
Ny ansoor voue, dys shen ny ren eh ghra ;
E chree daase mooar, as e vaaish eulyssagh,
As aile (er-lhieu) spreih ass e hooillyn magh ;
Smooinaght er hene cre'n gaue beign da ve ayn,
My voghe eh 'yerkal youylagh slane ec kione :
Yn whuaiyl huitt sheese ayns ammys injil da,
As ooilley'n theay ren gyllagh magh Husa !
Cur er y diunid agglagh ooilley craa.
Slane 'eillee chaggee verchagh ghow eh mysh,
As cliwe gyere creoi bucklit gys e chryss ;
Va gys e gheayltyn skianyn er dagh cheu,
Tra obbagh shooyl oddagh eh getlagh lhieu.
Noid Yee as ghooinney myr shoh aarloo va
(Ny Youyl dy jarroo) cour y drogh yurnah.
Tra skeayl y chooinceil, aash er-lhieu va oc
Dy voghe ad pooar dy yannoo tooilliu olk,
Vei'n treisht fardalagh hug nyn mainshtyr daue,
Dy chur gys kione yn elkin v'ayns e laue ;
Rheynn ad ad-hene er chee dy ronsagh magh
Yn reeriaght yoorree's caid va niurin stiagh ;

Caïd v'ee roshtyn trooid y feaynid ooilley,
 Ny row un aym ny s'maynrey na aym elley.
 Shoallyn, myr eeanlee, getlagh er nyn skian
 Stiurey trooid yn aer ghoo, torchit lesh plooghane ;
 Armeeyn slane raad elley roie ry'n gosh,
 Troailt nagh row fys nee sheear, shiar, twoaie ny jiass ;
 Ayns shoh va sleïtyn skeah magh veih nyn maare
 Bodjallyn d'aile, myr baggyrt er yn aer,
 Va ooilley plooghit lesh jaagh er nyn skyn,
 Strooghyn dy vrimstone lheït roie veih nyn mun ;
 Lostey as lheïe dagh stoo va meeiteil roo,
 As jannoo eaynagh faase mygeayrt y moo.
 Ayns ardjyn elley sleïtyn sniaghtee va
 Nagh ren rieu tennue, as nagh jean dy bra ;
 Chemmit lesh rio creoi, lomman gyere as nieu,
 Lostey as daah myr aile veagh lhiantyn diu.
 Ta lioaryn ginsh jeh peccee, deyrit ta
 Gys torchagh agglagh niurin son dy bra :
 Lurg daue v'er hurranse chiass yn aile lesh pian
 Trooid earish liauyr, dy jean ny sp'rydyn t'ayn
 Adsyn y imman gys ny sleïtyn feayr,
 Dy ve choud cheddin veih'n phian aileagh seyr ;
 Veih'n derrey phian, myr shoh, gys y phian elley,
 T'ad still ayns torchagh, eashyn fegooish jerrey ;
 Veih lhiabbee aileagh goit gys lhiabbee rioee ;
 Veih chiass gys feayght, as reesht gys raad v'ad roie.
 Cha nyrrys, eisht, dy vel y Goo gimraa
 Snaggeraght feeacklyn, as keayney son dy bra.
 Queig awinyn agglagh hooar ny sp'rydyn ayn,
 Agh l'heh-myr-l'heh s'beg oddyms scrieu my'n gione,
 She shoh ny enmyn ta oc trooid y down :—
 Cocytus, Acheron, Styx, as Phlegethon,
 As er dagh stroo jeu, l'heh-myr-l'heh, ta beoynd
 Dy vishagh niurin lesh angaish as pian.

Ta stroo Chocytus gall, nieu as pyssoon,
 As Acheron myr goanlys, troo as roon.
 Jeh ushtey Styx, my iu-ys sp'ryd erbee,
 Ayns olkys creoghit ta dy bragh e chree.
 Eulys, corree, keoieid, as mooads mee-cheeayl
 Ta lhieeney'n aigney nee Phlegeton 'heasteil.
 Foddey 'sy yioyn veih'n chiare ta'n wheiggoo awin,
 Jeh dooghys trimshagh, thostagh, dor'ghey, dowin,
 Lethe e ennym, te cur jarrood 'sy chree
 Jeh mie dy row, jeh olk dy vel cur bree.

Shoh ny queig awinyn, ta fir-ynsee gra,
 T'ec sp'rydyn caillt ayndoo dy chuir nyn baa.
 Un vine glen ushtey, hillagh veih dty vair,
 Cha vow drogh-yantee fo nyn dorchagh gyere !
 Ny strooghyn cursit ta roie sheese 'sy cheayn
 Dy vrimstone lheiht, as jannoo'n lostey beayn.
 Eddyry ny hawinyn, as 'syn eaynagh lhean,
 Cha vaik ad nhee agh lheid as ta cur greain :
 Eajee da'n tooill, v'ad breinn neesht gys y soar,
 Garroo da'n chleaysh, da'n blass v'ad sherriuid mooar,
 'S dy ventyn roo ta pian as guin dy liooar.

Dy gheddyn enmyn da dagh olk ta ayn,
 Ny coontey 'chur jeu, ta mee laccal goan.
 Sooill cha vaik, cleaysh cha geayll, cha hoig rieu cree,
 Ny reddyn agglagh ta cour drogh-yantee.

Myr va ny jouyil aegey niurin ceau nyn draa,
 Va'n chenn traitoor er-sooyl er e yurnah
 Er skianyn lajer getlagh, goaill e raad
 Fo doo iurin, seose lesh y vullagh ard.
 Va'n aigney jouyllagh greinnagh skianyn bieau,
 Cur er y lostey lhoobey roish e chleeau ;
 Jeean er cooilleen, cha dug eh geill da 'phian
 Veih'n aile va blazal roish as mysh e skian,
 Ny geayghyn stermagh sheidey neose ny whail,

Lesh e phandoogh v'eh soo'n blaze stiagh ny veal ;
 Son ooilley shoh, cha lhiggagh moyrn e chree
 Kied da chur cooyl, v'eh kiarit streeu rish Jee.

Myr lhong voogh sheer shiaulley noi stroo as geay
 Dy gheddyn purt, cha voddagh ee snaue Leah,
 Agh laccal shiar as sheear, ny jiass as twoaie,
 Chee cosney beggan er y coayl v'eck roie,
 Yn aigney jeean veagh eck dy gheddyn kione
 Er chyrrys liauyr, cur urree gobbragh coon ;
 Myr shen va Satan, lesh dy chooilley haase,
 Streeu gys y yiat trooid torchagh as angaish.
 Gys y laue yesh nish keeadyn meeiley sheeyney ;
 Gys y laue hoshtal reesht choud cheddin shirrey
 Dy chosney'n giat, ass niurin va leeideil
 Gys ard erbee, myr bare lesh rish meeiteil ;
 Lesh mooads troailt as pian hooar eh, ec y jerrey,
 Ayns mullagh niurin yn red v'eh dy hirrey.

Foast v'eh ayns dooyt er cre'n aght yioghe eh magh,
 Son dooint dy creoi ve neayr haink eh-hene er stiagh.
 Ooill'-niartal v'eh, as Ooilley-creeney neesht,
 Phoint lheid y dooney nagh voddagh eh ve brisht ;
 Three keayrtyr three dy fillaghyn ve jeant,—
 Three yiarn, three prash, as three jeh adamant,
 As bodjal aileagh mooie as sthie va lostey,
 Myr veagh son gard nagh beagh eh er ny osley.
 Er dagh cheu jeh'n yiat shilley eajee va,
 Jeh lheid y cummey, nagh vod v'er n'imraa ;
 Yn derrey yeh, ayns fakin, goll-rish ben,
 Seose er e cryss feer aalin aeg as glen :
 Agh sheese er shen, yn aght myr v'ee ny soie,
 Yindyssagh graney, agglagh 'skyn dagh nhee.
 V'ee 'skyn ve soylit gys shilley dy vel bio
 Ayns niurin ghoo, ny er y theihll gial shoh ;
 Ard-nieu pyshoonagh soillit va mimbee,

As moddee foalley lioree gullyrnee :

Tra bailliu hene v'ad roie stiagh ayns e breïn,
Nyn sp'rydyn jouylagh, gounstyrnee ayns shen.

As er y cheu elley shilley s'agglee v'ayn,
Red fegooish cummey, cassyn, mean, ny kione,
Gyn feill, gyn crackan, jeeaghyn craueagh v'eh,
Cruinnaght as fio't, myr starvit laccal bee ;
Red myr crown airh v'eh er e chione dy cheau,
Lheid y kione as v'er, 's gah baasoil ny laue.

Satan, nagh ghow rieu aggle foast roish nhee
Agh roish Jee as e Vac, cha creoit va 'chree,
Foast hass goaill yindys, smooïnaght cre, ny quoi
Va 'skyn dagh olk dy row ayns niurin sthie.
Yn veisht hug moostey, sheeyney sheese ny whail,
Yn gah 'roie trooid yn drogh-sp'ryd v'eh kiarail ;
Lesh eddin stannit dooyrt y traitoor rish :
Quoi as cre'n red oo s'loys m'y chumrail nish
Veih'n giat shid heose ? ny hrooid ta mish kiarail
(Oï nieu dty chree as pooar) my raad y ghoaill
Fegooish dty chied y veisht ! cur cooyl, fow voym,
My nee oo m'y ghreinnagh bee dty cherragh trome.

Hug y buggane ansoor : Oh nee shoh'n traitoor
Vrish shee ayns Niau ? Oï'n Ooilley-niartal pooar
Ren girree-magh, tayrn whilleen Ainle gloyroil
Dy hassoo lhiat, as kyndagh rish dty viol
Ta deyrit mayrt, dy hurranse kerragh dewil
Iurinagh ! kys s'loys dhyt veih pryssoon scapail ?
Mish vees dty phlague, son ta aym pooar veih Jee,
Dy ve'n noid s'jerree, nee uss as ooilley 'stroie ;
Agh y vuitch vrynnagh v'ec y yiat ren geam :
O Ayr ! O Vac ! cre'n cleayn ta er ghoaill greim
Erriu ny neesht ? yn ayr dy stroie e vac,
Ny'n mac yn ayr ! O ! scuirr-jee lheid yn olk.

Vac, cre'n vee-cheeayl t'er lhieneey er dty chree

Dy lhiggey'n gah dewil chee dty yeïd y stroie ?
 Fark-jee erriu, ta'n traas foast ry-hoï heet,
 Trooid corree Yee, bee shiuish as mish neesht, stroït.

Ny goan da Satan creoï as dor'ghey va,
 Moir geam Ayr as Mac ! enmyn joarree da ;—
 Cha nyrrys dhyts, dooyrt ee, ve er yarrood
 Mish, lurg wheesh dy heaghyn's t'ou er gholl trooid,
 Cooinee dy row dty chione ching, keayrt ayns niau,
 Mooar ren eh gatt dy r'ou son yindys daue ;
 Trooid traas'n cheu chiare jeh fosley ren jeh hene,
 As haink mish magh ass, my nhee aalin glen
 Dy dug oo graih dou : as my 'neen ooasle mayrt
 Ghow aynym taitnys, shassoo er dty phaart ;
 Bynney lhieu mee : agh uss 'skyn ooilley va
 Freayll sheshaght rhym dy follit, oie as laa.
 She peccah'n ennym cursit hug ad dou,
 Yn red hug uss, as mish, as ooilley mow.
 Eisht dirree caggey as v'ou er dty vrishey,
 Tilgit gys niurin uss, as mish, as ooilley.
 Ogher y yiat shoh, h'er cur ayns my laue,
 Dy reayll eh dooint still, mooar as gyere va'n raau ;
 Huitt mee eisht er-troailt ayns pian as êgin gyere,
 Yn errey joarree chost dou mooarane jeïr,
 As shid dty vac, vrish magh trooid my vreïn,
 Ayns cummey, mooads as aase, myr hee'oo ayns shen,
 As gah pyshoonagh mârish hug eh lesh,
 Baggirt toyrt-mow er dagh bio veeitys rish ;
 Cha leah as hooar eh eh-hene mooie 'syn aer,
 Myr v'eh ny Vac, va 'haynt dy ve ny Ayr,
 Er e Voir jannoo êgin ; as shoh 'vreed,
 Eer moddee foalley, nagh row rieu nyn lheid :
 Tra va mee chea veih, deïe mee magh, O Baase !
 Yn ennym cheddin hyndaa'n diunid, Baase !
 Nish, veih shoh, dynsee Satan e lessoon

Kys yioghe eh fosley ; e eddin ren gaase kiune.
 'Naght myr va'n ayr, va'n 'neen neesht ny traitoor ;
 As gys e wooishal hug ee da ansoor :

Ogher y yiat shoh, dooyrt ee, t'ayms veih Jee
 Lesh currym chion, nagh lhigg-in sp'ryd erbee
 Magh er dy bragh : my vac lesh y gah baaish
 Dy roie eh trooid, s'loys chebbal dooin tranlaase ;
 Agh c'wooad share eh ! cre ta shin lhiastyn da ?
 Cre vees nyn leagh son ve nyn slaveyn braa ?
 She Uss my Yishig, oo hug dou my vioys,
 Eisht cha nee dasyn, agh dhyts yeeagh-yms foays ;
 Uss, uss ver lhiat shin gys y seihll noa shen
 Raad yiow mayd soilshey sollys, as aer ghlen,
 As er shoh 'ghra yn ogher veih e cryss
 Ghow ee dy bieu ; cha nee da 'mack gyn-yss ;
 Pian as angaish v'eck ee hene y leaydey lh'ee
 Seose gys y yiat, nagh row agh gerrit vo'ee ;
 Yn grinney lajer hayrn ee seose lesh aash,
 Dy yannoo shen eck hene, er-lheh, va'n saase
 Yn ogher aghtal hyndaa ee ayns y ghlass,
 Scughey ny boltyn as dagh dooney ass ;
 Cha row shoh jeant ny sleaie nagh ren dagh jeigh
 Chelleeragh fosley, as faagail nyn yei
 Doarlish roymoil, dy voddagh armee slane
 Marchal ny hrooid, as markee rish dagh skian ;
 As shoh nish jeant, foast cha row niart ny schlei
 Ec y chenn vuitch, ny ec e mac, eh 'yeigh.

Yn mullagh foshlit, vrish y lostey seose
 Myr ass beal Ætna ny Vesuvius.
 Er oirr y choirrey'n noid ny hassoo foast,
 Rowlal 's e aigney moods e phian as cost ;
 Cha tushtagh v'eh dy row'n raad roish feer veayn,
 As troailt danjeyragh trooid y folmid feayn.
 Bione da'n ughtagh, liorish y chione-my-lhei,

Lesh v'eh roie êignit's chentyn ceaut ny yeï.

Niurin's ny seihill noa ass y dowin h'er tayrn,
 Foast s'mooar y fooillagh jeh still ta er-mayrn,
 Mooar 'skyn dagh towshan, lhean, liauyr, dowin as ard,
 Ny hrooid beign goll, ayns dor'ghys shirrey'n raad
 Falleays my voghe eh, chammah's v'echey roie
 'Sy reeriaght churstey, faagit nish ny yeï.
 Feiyf feer joarree roshtyn gys e chleaysh
 Veih'n rooym doo eajee faagit heese as heose,
 As chymmylt mysh ; raad ta dy chooilley rass
 Streeu noi ry hoï ; yn feayght t'ayn streeu noi'n chiass,
 Chirrym noi fliugh, kiare pooaryn niartal ad
 Gleck lesh nyn gooney, quoi smoo yiow dy raad.

Lhieu shoh ny floagyn, myr whilleen sidoor,
 's brinneenyn faase d'aile, aer, ushtey's ooir
 Cordail rish nyn ghooie, as nyn dummyd stoo,
 Beg, trome, mooar, eddrym, jeh daah bane ny doo ;
 Runt ny corneilagh, moandagh nonney gyere,
 Shliawin ny garroo ; ta'd shassoo lesh nyn gair
 Jeh'n dooie oc hene, 's cah noi dagh dooghys elley
 Trooid ooilley'n dowin vooar, myr ayns roon da cheilley ;
 Ny geayghyn stermagh cur bree ayns nyn skian,
 Getlagh 'sy dooid, cur ooilley bun-ry-skyn.

Myr ny croink gheinnee ayns Arabia,
 Caghlaa nyn lhiabbee myr t'an gheay chyndaa,
 Goanluckey troailtee sondagh mennick foue ;
 Nyn gamellyn, ad hene's nyn merchys lhieu :
 Ny myr yn sniaghtey sheebit lesh niart geayee,
 Ny floagyn streeu, nyn vud oc hene, quoi sleaie
 Lhieenys y coan, ny getlagh er dagh laue
 Dy phlooghey'n troailtagh s'loys eddin y chur daue ;
 Geayghyn stermagh, dorrin as byrrag ghyere,
 Geiyrt dredge y diunid d'etlagh trooid yn aer,
 Soaill't ayns y dor'ghys, myr mean bodjal chiu,

As jannoo taarnagh agglagh er-dy-rieau.

Shoh, shoh va'n feiyr quaagh ren y sp'ryd chumrail,
 Myr veagh ayns dooyt cre oddagh cheet ny whail,
 Agh kiarit, skeayl eh 'skianyn er y dooid,
 Cha goghe eh lhiettal, v'eh chee cosney trooid ;
 Er bodjal jaaghey, myr ayns coach goll seose
 Trooid cheeid y dor'ghys agglagh siyragh roish ;
 Thousaneyn meeiley, lurg shoh, huill eh rea
 Myr veagh er bodjal d'ushtey ny dy chay :

Agh doaltattym haink eh gys aer va kiune,
 Gyn geay, gyn aer dy uillian skian ny glioon.
 Feed thousane feiy liauyr huitt eh jeeragh sheese
 (Smerg da sheelnaue boght rieu dy daink eh neese)
 Myr bullad leoaie, as tuittym veagh eh choiee,
 As grunt cha beagh dy bragh, 'bey doardee Jee
 Da bodjal chiu, trome-torrhagh lesh lught geayee,
 Aile cheh as taarnagh, as ny chentyn sleaie,
 Ny ghrogh-luck dy vrishey fo ; as y gard
 Heid seose eh reesht, dy row eh nish cha ard
 Heose 'syn eaynagh, dy dooar e skianyn geay
 Er y drogh hyrrys d'etlagh reesht dy Leah.
 Myr smoo v'eh crossit, smoo v'eh creoghit er
 Yn olk v'eh mysh, myr ver shiu nish my-ner :

Stiure eh e skianyn foddey seose 'sy dooid,
 Cre woodas va heaghyn, kiarit hie eh trooid ;
 Trooid aer seiyt lesh aile, as ushtey seiyt lesh ooir,
 Trooid ooilley'n dredge fliugh, chirrym, cheh as feayr.
 Nish beign da getlagh as reesht roie ny snaue
 Scrabey ny 'oï lesh yngnyn cass as laue :

Myr lhong goaill son purt noï stroo tidey's gayll,
 Maidjyn shegin gymmyrt tra ta shiaull failleil.

Myr sodjey goll, er-lesh dy geayll eh thaish
 Myr coraa bioee, as ny syrjey gaase
 Myr sniessey da v'eh cheet, agh goo er-lheh

Cha dod eh 'hoiggal dy yannoo ymmyd jeh :
 Myr ec margey my t'ou er n'eaishtagh rish
 Cowag y chaglym, agh cha bee ayd fys
 Cre un ockle ta fer gra rish fer elley,
 Agh thassane mooar ooilley fud-y-cheilley :
 Lheid y kiaull ard shoh haink gys cleaysh y sp'ryd,
 Agh y coraa cha row da veg yn ymmyd.
 Er dagh red noa v'eh aignagh ghow eh baght
 Veih'n chiaull va roish, c'raad va'n folliaght.
 Dy daaney heeyn eh stiagh 'sy chummal ghoo,
 Raad hooar eh dor'ghys va ry-ennaght chiu.
 Ayns shen va Chaos, myr ree freayll e chooyrt,
 As e Chooinceil ghoo trooid-y-cheilley loayrt,
 Cha row fockle fuirraght rish fockle elley,
 As ayns y dooid cha rew ad fakin shilley.
 Ayns shen ree chaos, kione-reill y vee-reill,
 Da doaie ny aght, nagh jinnagh arnane geill ;
 Erskyn ooilley, jeh Taghyrt (fo'n ard-phooar)
 Va'n soiagh smoo trooid-magh y diunid vooar.
 She'n oie ghoo ghor'ghey shinney jeh dagh nhee
 (Agh ynrican yn Ooilley-niartal Jee)
 Rish lhiattee Chaos ; e skianyn skeaylt dy lhean
 Coodagh yn dowin, nagh brishagh laa sheese ayn.
 Hyndaa Satan dy daaney huc shoh, gra,—
 Sp'rydyn y ream ghoo va, as vees dy braa !
 Toig-jee nagh vel mish er heet hiu myr noid,
 Shaghrynagh mee, neu-hushtagh jeh my raad,
 Eignit veih heese dy hroailt my ynrican
 Trooid y ream vooar euish, dooys ta feer fadane ;
 O insh-jee dou nish, c'raad ta'n dooid baarail
 Er soilshey, 's vel mee stiurey jesh ny whail ?
 Ayns goan er-creau hug Chaos da ansoor :
 S'mie shione dooys uss Lah ; nagh nee oo'n traitoor
 Ren girree seose noi'n Ooilley-niartal ree

Ayns caggey foshlit, miolagh ymmodee
 D'ainleyn sollys d'hassoo, neesht, er dty heu,
 Va ayns dty chyndagh eebyrit veih niau ?
 Yn eam loshtagh euish, sheese tra huitt shiu shaghym,
 Woail y chooyrt aym's, as ooilley'n dowin ayns atchim ;
 Oh ! ayns dty chyndagh ta aym's mooarane coayl.
 Skian vooar jeh m'eiraght hoshiaght voym h'er goaill
 Trooid pooar ree niau, jeh shen va niurin crooit,
 As cursit, neesht, dy ve reeriaght cooie dhyt :
 Cha nee gys dt 'ooashley ny gys dty vaynrys te,
 Agh gys dty scammylt, torchagh, as anvea :
 As nish skian elley ta Jee er ghoail voym,
 Son seihll noa kiaddit da dy ve son rooym,
 Myr shen dy vel my ream lhean er ny spooilley ;
 Uss, as dty pheccah, s'kyndagh [rish] shoh ooilley.
 Cha vel liaee aym's (dooyrt Satan) er dty ghoan,
 Ny ta jeant rooin yioym cooilleen er y hon.
 Dy vaik-ins coayl yn seihll jeh t'ou er loayrt,
 Quoi ec ta fys nagh voddym corree 'choyrt
 Er y Chroodagh, 's yn seihll shen reesht hyndaa
 Sheese fo dty reill's, gyn ve goit void dy braa,
 Agh cur ansoor gys shen ny hirr mee ort,
 Cha veeu lhiam fuirraght arragh rhyt dy loayrt.
 Gow royd, dooyrt Chaos, stiure gys y laue chiare,
 Dty raad gys soilshey cha vel nish agh giare.
 Va shoh dy liooar, veih'n dooid chin vrish eh magh
 Ayns smooinaght share jeh'n chyrrys iurinagh,
 As shiaulley foddey syrjey seose 'syn aer,
 Falleays annoon (er-lesh) va brishey er.
 Myr syrjey stiurey trooid yn eaynagh faase,
 Va'n falleays aeg ny smoo ayns soilshey gaase ;
 Myr va'n soilshey, myr shen va'n sp'ryd goaill cree
 Dy roshtyn laa, as dy hreigeil yn oie.
 Myr shaghrynagh ayns kay as dooid tooilleil,

Trooid cronk as coan, e chree mennick failleil ;
 Jeean er y laa, veih'n oie, dy vrishey stiagh,
 Dy vod eh'n boallagh caillit 'gheddyn magh :
 Myr shen va Satan jeean er soilshey'n laa,
 Ny share dy roshtyn er e ghrogh yurnah.
 Nish y ghrian vannee scellal magh e phooar.
 Chemmal y dorraghys t'ayns y diunid vooar :
 As Satan shiaulley ayns yn aalican,
 Goaill taitnys mooar ayns goullyn gial y ghrian ;
 Tooryn ny maynrays hrog seose ayns e hilley,
 Voue hie eh roïe sheese gour e ching er tilgey ;
 As myr rollage va'n seihll noa jeeaghyn veih
 Liorish yn eayst ; ayns foddiaight ny yeï
 Feer jeean va 'chree : O s'maynrey veagh sheelnaue
 Nagh beagh eh foast er heet ny sniessey daue !
 Agh faag-ym d'reayst eh rowlal ayns e chleeau
 Kys bare nyn maynrays vooar y roostey jeu.

Hoilshey gloyroil, yn chied vees jeh'n chroo
 Mirrilagh oardit, 's rheynnit magh veih'n doo ;
 Roish my row aer, ny ooir, ny foast grian,
 V'ou uss myr goull jeh gloyr y chroodagh hene,
 Lesh scell beg jeeds ghow mish ayns laue jurnah
 Sheese trooid y diunid, er nagh vrish rieu laa ;
 Gys niurin agglagh, raad ta aggle reill
 'Sy yaloo feer ; as reesht back gys y theihll
 Aalin shoh wass : O nish jean my leeideil
 Gys eddin villish Adam dy veeiteil,
 Dy gheddyn fys cre'n miolagh haghyr da
 Leigh Yee y vrishey, hayrn er dourin bra.

Rish ooilley shoh, va'n Ooilley-niartal Jee
 Tushtagh jeh croutyn downin ny iurinee :
 Myr v'eh ny hoie ayns ooashley 'r stoyl-reeoil,
 Ard 'skyn dagh yrjid's 'skyn dagh gloyr gloyroil,
 Ny ainleyn bannee gennal chummit mysh,

Dy nee eh'n Jee Smoo-niartal v'ad goaill-rish :
 E Vac ennoil, E yaloo bynney lesh,
 Corrym ayns gloyr ny hoie ec e laue yesh.

Eisht by-chooidsave lesh jeeaghyn runt-my-geayrt,
 Er e chroo aalin ooilley ec un cheayrt ;
 Er y thaloo jeeaghyn, hug eh ayn my-ner
 Adam as Aue, nyn lomarcán 'sy ghaar',
 Ny-neesht gyn-loght, ayns graih dooie neesht da 'cheilley,
 Gyn orroo dooyt dy jebbagh nhee daue skielley.
 Eisht er niurin, as er y diunid veayn
 Ta eddyr niurin ghoo as soilshey'n ghrian,
 Hilg eh 'hilley, tra honnick eh'n ard-noid,
 Satan, er heeyney 'chione stiagh veih'n dooid
 S'y ghlassyntee chiune, eisht er skianyn lhean,
 Ayns yn aer hollys, stiurey lesh y ghrian :
 Un cheayrt dy dooar eh er cheu shoh jeh'n oie,
 Er-lesh ro chreoï da nagh row nhee erbee.
 Agh tushtey Yee, da nagh row veg gyn-uss,
 Hoig dy feer vie yn olk va Satan mysh,
 Ayns goan gerjoilagh rish e Vac ren loayrt :—
 My Vac, nagh vod oo tastey nish y choayrt
 Kys ta eulys vooar greinnagh yn drogh-yeih,
 Jeean er cooilleen, son ny v'er ny ghoaill veih.
 Hee oo nagh vod niurin, lesh e yiattyn loor,
 Ny beantys ghor'ghey whaagh y diunid vooar
 Eshyn y reayll, cha jeean t'eh er cooilleen,
 Agh ooill' e roon hyndaays foast er hene.
 Hee oo veih dagh geuley t'eh er vrishey stiagh
 Er ream y toilshey, lesh cree eulyssagh ;
 Caïd ta goanlys vooar greinnagh yn drogh-yeih,
 Er-chee cooilleen son ny t'er ny ghoaill veih !
 Er y theihll noa ta 'hooillyn soit dy gyere,
 As er y jees shen ta gyn-loght 'sy ghaar',
 Kiarail ad 'cleaynagh d'obbal leigh e Hiarn,

Mee y hreigeil, as lhiantyn huggey hene.
 As yiow eh aigney ; Adam nee geill da,
 Ga t'eh fo phian yn phian ta farraght braa ;
 Dooys, e Chroodagh, cha vod eh comys 'choyrt,
 Dinsh mee da churym, as cre yinnagh geiyrt
 Er e aillell ; myr shen ta echey 'reih
 Ve seyr ny deyr, trooid freayll ny brishey'n leigh.
 V'eh er ny chroo 'sy jalloo ain, goll-rooin
 Ayns cairys, creenaght, tushtey as resoon,
 Mârish dagh pooar fondagh, er-chee coyrle,
 Dy reayll my leigh noï niart dy chooilley viol ;
 Myr shen e lhieggey vees ny-chyndagh hene,
 As nee my leigh gyere gaggyrts er cooilleen.
 Tra chroo mee m'ainleyn ooilley va ayns niau,
 Gootyn sp'rydoil as gloyroil hug mee daue ;
 Cummalyn berchagh, trooid-magh ooilley'n ream,
 As plaaseyn reeoil ayns Jerusalem.
 As son y vaynrys foddey oc ayns shoh,
 V'ad jeant jeh stoo lheid as dy bra vees bio ;
 Agh er conaant va ooilley shoh jeant roo
 (As gys y chione shen ren mee ad y chroo)
 Dy vial hoods, dy hirveish oo nyn Ree
 Foym's Ooilley-niartal : jees shin agh un Jee.
 Myr t'ec y dooinney, va ec ainleyn pooar
 Dy reayll y stayd dy vaynrys v'oc ayns gloyr,
 Ny gys my leigh dy ve neu-viallagh,
 As veih nyn eiraght choiee ve giarit magh ;
 Nyn aigney hene va oc, nyn aigney free
 Dy lhiantyn gys, ny dy hreigeil nyn Ree.
 My Vac ennoil, dagh nhee dy ren mee 'yannoo
 Ayns niau ny niurin, faarkey mooar as thaloo,
 Veih'n ainle gial syrjey, gys y veishteig sloo,
 Gys my ghloyr hene v'ad as t'ad er nyn groo.
 Dy beign er chiaddagh ainleyn as sheelnaue,

Ayns lheid 'naght ta ny neu-resoonee ooilley,
 Nish cre'n ghloyr vooar voue oddym jerkal rish,
 Cre'n leagh veagh cair dou son nyn miallys ?
 Cha nee nyn aigney hene, cha nee resoon
 Leeid nyn shirveish, agh 'naght myr v'orroo beoyr ;
 Lesh slane aigney ren ad my leigh hreigeil,
 As voue hene va'n miolagh hayrn ad gys failleil.
 Myrgeddin dooinney, agh lesh y lheimys shoh,
 Ad viollee eshyn ; Dooinney eisht vees bio,
 Trooid my ghrayse, yiow Dooinney grayse as foayr,
 Agh son ny ainleyn, cha vel grayse nyn gour.
 Eishtagh yn Mac ren ginshlagh gys yn Ayr,
 As jannoo accan, myr shoh ghuee eh er :
 Ayr Ooilley-niartal meen, jean geaishtagh rhym
 Ass lieh heelnaue t'er-chee ve miolit voym ;
 Ga ta sheelnaue ec slane nyn reamys free,
 As kied oc lhiantyn, ny scarrey voïds nyn ree,
 Cha nee ayns goanlys t'eh laik tuittym voïd,
 Agh trooid niart miol as foalsaght vooar y noid ;
 Agh millish, millish ta'n fockle t'ou er ghra,
 Yiow Dooinney grayse voïd, cha bee eh caillit braa ;
 Niau as thalloo nee troggal kiaull lesh booise
 Hoods, son dty vieys ta whilleen as wheesh ;
 O s'treih dy beagh y Dooinney caillit choiee,
 Yn obbyr s'ooasle's share ren laueyn Yee
 Ayns y theihll noa ; Dooinney dty lhiannoo saa,
 Eh bynney lhiat, as er t'ou still gimraa !
 Va aynr jeh niau roïe spooilt trooid moyrn yn noid,
 As nish my nee eh sheelnaue 'volley voïd ;
 Lesh cre'n vooaralys, as goan mollaghtagh,
 Nee eh goltooan dty chreenaght son dy bragh ?
 Cre yn cooilleen vees echey er ree niau,
 Dy vel eh'r chosney'n seihll noa ass dty laue ?
 Lesh briwnys kiart t'ou harrish ooilley reill,

As trooid dty chreenaght vooar ta jeant yn seihll,
 Mârish ny t'ayn ; ny surr ny banglaneyn
 'Sy fraue dy fioghey feme dty vyghinyn,
 Slane mess heelnaue ve cursit ayns unnane
 Nagh vel kiarit dy obbal leigh e Hiarn,
 Agh myr vees eh miolit liorish y traitoor
 Va rieu gobbrough dty oï, as noï dty phooar.

Dy graihagh hug yn Ayr da'n Mac ansoor :—
 My Vac, my chreenaght, my ghoo as my phooar,
 Mie t'ou er loayrt myr va fys aym rolaue
 Er lhiogey Adam, as failleil heelnaue :
 Bione dou'n saase neesht ver couyr as feaysley daue.
 Cha bee sheelnaue foast caillit voïn dy bragh,
 My vees ad gys yn goo ayds biallagh ;
 Whilleen jeu as ver geill da conaant noa
 Nee uss daue 'hebbal, shickyrr bee ad bio.

Agh niau as thaloo, as dagh nhee t'ayndoo,
 Nee ooilley cherraght, roish my jean my Ghoo
 Failleil cooilleen, as ta'n leigh baggyrt baase ;
 Bioys shegin cherraght, my vow sheelnaue grayse.
 Quoi eisht jeh m'ainleyn graihagh ta ayns shoh
 Nee'n baase y reih, er graih sheelnaue ve bio ?
 Quoi ta cha giast'lagh as dy ghoaill er hene,
 Ny feeaghyn mooar t'er Adam dy chooilleen ?
 Fud theay ny maynrays cha row ry-gheddyn Fer,
 By-loys yn errey trome shen y ghoaill er.

Agh nish Mac Yee hene toiggal ooilley shoh,
 As fegooish lhiasagh nagh beagh Dooinney bio,
 Lheie sheese ayns accan, myghin as erreeish,
 Croym gys yn Ayr, reesht myr shoh loayr eh rish :
 Ayr, gys dty ghloyr hene chiaddee oo ny seihill
 As ny ta ayndoo, harrishdoo t'ou reill ;
 Agh 'skyn oc ooilley, Dooinney'n obbyr share,
 S'ooasle, as s'aaley ta dty hooill soit er ;

Lesh e heeloghe ta niau dy v'er ny lhieeney
 Ynnyd ny ainleyn va ass er nyn dilgey ;
 As lhig Uss ooilley'n Pargys mie shoh mow ?
 O Vriw yn theihll shen foddey void dy row :
 T'ou er chur dt'ockle dy der oo dasyn grayse,
 As bee eh deyrit son eer laccal saase
 Dy lhieeney'n leigh ? Mish, mish, O Ayr, nee shoh ;
 Surr-ym y baase, dy vod sheelnaue ve bio,
 Faag-ym my vaynrys, scar-ym rish my ghloyr
 Son bleeantyn liauyr, dy yannoo'n obbyr vooar.
 Deayrt magh dty chorree er dty Vac ennoil
 Eer gys y vaase, agh ymmyrk lesh y theihll.

Agh roish my voddym shoh 'chur lhiam gys kione,
 Shegin dou ve ayns y stayd ta Adam ayn ;
 My ghooiney foalley, annoon ayns aigney's cree,
 Agh seyr veih peccah 'naght myr ta my Yee.
 Eisht bee'm fondagh dy hassoo er-son raane,
 D'eeck yn farling sodjey d'anneeghyn t'ayn,
 As foddee'n baase mee 'hoailley ayns e lieen,
 Ooilley 'chleah chursit orrym y chooilleen ;
 E ghah pyshoonagh 'lhiggey trooid my chree,
 'S er-chee m'y horchagh ayns dagh pooar as bree,
 Dy m'y lhieggal sheese injil gys y lhiaght,
 As dy ve echey myr slane barriaght.

Pooar Ooilley-niartal, Ayr, t'ou er chur dou,
 Nagh surr yn challin ayns yn oaie dy lhoau,
 Ny m'annym glen dy ve ny chummyltagh
 Fo pooar y noid, ayns Niurin son dy bragh ;
 Trooid y phooar ayds, O Ayr, nee'm girree reesht,
 Laue'n eaghtyr aym, my noidyn ooilley brisht :
 Yn baase yiow lhott baaish, yn gah nee'm 'ghoail veih,
 As cha bee peccah ny smoo niart da'n leigh.
 Trogg-ym dty Nooghyn mârym seose gys niau,
 As ver uss cummal ny ainleyn caillit daue ;

Tra hee oo eh mie, bee niurin er ny ghooney
 Nagh vod eh sneih, dy bragh reesht, 'chur er dooinney.
 Nee oo mish y choamrey reesht, lesh moodads y ghloyr
 Yial va aym void, myr corrym rhyt ayns pooar :
 Bee gloyr ayns Niau, bee er y thaloo shee,
 Dty graih er Nooghyn cha jean feayraght choiee.

Eisht myr dagh maynrys, jeh dagh mie'n farrane,
 Lesh goullyn sollys er e Vac soilshean,
 Myr shoh coraa ; My Vac, my ghoo, my phooar,
 My chreenaght, neesht, my yaloo as my ghloyr,
 Mie t'ou er loayrt, giastyllagh dty chiarail,
 Feer ta dty ghraih chee Dooinney y hauail.
 Mish dt' Ayr ta booiagh, aynyds booiagh vee'm,
 As er dty ghraih, mirrilyn niartal nee'm :
 O my Vac graihagh, ta er ghoail ayns laue
 Dy lomarcan dy chionnaght resht sheelnaue,
 Ayns niau ny thaloo, tra nagh row ry-gheddyn
 Unnane ghoghe er dy yannoo'n vieys cheddin !
 S'mie ta fys ayd dy nynney lhiam yn croo,
 'S nagh nee ayns Dooinney ta my haitnys sloo,
 Ga s'jerree jeant ; son er e ghraih ta mee
 Booiagh paartail rhyts myr nagh beagh oo Jee
 Mârym veih rieu, son cha bee shen agh tra,
 Ny lurg bee oo aym reesht, mârym son dy braa.

Uss ynrican oddys ad 'chionnaght reesht,
 Gow'n eill oc ort hene, as nyn ghooghys neesht,
 Dy bee oo goll-roo, dty Ghooinney ayns dagh nhee,
 Cheu-mooie jeh peccah, nagh vod 've ayns Jee :

Agh ayns imbagh cooie vees shoh oilley jeant,
 Son nagh bee oyr ec cree'ghyn creoi dy phlaiynt ;
 Dty heet fud sleih vees mirril vooar er-lheh,
 Jeh Moidyn glen vees Mac Yee er ny <ruggey> [vreh] ;
 Veih'n Ven vees dt'eill, myr shen dy bee oo Dooinney,
 Fo cragh y vaase son kyndid sleih ny cruinney.

'Naght myr ayns Adam ooilley hoill y baase,
 She aynyds vees ad ooilley bio trooid grayse ;
 Trooid foill unnane haink cragh er ooilley'n kynney,
 Yn toilliu ayds nee'n kyndid ooilley 'ghlenney :
 Yn kyndid ocsyn nee veih peccah chea,
 Goaill uss son sambyl trooid-magh stayd nyn mea.

Myr shoh Dooinney, ayns ynnyd Dooinney, shegin Baase y
 hurranse, dy hassoo fo'n slane fine.

Bee oo er dty vriwnys, er dty churt gys baase,
 Dy chosney bea da Dooinney, she shoh'n saase.
 Dooint vees yn oaie ort, veih nee oo girree reesht,
 As eisht dty vraaraghyn nee oo 'hroggal neesht ;
 Dt' uill gheyr vees deayrtit dy hauail sheelnaue,
 As, trooid dty hoilliu, Niau vees cosnit daue.

Myr shoh laue'n eaghtyr yiow graih flaunyssagh,
 As shen ver mow dagh goanlys iurinagh :
 Adsyn nagh jean dty choyrle graysoil y ghoaill,
 Nagh gow grayse chebbit, faag ad fo nyn goayl.

Te inshlid vooar da Jee dy ghoaill er feill,
 Stoo annoon Adam, arryltagh d'ailleil ;
 Agh lheid yn inshlid, goit trooid giastyllys,
 Nee girree leah gys gloyr as reiltys.
 M' Ynrican Mac ! M'eirey ! Jee mârym rieu,
 Dty hoilliu mie ta ginsh dy vel oo feeu
 Jeh pooar as reill ; dy chooilley ghlioon 've croym
 Cur ammys dhyt : as yiow'n phooar ard shen voym,
 As gys y chione shoh hood ta mee livrey
 Dagh pooar, dagh bree, ta nish ny oddys 've
 Ayns niau, er 'thalloo, ny ayns niurin heese,
 Hood t'ad dy yeill nyn ammys as shirveish.
 Ainleyn, ard-ainleyn, princeyn, cherubin,
 Mienyn graysoil, chiarnys as seraphin :
 Adam as Aue mârish nyn slane sheeloghe ;
 Sp'rydyn y dor'ghys heese, as niurin vroghe ;

Ooilley'n croo mooar livreit ta gys dty reill,
 Hood Ooilley-niartal shegin da'n croo slane geill.
 Tra vees lhieent seose earroo ny Nooghyn bannit,
 As cormal coontey ny ainleyn treih va caillit,
 Hed oo royd reesht kionfenish gys y theihll,
 Thousaneyn d'ainleyn sollys ort waiteil,
 Tra ver oo'n sarey, Ard-ainle heidys cayrn,
 Vees er ny chlashtyn trooid dy chooilley aym
 Jeh'n croo ; ny oai'ghyn fosley lhan nyn meeal
 Livrey's ny merriu t'oc ayns nyn dreishteil,
 Veih ny kiare geayghyn dagh bio chaglit vees,
 As iur'nee vees eït veih nyn brysson neese ;
 Gys y vriwnys ayd shegin da ooilley cheet,
 Lesh feiyr y chayrn, cha Leah as vees ad eït :
 Er mie as sie ver uss dty vriwnys kiart,
 Gys niau dty Nooghyn cairagh ver oo lhiat.
 Ny sp'rydyn broghe gys niurin nee oo 'hyndaa,
 As peceee mâroo, fo cooilleen dy braa :
 Yn oaie as niurin vees dooint son dy bragh,
 As fud sheelnaue cha Jean ad arragh cragh.
 Tra hug yn Ayr vie jerrey er e ghoan
 (Ny s'miljey na mill va dagh fockle v'ayn),
 Ny ainleyn sollys, lesh un ard-choraa,
 Singal nyn giaull ving Allelujah,
 As myr veih earroo erskyn earroo, va
 Yn moylley feeu ; ren niau lesh boggey craa.
 Hilg ad nyn grownyn berchagh ooilley sheese
 Kiongoyrt rish stoyl yn Ooilley-niartal Jeeys ;
 Goail seose ad reeshtagh, lesh nyn ghreïnyn kiaull
 Arraneyn noa feer villish ren ad 'ghoail,
 Hoods ren ad kiaull, hoods ghow ad nyn arrane,
 Ta nish as va, as vees dy bragh er-mayrn.
 As reeshtagh hoods, ynrican Mac yn Ayr,
 E phooar, e chreenaght, as e Eirey cair,

Ghow ad arrane dy voylley as dy wooise,
 Ginsh magh dty ghiast'lys, as dty graih ta wheesh,
 Ayns goaill ort hene kerragh trome heelnaue,
 Er-chee saualtys mooar y chosney daue.
 Myr shoh ta ainleyn bannee ceau nyn draa
 Ayns graih sp'rydoil, as gennalys dy braa.
 Rish shoh va Satan guillian lesh y ghrian,
 Ny goullyn sollys noi e vaaish soilshean ;
 As ayns shoh v'echey oyr jeh yindys mooar
 (Foddey's gerrit ec e reayrt va pooar)
 Dy akin seose, sheese dagh boayl, hoal as wass,
 Fegooish scadoo va har, heear, twoaie as jiass ;
 Myr mean y touree, kiart er y vunlaa,
 Yn ghrian ard reill, dogh corp ta fegooish scaa ;
 Myr shen yn drogh sp'ryd cor'm rish yrjey'n ghrian,
 Fegooish scadoo dagh aym va gial soilshean :
 Er beinn ny greiney honnick eh ny hoie,
 Fer jeh shiaght ainleyn ta still fenish Yee,
 As raad dy vel yn Ynsagh jeh shoh loayrt,
 Uriel, da yn ennym t'er ny choyrt,
 Shoh'n ainle dooyrt Ean honnick eh ayns y ghrian,
 Gys giens reeoil cuirrey sheeloghe yn Eayn.
 'S myr oddys sp'ryd e chullee hene chaghlaa
 Gys y co-chaslys saillish, er-son traa,
 Ghow Satan nish er grooish ainle flaunyssagh,
 Ny share dy ollagh' 'chiarail mollaghtagh :
 Son er Uriel v'echey enn dy liooar,
 Veih'n earish vie, ayns niau, v'eh hene ayns pooar ;
 Gys y ghrian tra hayrn yn sp'ryd er-gerrey,
 Yn ainle gyn-loght yeeagh er myr veagh eh 'heshey :
 Myr va e chullee, ceaghlit va 'choraa,
 As dy foalsey loayr eh myr shoh, gra :—
 O Uriel ghial, ayd ta lheid y ghloyr
 Dy ve shirveishagh treishtit fo'n ard-phooar,

Ayd ta'n onnor dy hoilshagh aigney Yee
 Da seihlltee, chammah as da flaunysee,
 Nagh maynrey shin ! da Jee ta firrinagh !
 Myr nagh row'n ghreih veih niau h'er eebyrt magh ?
 Seraph gloyroil, trooid graih dy gheddyn fys
 Er ny seihill noa shoh, ta dou foast gyn-yss,
 As foddeeght ta aym, erskyn ooilley,
 Dy chur-my-ner yu cretoor ooasle Dooiney ;
 Lheid's ta'n Croodagh goaill wheesh dy haitnys ayn
 Dy chroo eh seihll dy vaynrys er e hon.
 Shoh'n elkin jeean aym, as shoh t'er my hayrn
 Neose (er-son tammylt) veih stoyl gloyroil my Hiarn ;
 Veih sheshaght ainleyn mie ; veih cherubim ;
 As veih'n slane enish villish t'er-my.skyn :
 Insh dou, Uriel, cre'n seihll t'eshyn ayn
 Dy vaik-ym eh, as eisht my vian vees lane ;
 Eisht chebb-ym moylley gys y Chroodagh mooar
 Son e chreenaght, e vieys, as e phooar
 Hilg ny traitooryn foalsey magh ass niau
 Gys niurin ghoo, yn pryssoon kiaddit daue,
 As t'er chroo Dooiney dy vod e heeloghe cair
 Cheet seose nyn ynnyd, dy hirveish Jee ny share.
 Cairal ta 'raaidyn, creeney neesht e Ghoo,
 Pooar Ooilley-niartal heem ayns y slane croo.
 Myr shoh, dy brynnagh, loayr yn ard-volteyr,
 Son dooiney ny ainle, lesh pooar nyn shilley gyere,
 Cha vod craueeght-oalsey 'gheddyn magh,
 Son wheesh nagh vod ad 'sy chree jeeaghyn stiagh,
 [Craueeght-oalsey ynrycan yn peccah
 Ta freayll pyshoon dewil ayns y chree ta echey ;]
 Ynrycan Jee hene oddys tastey 'choyrt
 Da'n peccah jouylagh shen, jeh ta shin loayrt ;
 As foast t'eh surranse da'n olk shoh ve ayn,
 Dy vod eh 'chiarail follit 'chur gys kione.
 Lesh shoh, Uriel ôney v'er ny volley,
 Gyn olk smooineaght, e hooillyn v'er ny ghoalley

Nagh dug eh geill da foalsaght y traitoor,
 Agh dy graihagh hug eshyn da ansoor :

Ainle hollys, dooyrt eh, s'mie ta dty yeeearree cree
 Dy chur-my-ner obbraghyn creeney Yee,
 Er-chee ard-voylley 'hebbal gys e laue
 Ren ooilley 'yannoo, 's hug nyn gummey daue,
 Cha yindyssagh t'ad, as cha creeney jeant,
 Nagh vod y vriwnys s' gyerey orroo plaiynt :
 Agh quoi'n cretoor oddys ve tushtagh jeu,
 Jeh'n earroo mooar oc, as nyn ymmyd lhieu ?

Honnick mee'n traas va'n diunid doo as feayn,
 Gyn aer, gyn aile, gyn thaloo as gyn keayn :
 Gyn soilshey neesht ; as foast v'ad ooilley ayn
 Myr dredge brenneeinagh, floagagh, fegooish kione ;
 Dagh nhee t'er lneh nish, eisht va fud-y-cheilley,
 As dor'ghys quaagh va sheeynt lhean harrish ooilley.
 Agh trooid Goo creeney'n Ooilley-niartal Ayr,
 Va'n dredge vrenneeinagh er ny hayrn gys kiare
 Dooghyssyn cooie, aer, aile, ushtey, as ooir,
 Dy ve fuinnt cooidjagh son stoo dagh cretoor :
 Dy loayrt jeh ny seihill gial ta mygeayrt y mooin,
 Grian gloyroil as eayst, mârish rollageyn,
 Yn earroo oc t'erskyn dagh earroo mooar,
 Chaillagh shin traas, ta ny ta graït dy liooar.
 Jeeagh er y chruinney runt shid foddey voïn
 Injil jeh'n eayst vane, sniessey t'er-e-skyn
 Jeh dagh seihll elley, as myr rollage te gial,
 Yn ghrian soilshean er, myr er lieh jeh'n voayl,
 Ny'n derrey-heu, as myr shen jannoo laa
 Ayn cheet as goll, as towse dy kiart y traas :
 Da'n cheu elley (yn agh myr doardee Jee)
 Ta'n eayst ceau falleays gennal ayns yn oie.

Yn spoht beg shid hee oo har jeh baare my vair
 Edin ; yn raad yiow'n Dooiney sthie ayns gaar',

Pargys enmyssit. Cha loayr-ym rhyt ny smoo,
 Eit er my churrym, gys Jee faag-ym oo.
 Shoh graït, chroym Satan injil sheese e chione
 Cur dasyn booise, 'naght myr va'n cliaghtey v'ayn ;
 As er e skianyn reesht ghow eh 'yurnah,
 Trubbyl dy row eh er choayl wheesh jeh'n traa.

O dy beagh raau e breeoil ec nyn chied Ayr,
 Va fooast gyn-loght, goaill eunys ayns y ghaar' !
 Dy row e noid dewil tayrn cha faggys da
 Er-chee e vaynrys 'roostey jeh dy braa ;
 Lheid y raau e agglagh as va er ny choyrt
 Da seihlltee liorish y Noo, myr shoh loayrt :—
 Smerg da fir-vaghee'n ooir's fir-vaghee'n tonn,
 Son ta'n jouyl er heet neose hiu lane dy roon,
 Myr v'echey fys nagh row eh ayns e phooar
 Dy ghoaill cooilleen erbee er Jee ny ghloyr,
 Hilg eh dy chloie e phaart noï slane sheelnaue
 (Ayns ynnyd Jee) dy chur mow jannoo 'Laue,
 Ny-yeih cooinsheanse va geam, myr gleck ny oï,
 Son ny v'eh mysh, as son ny va jeant roïe ;
 Greain, mee-hreishteil, as dooyt mooar ghow er greim,
 E chooinsheanse, dooisht nish, noï e yannoo geam,
 Angaishagh cooinaght er y stayd v'eh ayn,
 As cairagh gennaght nish pian er y hon ;
 Va shoh myr niurin lostey ayns e chleeau,
 Ginsh da cre'n kerragh sodjey va er fieau :
 Er Edin jeeaghyn nish flaoill ayns e hilley,
 Eunyssagh aalin, mie myr flaunys elley ;
 Reeshtagh er niau, as er y ghrian gloyroil,
 Ta fordrail soilshey gial da ooilley'n seihll.
 Lesh angaish laadit vrish eh magh coraa,
 Soilshagh yn sterrym v'ayns e chleeau chyndaa.

O ghrian yial, dooyrt eh, ta 'syn yrjey reill
 Fo'n Ooillee-niartal, soilshagh trooid y theihll,

Er ta e ghraih, as ayn ta haitnys wheesh,
 Dy negin da'n ghloyr ayds troait ayns e hirveish ;
 Hoods ta mee geam ; cha nee ayns graih agh dwoaie,
 Noidys as feoh, roon, troo, as eulys dt' oï ;
 Son ta dty ghoullyn sollys (moom soilshean)
 Goltooran mee lesh y ghloyr va keayrt aym pene ;
 My phooar v'er dty skyn, my ghloyr as gillid neesht,
 Gys liorish moyrn ardalagh va mee brisht.

Noi'n Ooilley-niartal prow mee my hratoor,
 Noi'n vie nagh hoill voym rieu lheid yn ansoor,
 Agh ren m'y chroo ayns ooashley ard as gloayr,
 As hrog mee neesht 'skyn millaghyn ayns pooar :
 Son ooilley 'vie cha row eh shirr' agh booise,
 Eddrym va'n eeck, as aashagh va'n chirveish !
 Ooilley 'vieys gys olk ren mee hyndaa—
 Ooilley e ghraih gys noidys son dy braa.

O chretoor broghe ! quoi er oddys oo plaiynt ?
 Va'n mainshtyr mie, neu-chenjal va'n charvaant !
 Nish graih as noidys dooys ta myr unnane,
 Orrym cha vod grayse Yee dy bragh soilshean.
 Cursit dy row graih, cursit neesht mee hene,
 M'aigney v'aym seyr, lesh m'aigney goym cooilleen :
 Agh kys nee'm chea dy haghney corree Yee ?
 Cha nione dou aght, cha nione dou saase erbee.
 Niurin my chron, cha voddym veih scapail,
 Te cheu-sthie jeem as getlagh leah my whail :
 'Sy diunid neesht, yn raad shegin dou chyndaa.
 (Tra oardys Jee niau), ayn dy ve dy braa.
 Agh vel pardoon ny grayse ec Jee my chour ?
 Cha vel, gyn m'aigney 'inshlagh gys e phooar :
 Ogh-cha-nee ! yn raa gyere shen ta roie
 Stiagh trooid my chree, ny s'piantee dou na stroie,
 Myr agglit d'eeck da ammys arryltagh,
 As shen red nagh vod ve shirveish firrinagh ;

Cre'n aash veagh aym nyn vud ren mee y hayrn
 (Lesh wheesh dy yialdyn) dy hreigeil nyn Jiarn ?
 Dy lhiggin sheese yn shick'rys hug mee daue,
 Ayns spiyt da Jee, cooilleen 'ghoail er sheelnaue,
 S'beg fys oc cre'n angaish ta ayns my chree,
 Nagh row aym pooar barriaght 'ghoail er Jee
 Myr va my hreisht, as 'naght myr yiall mee daue,
 Agh va shin mollit er dy chooilley laue.
 Foast, ta mee kiarit ; cha vow eh voym my ghlioon,
 Chamoo nee'm lhoobey huggey son pardoons :
 Hee'm gys nyn sneih dy vel shin giarit magh,
 Deyrit trooid briwnys gyere yn vainshtreilagh.
 Foast, cha vel Jee ny s'melley dooys dy leih,
 Nagh beem's cha doillee leih y chaaney veih :
 Cummaltee noa cour niau ta hannah reiht,
 As noidyn foshlit nish lhig dooin ve eit.
 Ayns ynyd treisht lhig mee-hreishteil goll lhiam,
 Dagh mie nish caillit, lhig da olk ve aym ;
 Olk vees my vie, ny hrooid ta mee treishteil
 Rish Jee ve cor'm 'sy theihll noa foastagh reill.
 Ec shoh y ghra, daase eh ayns moayrn as roon,
 Eulys as noidys, nieu dewil as pyshoon
 Noi'n Ooilley-niartal, as noi jannoo 'laue—
 'Skyn ooilley kiarit dy chur mow sheelnaue ;
 Slane olkys niurin lostey ayn cheu-sthie,
 Lesh wheesh dy phian as tra v'eh ayn ny lhie.
 Angaish hug skian Leah da, dy etlagh sheese,
 Gys Eden aalin, 's voalley ard Phargys.
 Va roa 'skyn roa dy viljyn chymmylt mysh,
 Dagh dooie dy vel 'sy theihll son mie ny mess ;
 Ard er-e-skyn va'n voalley lajer roie,
 Veih va ec Adam shilley'n ream cheu-mooie,
 Ard 'skyn shen reesht va gaase dagh dooghys billey,
 Messoil as mie, gys ymyd's beaghey ooilley,
 Millish da'n veal, as aalin gys y shilley.

As allaghyn rea chemmit lesh dagh blaa
 Jeh whilleen daah, nagh vod v'er ny imraa,
 Millish da'n stroin, eunyssagh da'n thooill,
 Gyn jolg, gyn gah, dy ghortagh loaght ny shooyl.
 Dy loayrt jeh'n gharey shen, 'naght myr ve feeu,
 Ta doillee da chengey loayrt, ny pen dy scrieu ;
 Un dorrys v'er va leeideil ayn veih'n shiar,
 As Gabriel er-son gard va pointit er :
 Foast cha duirree'n sp'ryd rish yn giat y ghoail,
 Agh, myr v'eh maarliagh, harrish lheim eh'n voal ;
 Eisht er y villey byrjey v'ayns y ghaar',
 Ayns cummey feeagh doo, hoie eh cur-my-ner
 Dagh nhee va fo, dagh nhee mygeayrt y mysh,
 Trooid-magh yn eunys vooar va ayns Pargys.
 Pargys ! yn gaar' ren Creenaght hene y hoiagh,
 Dy lhieeney'n thooill 's dy yannoo'n aigney booiagh ;
 Raad v'ec Satan fo roshtyn glen e reayrt,
 Niau hene er 'laare, ayns rooym beg, runt mygeayrt.
 Billey'n vea va gaase ard ayns y vean,
 Ghow eh myr reih sheese er dy chroymmey 'skian,
 Liorish shoh va billey yn tushtey gaase,
 Sarit veih Adam fo phine trome y vaase ;
 As ga va'n noid ny hoie er billey'n vea,
 Er y vie graysoil v'ayn va echey feoh.
 Veih shen v'eh ronsagh magh lesh shilley gyere,
 Dy chooilley alley eunyssagh as bayr,
 Coan dowin as cronk ard dy row ayns y ghaar',
 Raad va dagh shilley ny share as ny share.
 Cha row'n gaar' laccal nhee va eunyssagh,
 Palchey as berchagh, feeu v'er-mayrn dy bragh :
 Agh da veg jeu shoh s'beg geill v'ec y spyrryd,
 S'coan er nyn ghraih v'eh ronsagh mayd yn ynnyd,
 Agh er graih'n jees, da'n cheeloghe oc va kiarit.
 Yn eiraght vannee echey hene va caillit.

Cretooryn noa v'ayn er dy chooilley laue,
 Paart shooyl, paart getlagh, paart er thaloo snaue,
 Ayns niurin lheid nagh vaik e hooillyn rieu,
 Ooilley cur oyr da dy ghoail yindys jeu.

As lesh e ronsagh (gys bishagh smoo e hroo)
 Heese injil fo chronnee eh'n Chubbyl Noo,
 Aalin as ooasle, 'skyn ny bioee v'ayn,
 Myr harrish ooilley feeu dy ve'n ard-chione.
 Va jalloo'n Croodagh grainnit ayns nyn maaish,
 Firrinys, cairys, creenaght, graih as grayse ;
 As foast nyn ghooghys cha row goll-ry-cheilley,
 Va'n derrey yeh oc lheimys veih'n jeh elley ;
 V'eshyn chee schleï, pooar, reill as dunnallys,
 Ish myr son milljid, graih as biallys ;
 Dy hirveish Jee va'n Dooiney 'skyn dagh nhee,
 Yn Ven, ny hrooidsyn, tushtagh va jeh Jee.

Rooisht va'd ny-neesht, as cha row ad chea
 Veih sooill erbee, nearey cha bione daue eh ;
 Son cha row shen ta coontit nish neu-yesh
 Sollit trooid peccah, ta tayrn nearey lesh.
 Shoh'n cubbyl s'aaley ren laue Yee y chroo,
 Fud e chtetooryn cha row veg goll-roo
 Shooyl laue ry laue, v'ad glen, nyn aigney seyr
 Veih dagh failleil ta cur er graih gaase feayr.
 Va'n ghraih oc dooie, sheshoil, mie, foast ve jeean
 Dy choyr't 's dy ghoail nhee cooie da Dooiney's Ben :
 Cha nee trooid saynt dy lhieney aigney'n eill,
 Agh er graih currym dy vishagh cloan 'sy theihll.

Fo scaa ny biljyn, er 'laare hoie ad sheese,
 Dagh mess berchagh ren bee as jough shirveish
 Shibber slayntoil, as cha row gennallys,
 Ny cloie gyn-loght, ry-laccal dauesyn nish,
 Lheid shen's va cooie da lannoon aeg noa poost,
 Gyn smooineaght er cre oddagh taghyrt foast.

Maase meen y vagher, as beïyn feïe ny keylley,
 Cloie chummit moo gyn chebbal olk ny skielley,
 Noidys ny dewilys, coardit v'adsyn ooilley ;
 Son choud's va Dooinney biallagh gys Jee,
 Va dagh cretoor ry-cheilley still ayns shee.

Va'n anmys er, cour bioee goll gys fea,
 As Adam neesht, roish olk cha row imnea.
 Nish tra va Satan ronsagh lesh e hooill
 Trooid-magh y garey, alley bayr as cooill,
 Honnick eh'n Dooinney as e heshey dooie,
 Ayns stayd dy vaynrys 'naght myr v'eh hene roïe ;
 Hass eh goaill yindys, troo vrish magh ayns goan,
 Soilshagh cre'n seaghyn mooar va 'aigney ayn.

O Iurin ! dooyrt eh, cre shid hee'm heese foym ?
 Nee shid y sthock oc ta dy ghoaill my room
 Ayns ream ny maynrys ? Torchagh aile as pian
 Neem's choïee y hurranse, roish my surr-ym shen.

O ! chubbyl maynrey ! s'beg, s'beg ta fys eu
 Dy vel y noid cha faggys diu ec laue ;
 Gow-jee nyn eunys, myr smoo nee shiu goaill
 Smoo vees nyn sneih, tra nee shiu eh y choayl.

Choud shoh'n drogh-yeih, as getlagh jeh'n vanglane
 Sheese fud ny bielloo, beg, mooar, doo as bane,
 Ayns shoh v'eh moddey, ayns shen kerrey vane,
 Nish v'eh ny lion, chelleeragh v'eh ny eayn ;
 As son nagh jinnagh Adam tastey da,
 Gys whilleen cummey v'eh er ny hyndaa,
 Keayrt veagh eh cabbyl, assyl, mule, ny booa,
 Caghlaa e chummey gys dagh cretoor bio :
 As tayrn ny sniessey er-chee geddyn-magh
 Pooar feer heelnaue 's e ghooghys firrinagh,
 Myr shen dy geayll eh Adam coyrlagh Aue,
 Mychione yn leigh gyere hug nyn Groodagh daue :
 Jeh bree'n conaant v'oc v'eh jeant tushtagh nish,

Cre'n aght dy chummey 'violagh cordail rish.

Jee graysoil da, as graihagh er e chloan
 Oney, 's meehushtagh jeh'n danjeyr v'ad ayn,
 Hug ainle gloyroil er chaght'raght huc veih niau,
 Mychione y stayd oc, dy chur coyrle vie daue.

O Ghooiney ! dooyrt eh, laue Yee ren dty yannoo
 Ayns stayd, lesh pooar, dy huittym ny dy hassoo,
 Dy vel oo maynrey gioot dty chroodagh eh,
 Dy ve still myr shen ayns dty reih hene te.

O s'maynrey oo ! choud as t'ou biallagh
 Gys leigh dty Yee, lesh aigney arryltagh :
 Nish er conaant ta'n vaynrys vooar shoh ayd,
 My t'ou dy vrish' eh, oo hene ta goaill y kied ;
 Ny smooinee, eisht, dy vel oo er dty yannoo
 Fo lheid y kiangley as dy nhegin dhyt shassoo ;
 Cre'n aill t'er mainshtyr dy eeck da'n charvaant,
 Son y chirveish shen nagh vod agh ve jeant ?

Ny ee jeh'n villey, shen bree mooar y leigh,
 My t'ou gee jeh, eisht jerk rish kerragh veih ;
 Yn baase y phian, jeu shoh ta ayd dty reih.
 Uss as ny ainleyn sollys ta ayns niau
 Fo'n un chonaant ta, ta shin fo'n un ghaue.
 Hug Jee leigh dooin, eh my nee mayd y reayll
 Aignagh, creeoil, eisht niau vees choiee nyn vaill.

Gys my Vac (dooyrt Jee) cur-jee biallys,
 M' ynrican Mac, ta shin dy akin nish :
 As ad nagh bee da'n leigh shoh biallagh,
 Vees tilgit magh ass maynrys son dy bragh.
 Shin hug da geill ta kinjagh freayll nyn stayd,
 As ad nagh dug t'er duittym fo moads laad,
 Fo corree Yee, torchagh, angaish as craïd :
 As she shoh'n choyrle ta mish livrey lieh Yee,
 E leigh y reayll dy aignagh lesh dty chree.

Prince ny traitooryn brishey ass pryssoon

Jeean er cooilleen ; lane eulys troo as roon
 Noï Jee as dt'oi's ; as t'eh mygeayrt gyn-yss,
 Er-chee dty violagh veih dty viallys,
 Dy vod oo ve ayns yn un stayd rish hene,
 Fo corree dt' Ayr, ayns torchagh aile as pian.
 As ga nagh vod eh cooilleen 'ghoail er Jee
 T'eh cloie gyere orts ; as bee eisht er dty hee,
 Son jeean t'eh uss as dty heeloghe y stroie.
 As mannagh jean oo'n choyrle vie shoh y ghoail,
 Bee oo hene's dty chloan, gyn dooyt, dy braa fo'n coayl :
 Jeh dty ghanjeyr ta tushtey fondagh ayd,
 Cre vees dty leshtal, my skyrrys oo veih'n raad.
 Lheid y raaue mie shoh hug y Seraph da,
 As gys e churym ren eh reesht chyndaa.

Va Adam, roïe, kiarit dy reayll y sarey
 Hooar eh veih Jee, myr curym ayns y gharey :
 Nish tushtagh jeant dy row noid niartal echey,
 Trooid miol, ny crout, dy leeideil eh gys peccah ;
 Dy row graih Yee ersyn cha jeean, cha cheh,
 Dy dug eh ainle er chaght'ragh sodjey jeh ;
 E ghraih va greinnit, 's 'chiarail daase ny smoo,
 Noï lheid y noid's va chee sheelnaue 'chur mow ;
 Ayns goan graihoil loayr eh rish Aue, as gra,—
 My ghraih, my heshey, as my gherjagh braa,
 Dinsh mish dhyts roïe cre'n raaue gyere v'ain veih Jee,
 Jeh lheid y billey nagh jinnagh shinyn gee ;
 Curym feer aashagh, agh foast trome ta'n pian
 Shegin dooin lhie fo, my nee mayd failleil ayn ;
 As nish, veih'n ainle, ny sodjey ta ain fys
 Dy vel noid dewil er-gerrey dooin gyn-yss,
 Gioal shin y hayrn veih biallys gys Jee,
 As, myr t'eh hene, dy bra ve er nyn stroie.
 My ver mayd geill da, cha bee leshtal ain
 Dy nee meehushtey skyndagh rish nyn bian.

Baase t'er ny vaggyrt ! gyn dooyrt sharroo te,
 Veih olk gyn-yss dooin, my ghraih, lhig dooin chea ;
 Son fo my huitt mayd, quoi nee nyn livrey ?

My graih, dooyrt Aue rish, fakin dy vel Jee
 Er stowal orrin palchey jeh dagh nee,
 Millish, as mie neesht, dooin dy veaghey er,
 Magh veih'n un villey shen t'ayns mean y ghaar',
 (As fort ve shaghnit) cairagh ta da Jee,
 My ver mayd saynt da shin y aagail mooie.
 Jee ren nyn yannoo, ta shin fo e phooar,
 Eisht veih dy huittym vees dooin peccah mooar.

Uss my leeideilagh, my choyrle, as my chione,
 Dt' egoosh cre'n ymyd ta mee er y hon ?
 Craue jeh dty chraueyn mee, as feill jeh dt' eill,
 Dhyts liorish dooghys oardit dy chur geill ;
 Uss shirveish Jee, dty hrooids shirveish-yms Eh.
 E-lane-fo'n noid, neayr ta fys ain cre t'eh.

Boggey ghow Adam dy row e heshey dooie
 Tushtagh jeh 'currym, as myr shoh dooyrt eh r'ee :—
 Sthock palchey'n theihll, oo toshiaght slane sheelnaue,
 Dy ve Moir as sambyl sollys daue !
 O s'maynrey shin ! lhig dooin gyn maynrys smoo
 Dy bragh y eearree, booise da nyn Ver-croo.
 As nish va'n ghrian er roie sheese ass nyn shilley,
 Yn scadoo skeayley er yn inshlid ooilley ;
 Yn traa ren geam daue veih nyn stuill dy arragh'
 Gys boayl, roie reiht oc, jesh son shamyr-lhiabbagh.

Laue-ry-laue walkal stiagh lesh mean ny keylley,
 Coan injil, rea, as aalin haink ayns nyn shilley ;
 Awin sollys glass 'sy vean sheese siyragh roie,
 As palchey eeastyn ayns dagh aghlish cloie.

Trooid ooilley'n coan, veih'n yrjid gys y trah,
 Va gaase poseenyn jeh dy chooilley ghaah,
 As spiceyn berchagh, oasle ayns nyn mlass,

Paart glass, paart appee, as part gymmyrk' rass :
 Boayl v'er y vroogh soit lesh ny biljyn share,
 S'aaley as s'miljey, goan nyn lheid 'sy ghaar' ;
 Banglaneyn aalin gaase ard er-nyn-skyn
 Feeit trooid-y-cheilley, 's ooilley glass veih'n vun,
 Poseenyn millish, as dagh dooghys blaa,
 Fordrail nyn eunys chammah oie as laa ;
 Baagh ny beishteig, edyr trooid graih ny beoyn,
 Cha b'loys daue past'ral mysh yn ynnyd shen :
 Un dorrays v'er da'n lannoon dy heet stiagh,
 As ooilley sauchey gys traa ragh ad magh,
 Blaaghyn's poseenyn, pluckit veih dagh croww,
 Ren Aue y heiy dy yannoo lhiabbee jeu ;
 As eisht hrog Adam 'laueyn seose, cur booise
 Da Jee son gootyn va whilleen as wheesh.
 Lurg shoh, ayns graih, lhie'n lannoon millish sheese,
 Er loght cha beg cha row foast lheid y jees :
 Lhiurid y laa va greinnagh ad gys aash,
 As cadley kiune hilg seadoo er nyn maaish.

Shoh, shoh va'n oie gheid Satan orroo stiagh,
 Ayns jalloo toad, beishteig ghoo pyshoonagh,
 Snaue gys cleaysh Aue, heid eh stiagh ayns e kione
 E pheccah hene, mee-viallys as moyrn.

Veih shoh, dreamal, er-lhiee dy daink fer stiagh
 Ayns cummey Adam, e graih firrinagh
 As, tayrn er-gerrey, dy ghow eh ee er 'laue,
 Gra, Nee shoh'n nhee mie ta er ny enmys Aue ?
 O shilley ooasle ! yn aalid smoo 'sy chroo,
 Cha nyrrys mood dy vel ny bioee troo :

Trog ort, hooïn lhiam, as jeeagh-ym dhyt y phooar
 Nee dt'aalid 'vishagh myr ta'n ghrian ayns gloyr.
 Er-lhiee dy nee Adam v'ayn, deiyr ee er
 (Va'n eayst ceau solllys gial er ooilley'n gaar') ,
 Eisht hug eh lesh ee foddey sodjey shiar,

Raad va billey feeu j'ee dy chur-my-ner ;
 Shoh Billey'n tushtey, dooyrt eh, ayn ta bree
 Dy yannoo Jeeghyn jeusyn nee jeh gee.
 Eisht ass yn ooir three bioee dirree neese,
 Doo graney ayns nyn gullyr, 's eajee ayns nyn ghrooish,
 Gyn doaie, gyn cummey, gyn jalloo nhee va bio,
 Agh ooilley agglagh, yindyssagh as noa,
 Jollyssagh jooigh, eisht, gyndyr er y villey,
 Myr smoo v'ad gee wheesh shen v'ad ny s'gilley ;
 Bwaagh aalin daase ad, myr ny chaght'ryn vees
 Cliaghtey cheet neose veih'n yrjey gys Pargys ;
 Ceaghlit myr shoh, er skianyn bwee myr airh
 Getlagh gys yrjey, lheie ad er-sooyl 'syn aer.

As shoh yn dreamal yindyssagh ren Aue,
 Ghooisht ee ayns aggle, trubbyl mooar as creau.
 Yn dreamal slane inshit da Adam va,
 Ayns lheid ny goan shoh hug eh j'ee chyndaa :—

O Aue, my gherjagh ! agglagh ta dty ghreamal,
 Ro ghowin as dorraghey te dy insh e veanal,
 Agh er y noid broghe dy jig y lhag-chron,
 My hig lheid jeh, as cha nee er dty chione.
 My ghraih, bee kiune, dty hauchys mâryms ta,
 Ayns m'oghrish lhie, as ceau yn oie gy'n laa.

Tra va'n ghrian ghial er chooilleeney 'yurnah,
 Reeshtagh, veih'n shiar, mârish dy daink y laa
 Gys sooill ny greiney Eden ooilley rooisht,
 Dy vrish ny goullyn stiagh 'sy chiamyr-phoost ;
 Honnick Adam dy row eh nish ard traa,
 Dy irree moghey veih e lhiabbee-vlaa :
 Hie adsyn magh veih dorrys y chabbane,
 As heb ad oural aignagh gys y Chiarn.

Eisht loayr yn Ayr vie rish nyn Mwarree, gra,—
 Goot Yee, my heshey-coonee oie as laa,
 Nish gys nyn obbyr, ta traa orrin geam,

'S gyn ve oardit, hee mayd hene y feme.

Shid biljyn-feeeyney annoon tuittym sheese,
 Nyn messyn loau fegooish nyn gooney vees,
 Boayl elley hee mayd biljyn-ooylagh croym,
 Aarloo dy vrishey fo nyn mess cha trome,
 Banglane ro voyrnagh gaase chionn er e heshey
 Shegin da ve brisht, ny cast gys ynnyd elley ;
 Obbraghyn elley ta feme trooid y ghaar',
 Jesh dy ve jeant, ayns allee raad as bayr :
 Obbyr aashagh ! foast ymmyrchagh ve jeant,
 As er nyn vaill cha bee oyr ain dy phlaiynt ;
 Ta tra ry-heet foast, ayn ver Jee dooin cloan,
 'S laueyn gys obbyr cha bee arragh goan.

My ghraih, dooyrt Aue, my nee oo my choyrle y ghoail
 Rheyinn mayd yn obbyr, ny slooid ayns un voayl
 Coojdjagh my vees mayd, tra nee surranse coayl ;
 Jeem's vees ayds boggey, rhyts beem's booiagh cloie,
 Shen aashagh jeant ve, faagit gys yn oie ;
 Gow uss ny biljyn gys dty churrym hene,
 Goymys ny poseenyn as ny blaaghyn meein,
 As ec nyn mwaag reesht, munlaa, meeit-yms rhyt,
 'S jeh messyn millish jinnair aarl-ym dhyt.

Ta'n ard-traitoor er vrishey ass pryssoon,
 Lane eulys, olkys, noidys as pyshoon ;
 T'eh tushtagh jeant dy vel niau caillit choiee,
 's noi'n Ooill'-niartal nagh vel cooilleen erbee :
 As tra nagh vod eh'n cooilleen shen y ghoail,
 T'eh gioall-er shin nyn maynrys neesht y choayl.

Dy vel eh'r-gerrey ta Jee er chur hooïn fys :
 Cre'n boayl, cre'n cummey ? aless ! te dooin gyn-yss ;
 Choud's ta shin cooidjagh sloo hoieys mayd jeh,
 Bee'n gaue ny smoo my vees uss shooyl er-lheh.
 Tra voll eh ainleyn gial, fo sooill nyn Jiarn,
 Cre'n saase nagh jean eh noi'n annoonid ain ?

As nish ta'n dreamal dor'ghey dinsh oo dou,
Cur keint dy ghooyt dy vod eh shin 'chur mow.

Nagh vel shin crooit lurg eer co-chaslys Yee,
Fir'nagh, cair, creeney jeant noï noid erbee ?
Kinjagh ve agglagh ta meevaynrays vooar,
Bare dooin, un cheayrt, jeeaghyn da'n noid nyn booar ;
Foast mish s'annooney, as ta mee ny saa,
Er-lhiam dy voddin eddin y chur da :
Bwoaillt lesh nearey, dy jinnagh ben er chea,
Veagh shin veih 'chialgyn as veih 'chroutyn rey.
Son ooilley 'noidys cha goym's aggle roish,
Jee ver dou niart dy chooilleen' my hirveish.

Ren Jee ny ainleyn jeh stoo share na ooir
Jeh va shin crooit, eisht cha vel nyn booar
Ayns niart goll-roo, as foast ren y drogh-yeih
Ainleyn y violagh lesh dy vrishey'n leigh,
Eisht te orrinyn (myr s'annooney shin)
Ve er nyn dwoaie ny 'oï ta trooagh mooin,
Ny-slooid my nee mayd, myr ren adsyn neesht,
Leigh Yee y vrishey as shin hene ve brisht ;
Jee, trooid e chreenaght, daag dhyt dt'aigney free,
Shass as t'ou sauit, tuitt as t'ou caillit choiee.

Mooar ta nyn maynrays, shegin dooin goaill-rish,
Agh te corragh, as fegooish shickyrys ;
Dy baillish Jee gyn v'er chur ayns nyn booar
Dy huittym veih, eisht veagh shin sauit dy liooar.

Shen saillish Jee shegin dooin ve booiagh lesh,
Dy phlaiynt e chreenaght cha bee coontit jesh.
Cretoor da 'Chroodagh vees neu-viallagh,
Ta feeu veih e vaynrays dy ve tilgit magh ;
As, 'skyn dagh bio, ec Dooinney ta resoon
Dy hea veih gaue, as cha nee dy roie ayn.
Hee'm eisht, dooyrt Aue, nagh daityn lhiat my choyrle,
Mish ve er-lheh as m'obbyr hene y ghoaill.

Choud's ta mee mayrt (noï m'aigney) vod my chree
 Ve aignagh mayrt ? cha vod, bee'm myr veign skee,
 Agh nish as reesht, goll tammylt ass y raad,
 Ga nagh bee'n tooill, yn cree vees kinjagh ayd ;
 As meeiteil reesht graih vees er n'aase ny s'choe,
 Still gaase ny smoo, myr smoo te cummit fo.

O Ven ! ta Jee er n' yannoo dagh nhee mie,
 Mie son yn obbyr v'ad jeant mooie as sthie,
 Dooïn t'eh er choyr̄t tushtey dy scapail,
 Nyn girp, veih gortagh dy vod cheet nyn guail
 Veih cheu-mooie ; as cheu-sthie t'ain resoon
 Dy hea veih olkys dy bee chebbit dooin ;
 Foast fo coodagh mie foddee olk ve follit,
 As fo scaa resoon tushtey hene ve mollit,
 Agh jeh resoon, my nee mayd ymmyd cair,
 Ynsee eh dooin shin hene 'reayll ass danjeyr :
 Shoh m'aggle jeeds, dy vod foal' y volteyr
 Dy resoon 'chassey veih e hushtey cair ;
 Ayns ynnyd mie, dy jean oo olk y reih ;
 Lurg dty veerioose dy doill oo pian y leigh.
 Shooill, nish ta coyrle ayd, lhig neu-loghtynyss
 Mee still dty heshey, ny jean paartail rish,
 As nagh jean Jee shen chur my lieh son foill,
 Dy nee trooid graih ta mee cur kied dhyt goll.

Myr shoh lesh kied, veih Adam, Aue paartail,
 Gyn scoagh roish noid dy voddagh cheet ny quaail ;
 Sooill graihagh Adam kinjagh urree geiyrt,
 Gys ghow ny biljyn chiu ee veih e reayrt :
 Shiar trooid dagh allee 'hobbyr ren ee goaill,
 Kiartagh poseenyn's blaaghyn ayns dagh boayl.

Rish shoh va Satan follit 'syn ard-nieu
 (Myr ta dagh foalsaght gys y laa t'ayn jiu),—
 Sollys as aalin, fud poseenyn snaue,
 Hrog eh e chione bio ard gys shilley Aue ;

Trooid thammagyn dy vlaaghyn ren eh chea,
 Myr veagh goaill aggle dy vaikagh ee eh ;
 Ish jeh goaill yindys ; son cha vaik e roïe
 Cretoor cha aalin fud ny bielloo cloie,
 As v'eh cha foalsey, myr still dy ve chea,
 Breagey nyn Moir gys shilley billey'n vea,
 Eh shen va sarit voue, er-gerrey da,
 Laadit lesh mess, lesh duilley as lesh blaa
 Ec yn un cheayrt, mastey ny hooylyn elley
 Trooid magh yn orchard cha vaik rieu e shilley.

Eisht yn ard-nieu, seose mysh y villey snaue
 Lesh feacklyn dewil (son cha row echey laue)
 Phluck eh lesh ooyl dy daaney, as snaue neose,
 Stiagh fo ny blaaghyn mollagh chos'n eh roish.

Creau mooar as aggle ghow er nyn Mwarree greim,
 As jeeaghyn lurg yn ard-nieu, myr shoh geam :—
 Vaagh ! kys by-loys dhyt gyndyr er y vess
 Ta tayrn ort fine dewil, 's errey piandagh lesh ?
 Yn baase dty hoilliu ; O cre cha agglagh te
 Ta marroo'n vio, 's cur jerrey er y vea.

Choud's va nyn Moir vooar myr shoh branlaadee,
 Hass dooinney seose veih'n thammag kiongoyrt r'ee.
 E tappey, ayns shen, faggys ren ee 'choayl,
 Er lheid yn yindys cha row foast eck oayll ;
 O ! cre shoh ? dooyrt ee, O insh dou quoi oo ?
 Nee Adam noa oo, eer nish er dty chroo,
 Dy ghoaill ayryn mârin jeh'n vie ta shin ayn,
 Ny dy reill harrin (fo Jee) myr nyn gione ?

O Ven ! O Wheen ! O lesh cre'n ennym share
 Oddyms oo 'voylley, 'naght myr ta cooie as cair ?
 O aalid yial ! feeu yindys 've da'n theihll !
 Oo'n cretoor s'miljey jeh dy chooilley eill ;
 Onnor te dooys ve ginshlagh gys dty phooar
 As, myr t'ou feysht, dy hyndaa hood ansoor.

Vaik oo'n ard-nieu hug vaidjin lesh yn ooyl,
 As stiagh 'sy thammag ren snaue veih dty hooill ?
 Mish va'n ard-nieu shen ren yn ooyl y ee,
 Nish Dooinney jeant, ayns callin as ayns cree.

Roïe my volvane, snaue lesh my volg er laare,
 Nish hee oo mee shooyl's t'aym creenaght, tushtey's glare ;
 Lesh gee ooyl elley bee'm, ec yn un scell,
 My ainle cha sollys as to. Gabriel :
 Gee ren eh reesht, as v'eh er ny caghlaa,
 'S gys ainle dy hoilshey veh er ny hyndaa ;
 As my nee'm, dooyrt eh, tooilliu foast y ee,
 Veih ainle gial, hig-ym dy ve goll-rish Jee.

Eisht dreggyr Aue ; Dy insh ta yindyssagh,
 As hee my hooillyn caghlaa mirrilagh ;
 Agh Jee Ooill'-niartal, chiaddee niau as thalloo,
 Ny 'oï cha vod pooar erbee elley shassoo,
 Ta er chur reamys slane y gharey dooin,
 Ynrican Billey t'eh er harey voïn ;
 Baase t'eh er vaggyrt jeh my nee mayd gee,
 'S quoi s'loys ghoail-er dy vrishey sarey Yee ?
 Yindys mooar eh dy jinnagh Jee fo-harey,
 Veih 'lhiannoo hene, nhee dy vel mie 'sy gharey ;
 Mie, ta mee gra, son cre ta giootyn share
 Ny bioys, beaghey, creenaght, tushtey's glare ?
 Ny giootyn mie shoh ooilley t'ayms veih'n Villey,
 As my chaghlaa mooar ta jeant ayns dty hilley.
 O s'maynrey jeant mee, liorish y mess shoh,
 Cha nhione dou'n baase ; hee oo dy vel mee bio.
 Da cretooryn cha vel Jee er chur leigh,
 Cha vel fine cair, cha vow ad kerragh veih.

Uss, quoi erbee oo, cha dug Jee fo-harey,
 Gyn gee jeh'n villey shoh t'ayns mean y gharey,
 Myr hug eh mish ; uss veih'n leigh shoh free,
 Ta foastagh bio, ga ren oo'n mess y ee ;

Agh ta mish fo'n leigh, as treih ! cha nhione dou'n saase
(My vee'm goit kyndagh) nee m'y reayll veih baase.

Fys v'ec y Chroodagh my yinnagh oo gee
Jeh'n mess ooasle shoh, dy beagh oo jeant myr Jee :
As eisht ny share dy chummal seose e phooar,
Mee-hushtagh baillish freilt ve e chretoor,
Foast my she Jee eh, shegin da ve dooie,
Son foill cha faase cha jean eh uss y stroie ;
'Naght myr t'eh niartal t'eh neesht lane dy ghrayse
Uss, shirrey tushtey, cha der eh gys baase.

Bee creeney Ven, gow' ee, cha vel danjeyr,
Hee oo cre'n caghlaa hig lurg lhied y jinnair.
Shoh graït, yn breag'rey scugh ny sodjey vo'ee,
As daag eh ish ayns smooïnaght down ny yeï.

Chroan bannee, aalin, s'berchee t'ayns Pargys !
Jeh dt' ooylyn ooasle ta jeant rour meerooise,
Mooar ta dty vian, ga t'ou veih Dooïnney freilt,
Maynrays heelnaue boght t'ou feeu dy ve eït.
O cre'n gioot berchagh hug oo da'n ard-nieu,
Erskyn ny t'ayms ? myr hee'm cooïlleenit jiu,
Yn Croodagh hene, quoi ren uss 'harey voïn,
Hug dhyt ard-voylley, gynsagh dt'yymyd dooin :
Billey'n tushtey yn ennym hug eh dhyt,
Myr beayn dy row mie as sie bentyn rhyt.

Jeh'n villey noo shoh, 'sy laa nee mayd gee
She'n baase vees nyn leagh ; shoh, shoh baggyrt Yee :
Cha vel shoh agh baggyrt, ta mee treishteil,
Son fer t'er n'ee as foast t'eh er scapail.

Jeh mie as sie ta'n ooyl cur tushtey dooin,
Tushtagh jeh mie, nagh voddym sie 'cheau voym ?
Cha nhione dou'n baase, ny Jee, ny pooar y leigh,
O treigh ! cha nhione dou foastagh mie ny sie :
Shoh, shoh yn saase ver tushtey dou jeh ooïlley,
Te millish da'n vlayst, aalin neesht da'n chilley.

As ta mee kiarit.—

Shoh graït, e laue neu-luckee heeyn ee seose,
 Cha nee un ooyl, agh bangan vrish ee neose
 Trome lane dy vess, as aignagh ren ee gee
 Gys va jeant-magh yn accrys eck gys bee.

Ta m'obbyr jeant ! ta ooilley m'earree aym !
 Ta'n seihll noa naardey ; e chummaltee ta lhiam,
 Nee, Aue, ee-hene, e sheshey 'hayrn dy ee
 Fegooish my hrubbyl ; cre sheeagh kiarail Yee ?
 Agh foastagh, Aue cha ghow veg gys e cree,
 Myr lane jeh'n treisht dy beagh ee-hene myr Jee.
 Er-lhiee dy row ee hannah er e skian,
 Aarloo dy etlagh ard erskyn y ghrian,
 Dy aagail Adam ynrican 'sy ghaar',
 Choud's veagh ee-hene ayns stayd dy vaynrays share.
 Ny-yeih, myr geadagh dy jinnagh Jee Ben elley
 Y chiaddagh da, tra veagh ee choud ass shilley ;
 Dy lhiantyn dasyn kinjagh ren ee reih,
 Son graih cha surragh ee dy scarrey veih ;—
 Lhig my chron (dooyrt ee) ve edyr bio ny marroo,
 Myr Jee ayns niau, ny myr Ben er y thalloo,
 She mârish Adam my chron kinjagh vees,
 Va shin un eill, cha bee mayd arragh jees ;
 As ver-ym lhiam yn gioot shoh gys my hiarn,
 'Sy vaynrays aym's dy vod ve echey aymn :
 As reesht, jeh'n Viley, banglane vrish ee lhiee
 Palchey jeh ooylyn, lheid as d'ee-hene roïe.

Agh va'n ghrian hannah er ghoaill lieh'n jurnah
 Veih'n shiar gys sheear, as griennagh nish y tra
 Son Aue gys Adam reeshtagh dy hyndaa :
 B'oddey lesh Adam Aue va fuirraght veih,
 As fud y gharey v'eh ronsagh magh ny jeï,
 Ec Billey'n tushtey hooar eh ee ny shassoo,
 E sooillyn injil jeeaghyn er y thalloo,

Myr ayns smooïnaght dowin cre va eck dy ghra
 Son leshtal, kys va ceaut eck wheesh jeh'n laa :
 Yn banglane ooylagh croghey er e roih,
 Son gioot cour Adam, myr veih laue vie Yee.

Troggal e shilley, gennal yeeagh ee er,
 Lhiggey da'n vangan tuittym er y laare ;
 E roih'ghyn gial dy graihagh cheau ee mysh,
 Soilshagh cre'n boggey ve dy veeiteil rish.
 Gherjagh, dooyrt Adam, cre t'er cur cumrail
 Ort veih my heshaght, neayr ren shin paartail ?
 Maynrys Phargys cha vel veg ayns my hilley
 Uss ass y raad, mee-gherjagh dou ta ooilley.

Fuill ghruaieyn Aue, rish shoh va goll as cheet,
 Agglagh dy ve gys coontey sharroo eët.
 Shoh honnick Adam, as y bangan ooyl,
 Huitt veih e laue, ny lhie er laare ny cooyl ;
 Ooilley hug smooïnaght agglagh ayns e chree,
 Dy row ee hannah'r vrishey sarey Yee ;
 Agh Aue, dy hayrn eh ass e lhag-chiarail,
 Ghow toshiaght urree hene dy insh e skeeal :—
 My Hiarn, dooyrt ee, ny bee seaghnit wheesh
 Son y chumrail aym's ; agh ny sleaë cur booise.
 Yindyssagh ta'n oyr ren mish choud chummal voïd,
 S'beg heill shin roë dy vaikagh shin y lheid.
 Yn Billey shoh ('naght myr ta inshit dooin)
 Cha vel son olkys, agh freayll olkys voïn :
 Ayns ynnyd baase, e vess y ee ver bea,
 Ynnyd meehushtey, she cur tushtey te.
 Yn ard-nieu balloo ta er n'yndyr er,
 As e chaghlaa mooar hug my hooill my-ner ;
 Liorish e choyrle vie, ta mish neesht er n'ee,
 As baase cha hur mee, ny foast cragh erbee.

Veign nish ayns niau, myr ainle, my yiallican,
 Agh nagh lhig graih dou uss dty lomarean

Aagail my yeï ; gyn sheshey cooie, still bio,
 Ayns aggle gee jeh mess y villey shoh.
 Jeeagh ! shoh ny ooylyn slayntoil millish v'aym
 Dhyts son jinnair, dy voddagh oo goll lhiam
 Gys maynrys smoo na ta ain ayns Pargys,
 Raad nee ny ainleyn chebbal nyn shirveish.

Tra cheayll Adam branlaadee moyrnagh Aue,
 V'eh bwoailt lesh atchim, angaish trome as creau,
 As gour e vaaish hilg eh eh-hene er laare,
 Sherriuid aigney plooghey sthie e ghlare.
 Lurg tammylt vrish y sterrym v'ayns e chleeau
 Tilgey seose goan, nyn lheid s'coan cheayll shiu rieu.

O treih ! Aue caillit ! dooyrt eh, caillit choiee !
 Ta'n sarey brisht, as ish fo corree Yee,
 Aless ! cre nee'm ? O treih cre jir-ym r'ee ?
 Aggyrts y leigh'n baase, as te cairagh j'ee,
 Yn baase ! s'beg fys eck cre cha soor as te,
 Agh Jee t'er vaggyrt, as Briw cairagh Eh.
 Oh ! Aue, my heshey ! cooie, dooie as ennoil,
 C'hon hreig oo Jee ? C'hon daag oo mish cha moal ?
 Fadane myr baagh ! fud beïyn y vagher bee'm
 Nagh jean rhym loayrt, as nagh gow toiggal jeem.

O Ven cre sheeagh y treisht v'ou's as mish ayn,
 Dy beagh y seihll mooar coamrit lesh nyn gloan ?
 Dy hirveish Jee, as dy chur bial da,
 Trooid ny sheelogheyn ain bio son dy braa :
 Nyn dreisht nish mollit, nyn maynrys slane ec kione,
 Yn Voir ta caillit ; quoi nee gymmyrk cloan ?

Cree Aue nish lheïe lesh clashtyn lheid ny goan,
 Shleaghtagh ren ee, as hrog ee seose e kione.
 Adam my Hiarn (dooyrt ee) cre'n trimshey shoh ?
 Cha vel Aue caillt, nagh vel mee mayrt as bio ?
 Trog ort, my ghraih, as irree seose jeh'n faiyr,
 Lesh folt my ching neem's chymagh jeed dty yeïr ;

S'feer, ren yn arn-nieu gee jeh mess y villey,
 Ren mish myrgeddin ; cha dooar unnane ain skielley.
 Shoh Ghraih, gow, ee ; tilg dt' aggle ooill' er-gooyl
 As hee oo nagh vel y baase ny cragh ayns ooyl.
 Ga dy dug Jee yn billey shoh fo-harey,
 Shaghey dagh billey mie dy vel 'sy gharey,
 Foddee mayd gee jeh ; son, son foill cha faase,
 Ta Jee cha mie, cha bwoaill eh 'chloan lesh baase
 Adam urree jeeaghyn, as v'eh wheesh ayns graih,
 Myr ainle dy hoilshey ayns e hooillyn v'ee.
 Cre s'erree dhyts, Aue, s'erree lhig ve orrym,
 Myr ayns bea va shin, ayns baase bee mayd corrym ;
 My she baase dhyts, lhig da ve baase dooys,
 Bio ve dty lurg cha bee dou veg yn use :
 Eisht hoie eh sheese as mâree ren eh gee,
 Myr shoh vrish ad ny-neesht sarey Yee.

Yn gheay ren sheidey, taarnagh ren buirroogh,
 Liorish va fys oc dy row Jee jymmoogh ;
 Sooillyn nyn aigney, eisht, va foshlit lhean,
 Jeh mie as sie dy row oc shilley plain
 Yn mie va caillit, as yn sie va reiht,
 'S gys briwnys gyere dy beagh ad gerrit eït,—
 Jeh ônid, glennid, cairys, firrinys,
 Jeh foays as grayse v'ad er nyn spooilley nish—
 Jeh jalloo Yee honnick ad ad-hene rooisht,
 As jeh'n neu-loghtynys v'oc tra hoshiaght poost.
 Eisht saynt neu-ghlen cheu-sthie ghow toshiaght reill,
 Goaill foddeeght dy lhieeney aigney'n eill ;
 Nyn aigney meein noi'n spyrryd girree-magh,
 As gys gagh mie nyn gree neu-arryltagh.
 Meeourys, aggle, corree, as anvea
 Ghow orroo greim, ayns ynnyd shee as fea ;
 Yn derrey yeh jeu plaiynt er y jeh elley,
 Quoi by-chyndagh gee jeh mess y Villey.—

Aless, dooyrt Adam, dy dooar ee rieu my chied
 Goll veih my hooill, dy veeiteil noid e lheid.
 O trimshey mooar ! kys oddyms jeeaghyn nish
 Er Jee, ny ainle, rooisht jeh neu-loghtynys ?
 O dy voddin mee-hene y ollagh' choiee,
 Gyn sooill dy m'akin, gyn sheshaght laa ny oie ;
 O viljyn glass chiu, follee-jee my chione,
 Nagh vaik my hooill nee laa ny oie vees ayn.

My Hiarn, dooyrt Aue, ny cur y foill my lieh,
 'Naght myr dy beign lesh m'aigney kyndagh jeh,—
 Row tushtey aym dy voddagh yn ard-nieu,
 Fo jalloo drogh spr'yd, mish y violagh jiu ?
 Va'n ard-nieu baagh nagh row ayns noidys dooin,
 Quoi smooïnagh cree da olk y yannoo rooin ?
 Baagh gyn resoon, myr ny beïyn elley v'eh,
 Nagh voddagh loayrt rhym, agh snaue voym er-chea,
 Gys d'ee eh'n mess, as eishtagh ren eh loayrt,
 Dy nee noid v'ayn quoi oddagh tasteey choyrt ?

Eisht v'adsyn naaragh roish nyn oltyn hene,
 Nish jeeaghyn eajee, agh roish peccah glen :
 Arpinyn thanney feosagh jeant jeh duilley,
 Ren ad dy reayll nyn nearey veih dagh shilley.

Va'n anmys er nish, son va'n ghrian er roie
 Veih'n shiar gys sheear, as ny yeï faagail oie,
 Tra chronnee Adam ainle foast foddey veih,
 Scoaldey ny croink, as cur er ny creggyn lheië :
 Ny sniessey gaase cheer Eden sollys va,
 Myr veagh yn ghrian veih'n shiar reeshtagh chyndaa ;
 Harrish y gharey toshiaght soilshagh ve,
 Gyn fys ec Adam c'raad dy roie er-chea.

Ta Jee cheet, dooyrt eh, O cre nee mayd nish ?
 Nyn beccah eajee shegin dooin goaill-rish,
 Nish, nish vees fys ain cre'n red sharroo'n basse,
 Mannagh jean niau ayns myghin jeeaghyn grayse.

Agh corree t'eh, roish ta ny creggyn lheie,
 As baare ny sleityn ny yei jeeaghyn ruy.
 Aless ! cre neem's ? c'raad hem dy scapail veih ?
 'Syn aggle hreih shoh ghow eh Aue er laue,
 Chea fo ny biljyn chiu by-niessey daue.

Agh, nish, va Jee er ghoail er eddin kiune
 Graihagh chymmoil ; son Dooiney va annoon :
 Chamoo va feill bio oddagh shassoo roish,
 Choud as veagh corree lostey er e ghrooish.
 Mysh keim-ny-hoie, 'sy ghaar', cheayll eh coraa,
 Cre vel oo Adam ? ren y Goo y ghra,
 Lesh gennallys v'ou cliaghtey mee veeiteil,
 As fegooish geam dhyt yinnagh oo waiteil ;
 Cre'n caghlaa shoh ? Cre'n oyr t'ayd dy chumrail ?
 Jeeagh dt'eddin dou, shass magh, as tar my whail.
 Hug Adam freggyrt, Cheayll mee dty chora,
 Roie mee er follaght, son nearey orrym va ;
 Dy vel mee rooisht, nish nearey t'ayns my chree
 Dy heet kionfenish, ny dy loayrt rish Jee.

Quoi hug dhyt tushtey dy r'ou rooisht ? dooyrt Jee,
 Jeh mess y Villey vel oo hannah'r n'ee ?

My Hiarn, dooyrt Adam, yn gioot hug oo dou
 Ga fud mie Eden lheid y nhee cha row,
 Ayns dooghys aalin, graihagh, ooasle, glen,
 Obbyr dty laue v'ee-hene, enmyssit Ben ;
 Ish ren y mess shen hoshiaght roym y ee
 Jeh hug ee dooys, as dou cha lhig my chree
 Yn gioot eck 'obbal, ghow mee, ren mee gee.
 Yn Ooilley-niartal, eisht, dy creeney loayrt,
 Ayns goan meen kiune ren eh da oghsan 'choyrt,—
 Ghooiney annoon, nee Aue ny mish y Jee
 Dhyts dy chur geill da, 'skyn cretoor erbee ?
 Aue va dty ven, as dhyt v'ee dy chur geill,
 Uss harrish Aue, cha nee Aue harryd reill.

Eisht rish y yen loayr Jee, ayns focklyn giare,—
 Cre'n drogh-hurn shoh t'ou foiljagh jeh 'sy ghaar' ?
 Kys ghow us ort dy ee jeh mess y Villey,
 Ta gaggyrts baase ort hene's dty chynney ooilley ?

Aue bwoailt lesh nearey, chamm's lesh aggle mooar,
 Dy chur ansoor da s'coan my va eck pooar :
 Yn ard-nieu foalsey kiongoyrt rhym ren gee,
 'S dy ee jeh, neeshtagh, viollee eh shen mee.

Son yn ard-nieu, nagh row agh beishteig valloo,
 Nagh voddagh skiell' ny leshtal hene y yannoo,
 Cha deysht Jee eh ; agh son dy row eh greie
 Dy volley Aue, fo kerragh v'eh ny-yeih :—
 Cursit t'ou, dooyrt Jee, 'skyn dy chooilley vaagh,
 Yn Ven's e rass vees dhyt choiee noidagh quaagh,
 Er dty volg nee oo snaue, as joan ny hooirey 'ee,
 Son Billey'n Tushtey cha jean oo roostey choiee,
 Er-chee e vess y ghoail dy ve dty vee :
 Noidys vees eddyr y rass eck as dty rass,
 E voyn nee uss 'vroom, dty chione's vees brisht fo 'chass ;
 Shoh loayr yn Aaishnagh, as y meanal v'ayn
 Hug Creest, Mac Voirrey, trooid E phooar gys kione.

Eisht er nyn Mayrey va'n leigh er ny choyrt,
 Agh myghinagh mie r'ee ren y Briw loayrt :—
 Ayns gymmyrk' chlienney bee dty hrimshey mooar,
 Harryd dy reill bee ec dty heshey pooar ;
 Ersyn dty chree as dt'aigney still vees soit,
 Gearree ny smoo veih na ta fort 'chur dhyt.

Adam y trass, fo briwnys nish dy ve,
 V'ayns aggle as pian kys dy ymmyrk' eh.
 Yn ooir, va roie, j'ee hene cur magh e mess
 Gyn obbyr laue, gyn greie dy obbragh lesh,
 Myr bannit v'ee 'sy toshiaght, liorish Jee,
 Dy ymmyrk palchey jeh dy chooilley nhee,
 Mie as slayntoil da bioee, lieh-myr-lieh,

Myr va oc feme dy yannoo ymyd jeh.

Kyndagh rish peccah, greinnit nish va Jee
Dy leodagh dooghys mie dy chooilley vee :

Cursit, dooyrt eh, ta'n thaloo er-dty-hon,
Drineyn's onnaneyn yiow dy aase dhyt ayn,
Arryltagh jeu hene, dy chummal obbyr rhyt,
Er beggan ymyd-beaghee vees ad dhyt.

Ayns pian as doccar, imnea as kiarail,
Ooilley dty vea liauyr shegin dhyt y ghoail,
Lesh ollish, neesht, yiow uss dty veggan fail.

As dy chur tushtey share, neesht, cre ta'n stoo

Jeh v'ou uss jeant, tra ren mee oo y chroo,

Lhig fys ve ayd dy nee jeh joan yn ooir

Va jeant dty chorp, myr jeant ta dagh cretoor ;

Veih'n ooir haink oo, gys ooir nee oo chyndaa,

Myr nee dagh bio, as nyn sheelogheyn braa.

Joan ny hooirey ! stoo annoon as faase,

Leah shymley 'rsooyl, as lhie sheese geddyn baase,

Er shoh, eisht, smooïnaght moyrnagh cha bee oo ;

Son jeh'n stoo cheddin jeant ta'n veishteig sloo.

Yn vriwnys harrish, yn Briw ren chyndaa

Gys ream e ghloyr, nagh jean dy bragh caghlaa ;

Daag eh ny kimmee hreih fo pooar y leigh,

Gyn aght, gyn saase, ny treisht dy irree veih.

Nyn dappey caillt, hilg ad ad-hene er thaloo,

Ayns y voayl shen hie'n vriwnys er cur orroo,

Ny creggyn freggyrt gys nyn ghobberan,—

Nyn accan getlagh 'skyn ny bodjallyn,—

Brisht va nyn spyrryd, broojit va nyn gree

Lesh arrys feer dy vrish ad sarey Yee.

Mooar va nyn sneih, sharroo nyn drimshey va,

Ayns torchagh aigney cheau ad yn oie gy'n laa.

Tra hrog y ghrian yial seose e chione 'sy shiar,

Veih lieh ny cruinney yn oie er chosney sheear,

Hug Jee Miall Noo veih niau lesh sarey sheese,
 Dy eebyrt Adam magh as gaar' Phargys ;
 Agh ny-yeih d'insh daue dy vaik Jee nyn yeir,
 Nyn drimshey-cree, angaish as arrys feer,
 Dy row eh gialdyn dy beagh grayse nyn gour,
 My yinnagh ad foast biallys da 'phooar.

Leah haink yn ainle, e skianyn chroym eh sheese,
 Dy bannee Jee shiu, dooyrt eh rish y jees,
 Ny bee-jee agglagh roym's, nish er heet hiu,
 Son naight gerjoilagh gennal ta aym diu ;
 Nyn geayney treih, arrys as brishey-cree,
 Jee t'er chlashtyn, as ver eh reeshtagh shee :
 Jee Ooilley-greeney, tushtagh roish y chroo
 Jeh n' ta, va as vees, as ny ta bentyn roo,
 Hoig eh ro-laue dy doillagh uss y baase,
 Son dty haualtys chiare eh hene y saase.

Geam er e ainleyn sollys kiongoyrt rish,
 Hoilshee eh daue ny ta er haghyrt nish,
 Cairys y leigh dy beign cooilleenit 've,
 Baase v'eh dy aggyrts, beign y gheddyn eh ;
 Agh quoi'n cretoor nagh jinnagh agglagh chea
 Veih'n vaase, graih Adam veih'n baase y livrey ?
 Ny ainleyn nyn dhost va, gys loayr Mac deyr Yee
 Erreeishagh, graihagh 'skyn ny flaunyssee ;
 Arryltagh yiall eh dy ghoaill er hene yn errey,
 Lieh Adam, d'eck slane ny va'n leigh dy hirrey :
 Nish ga dy ren uss geill da miol y noid,
 Dy vrishey'n leigh va gaggyrts bial void,
 Er hoilliu'n baase, myr pian feer chairagh dhyt,
 Cre'n foayr smoo bailt ? Cre share dy yannoo rhyt ?
 Yn baase dty vriwnys, as shegin shassoo fo,
 Cre erbee'n traa t'ayd veih foast dy ve bio ;
 Agh my nee uss aigney dty Yee y reayll,
 Myr vees dhyt ynsit, as gyn reesht failleil,

Ayns maynrys smoo stiagh vees oo er dty ghoail,
 Na t'ou 'sy traas trooid miol y noid er choayl ;
 As ga dy vel y leigh gearree coilleeney
 Dty anneeghyn slane neesht ve er nyn yeeilley,
 Son gah'n vaaish peccah, as bree peccah'n leigh,
 Baase shegin hurranse, saase cha vod oo 'reayll veih :

Foast, ga yiow baase, seose nee oo girree reesht
 Gys bea foddey share, as pooar y noid vees brisht ;
 Caillee'n baase e ghah, yn leigh chaillys e vree,
 Sheelnaue sauit vees, gyn pian, gyn guin, ayns shee ;
 Rass feer nyn mree ver ooilley shoh gys kione,
 Caste'y'n ard-nieu, mârish dagh noidys t'ayn.
 Hig oo gys niau, ayns sneih dty noid y jouyl
 Yn ard-nieu foalsey, es y dunver dewil.
 Agh ny-yeih shegin maynrys Phargys aagail
 Son ny ta jeant ayd, shen vees ayn jeh dt'aill :
 Ymmyrk dy kiune nish ny ta Jee er harey,
 Son shegin dooys dt'akin goll magh roym veih'n gharey.

Ayns shoh dty vee v'ayd gaase dhyt still jeh-hene
 Er beggan obbyr ; gyn doccar as gyn pian ;
 Nish feiy'n theihll feayn shooill as gow dty chron,
 Yiow ayn dty vee, agh gobbragh er-y-hon.
 Myr shoh, dy treih, er eiyrt h'ad ass Pargys
 Gys y theihll whaagh va foue 'syn inshlid heese ;
 Trooid Eden rea ren ad nyn raad y ghoail,
 Keayne'y dy gyere son shen ny ren ad 'choayl :
 Eer beÿyn y vagher v'ad quaagh jannoo sooill
 Noidagh feayr orroo, 'naght myr v'ad cur cooyl.
 Yn dooghys mie ny smessey ren caghlâ,
 Yn ghrian daase grouw, tayrn dullyr er y laa.
 Nish sheshaght-caggee sollys, fo pooar Viall,
 Veih Niau gys Eden ren Mac Yee oardrail
 Dy reayll y gaar', nagh voddagh Satan arragh
 Mie dy row ayn, lesh e hooill churstey 'hallagh ;

As neesht dy hoiagh cliwe aileagh mysh
 Billey'n vea veayn, nagh dagh'ragh dasyn miss.
 Shoh ooilley jeant, va'n garey glass soilshean,
 Lesh ainleyn sollys, myr veagh eh slane ny ghrian :
 Satan ren chea gys e ream churstey hene,
 Ginsh da ny sp'rydyn caïd hooar eh cooilleen,
 Boggysagh roo, dy nee trooid yn ard-nieu
 Dobbree eh yn saase hug shaghryn er Aue ;
 Myr heb ny jouyil dy choirt nyn moylley da,
 Gys nieughyn eajee v'ad er nyn jyndaa,
 Ayns ynnyd loayrt va'n enish churstey balloo,
 Coraa ard-nieughyn v'oc ayns ynnyd taggloo—
 Dy row Niurin slane myr ayns un hiz,
 Glare cooie'n ard-nieu tra v'eh snaue ayns Pargys :
 Myr sambyl jeh'n vriwnys oddagh Jee 'chur er,
 Son jalloo'n veisht shen 'ghoail tra v'eh 'sy ghaar'.
 Rish shoh va Adam as e heshey cooie
 Troait magh trooid Eden, as treigeil y reih,
 Myr va kiarailys flaunyssagh leeideil,
 As niartagh nyn oltyn mie daue dy hooilleil ;
 Troait ry-liass-laa, as goaill nyn aash 'syn oie
 Fo creg ny cronk, nyn gorp as aigney skee :
 Croyn as smeir-ghressagh shirveish daue son bee,
 Gys hooar ad coan kiune rea, dy hoiagh ayn
 Dy chosney beaghey, as dy gheddyn cloan :-
 Raad faag-ym ad gys grayse as myghin Yee,
 As fo ard-chiarail as graih ny flaunyssee.